







# श्रीमद्





# প্রিয়ানু

শ্রীচন্দ্রকান্ত দত্ত সরস্বতী বিদ্যাভূষণ  
প্রণীত

প্রকাশক,  
শ্রীআশুতোষ ধর  
আশুতোষ লাইব্রেরী  
৩৯/১ কলেজস্ট্রীট, কলিকাতা  
ঢাকা ও চট্টগ্রাম।

১৩৩০

মূল্য ॥• আট আনা

COPYRIGHT  
RESERVED BY THE  
**PUBLISHER.**



PRINTED BY  
RELATI MOHAN DAS  
at the **Asutosh Press**, Dacca

# উপহার

শ্রীমন্ত

আমার

শ্রী

সমর্পণ করিলাম ।

তারিখ

} শ্রী





# শ্রীমন্ত

১



গবতীর ইচ্ছা হইল, তিনি মর্ত্যে  
স্ত্রীলোকদিগের নিকট হইতে তাঁহার  
পূজা গ্রহণ করিবেন। এই কার্য্য  
সাধন করিবার জন্ত তিনি দেবী পদ্মা-  
বতীর সহিত পরামর্শ করিয়া স্থির  
করিলেন, ইন্দ্রের সভার নর্ত্তকী পরম  
রূপসী রত্নমালা অম্বরীকে অভিশাপ দিয়া স্বর্গ হইতে পৃথি-  
বীতে পাঠাইতে হইবে, তাহা হইলেই কার্য্য সিদ্ধি হইবে।





দেবসভায় রত্নমালার নৃত্য



মিনতি করিয়া কাঁদিয়া বলিল, “দেবি, আমার অপরাধ ক্ষমা করুন, আমাকে এমন কঠিন শাপ দিবেন না।”

ভগবতী বলিলেন, “না রত্নমালা, আমার অভিসম্পাত তোমাকে ভোগ করিতেই হইবে। পৃথিবীতে ইছানী নগরের বণিক লক্ষপতি তোমার পিতা আর তাহার স্ত্রী রত্নাবতী তোমার মা হইবেন। আমার পূজা তোমার দ্বারাই পৃথিবীতে প্রচার হইবে।”—বলিতে বলিতে রত্নমালা ভস্ম হইয়া গেল।

ইছানী নগরের বণিক লক্ষপতির স্ত্রী রত্নাবতীর গর্ভে রত্নমালার পুনর্জন্ম হইল। বাপ মা তাহার নাম রাখিলেন খুল্লনা। খুল্লনা চাঁদের মত দিবস ফুটফুটে মেয়েটি। সে যখন বিছানায় ঘুমাইয়া ঘুমাইয়া কখনো হাসিত, কখনো ফুলিয়া ফুলিয়া কাঁদিয়া উঠিত, তখন রত্নাবতী তাহার পাশে বসিয়া তাহা দেখিয়া কত খুসাইনা হইত! দিন দিন খুল্লনা বাড়িতে লাগিল, সাত মাসে তাহার অন্নপ্রাশন হইল। সে যখন মাকে দেখিয়া তাহার সবেমাত্র-ওঠা ছোট্ট দাঁত দুইটি বাহির করিয়া হাত বাড়াইয়া আধ আধ স্বরে মা মা বলিয়া ডাকিয়া উঠিত, তখন তাহা দেখিয়া রত্নাবতীর সারাটা প্রাণ যেন আনন্দে ভরিয়া যাইত। সে খুল্লনাকে বুকের মধ্যে তুলিয়া লইয়া তাহার গোলাপের মত কচি মুখখানি চুষনে ভরিয়া দিত; খুল্লনার হাসিতে যেন চারিদিকে চাঁদের আলো ছড়াইয়া পড়িত। এক দুই তিন করিয়া ক্রমে খুল্লনা ছয়

বছরে পা দিল। ধনী বাপের আদুরে মেয়ে সে, তাই বাপ  
মায়ের দুই জনেরই সাধ হইল, মেয়ের বিবাহ দিয়া জামাই  
ঘরে আনে। ঘটক পাঠাইয়া বরের খোঁজ চলিতে লাগিল।  
ক্রমে খুল্লনা বারো বছরে পড়িল। তাহার মেঘ-বরণ চুল,  
তিল ফুলের মত নাক, গায়ের রং যেন পাকা সোনা, ভাসা  
ভাসা চোখ, গোলাপের পাপড়ির মত ঠোঁট দু'খানি, শরীর  
খানি যেন মাখন ছানিয়া তৈরী,—খুল্লনার রূপে লক্ষপতির ঘর  
আলো হইয়া গেল। তাহার এরূপ দেখিয়া বাপমা দুই জনেই  
ভাবিল, নিশ্চয়ই কোনও দেবতা আসিয়া তাহাদের ঘরে জন্ম  
লইয়াছে। এমন ছবির মত সুন্দর মেয়েটী, তেমনি কুলে  
শীলে রূপেগুণে একটী বরের খোঁজে লক্ষপতি চারিদিকে  
ঘটক পাঠাইল।

২

উজ্জয়িনী নগর, সহরটী যেন ইন্দ্রের অমরাবতী। কত  
দেশ হইতে কত লোক আসিয়া সে সহরে বাস করিতেছে,  
কত সদাগর কত জিনিসের কেনা বেচা করিবার জন্য সেখানে  
আসিয়া ঘর বাড়ী করিয়াছে। সেই সহরে ধনপতি নামে  
একজন সদাগর বাস করিতেন, তিনি যেমন ধনেমানে, তেমনি  
কুলেশীলে, তেমনি রূপেগুণে। তাঁহার পায়রা উড়াইয়া

খেলা করিবার খুব বাতিক ছিল। সেজন্য তিনি দেশ বিদেশ হইতে যেখানে যত রকম সুন্দর ও দামী পায়রা পাওয়া যায় বহু টাকা ব্যয় করিয়া তাহা কিনিয়া আনিতেন।

একদিন ধনপতি বন্ধুদিগকে লইয়া পায়রা উড়াইতে ছিলেন। তাহার শ্বেতা নামে একটা পায়রা একেবারে উড়িয়া চলিল, আর ফিরিয়া আসিল না। ধনপতি উর্দ্ধমুখে পায়রার দিকে চাহিতে চাহিতে তাহার পেছনে পেছনে ছুটিলেন। খুল্লনা তখন ইছানী নগরে সখীদিগকে লইয়া ধূলা দিয়া খেলা-ঘর বাঁধিয়া খেলা করিতেছিল। ধনপতির পায়রা যাইয়া তাহার কোলের উপর পড়িল। অমন সুন্দর খুল্লনা কখনো দেখে নাই, তাড়াতাড়ি সে পায়রাটাকে আঁচলে ঢাকিয়া লইয়া বাড়ীর দিকে চলিল। ধনপতি তাহার কাছে উপস্থিত হইয়া বলিলেন, “আমি উজানী নগরের একজন সদাগর, আমার নাম শ্রীধনপতি দত্ত, জাতিতে গন্ধবণিক। আমার একটা সখের পায়রা উড়িয়া আসিয়া তোমার গায়ে পড়িয়াছে, তুমি তাহা লুকাইয়া রাখিয়াছ, আমার সে পায়রাটা দাও, অমন পায়রা আর আমার একটাও নাই।

খুল্লনা ধনপতির পরিচয় পাইয়া বুঝিল, এ সদাগর তাহারই জেঠাতুত ভগ্নী লহনার স্বামী, কাজেই সম্পর্কে তাহার ভগ্নীপতি। সে ভগ্নীপতিকে একটু পরিহাস করিবার স্রুযোগ ও লোভ ছাড়িতে পারিলনা, হাসিয়া বলিল, “তুমি কোথাকার



সদাগর, কে তোমায় চিনে ? ভদ্রলোক কি কখনো পাখী তাড়াইয়া তাহার পেছনে পেছনে ছুটিয়া বেড়ায় ? পায়রাটা আসিয়া প্রাণের ভয়ে আমার কোলে লুকাইয়াছে, আমি তাহাকে তোমার হাতে কিছুতেই দিতে পারি না, তাহাকে আমি আশ্রয় দিয়াছি, প্রাণ দিয়াও তাহাকে রক্ষা করিব। এটা যে তোমার পায়রা তাহার কোনও চিহ্ন আছে কি ? তুমিত খুব চতুর চালাক দেখিতেছি, কোনও রকমে ফাঁকি দিয়া পায়রাটা আদায় করিয়া লইতে চাও।—আচ্ছা যদি পায়রাটা নেহাতই তুমি নিতে চাও তবে, দাঁতে কুটা লইয়া চাহিয়া নেও।”✓

খুল্লনার কথা শুনিয়া ধনপতি মনে করিলেন, এ মেয়েটা বোধহয় লক্ষপতির হইবে নতুবা সে তাঁহাকে কি এমন করিয়া ঠাট্টা করিতে সাহস করে ? তিনি আর সেখানে দাঁড়াইলেন না, ধীরে ধীরে গিয়া একটা গাছের তলায় বসিলেন। খুল্লনা তাহার মুখের দিকে চাহিয়া ফিক্ করিয়া হাসিয়া পায়রাটা লইয়া হেলিতে তুলিতে চলিয়া গেল। ধনপতি খুল্লনার অমন চাঁদপানা মুখ ও সুন্দর রূপ দেখিয়া মুগ্ধ হইয়া গেলেন। লোকের কাছে জিজ্ঞাসা করিয়া তিনি জানিতে পারিলেন, তাঁহার অনুমানই সত্য, মেয়েটা যথার্থই লক্ষপতির কন্যা খুল্লনা। তিনি জনার্দন পণ্ডিতকে খুল্লনার সহিত তাঁহার বিবাহ সম্বন্ধ ঠিক করিয়া দিতে ধরিয়া বসিলেন।

জনাই পণ্ডিত ধনপতিকে আশ্বাস দিয়া লক্ষপতির বাড়ী

গিয়া উপস্থিত হইলেন। লক্ষপতি বিহুদিন পরে পুরোহিতকে দেখিয়া আনন্দে পায়ের ধূলি লইয়া বলিল, “ঠাকুর মহাশয়, আমার মেয়ে খুল্লনার বিবাহের একটা সম্বন্ধ ঠিক করিয়া দিন না।”

জনাই খুল্লনাকে দেখিয়া বলিলেন, “লক্ষপতি বারো বছরের মেয়ে হইয়াছে, এখনো ইহার বিবাহ দিতেছ না, তোমার যে চৌদ্দপুরুষ নরকে বাইবে।”

লক্ষপতি বলিল, “খুঁজিয়া খুঁজিয়াও ত মনোমত পাত্র মিলিতেছে না, আপনি দয়া করিয়া একটা সম্বন্ধ ঠিক করিয়া দিন।”

জনাই পণ্ডিত অনেক ভাবিয়া চিন্তিয়া বলিলেন, “গন্ধৰ্বগিক সমাজে খুল্লনার উপযুক্ত বরত খুঁজিয়া পাইনা, কেবল উজানী নগরের ধনপতি সদাগর তোমার মেয়ের উপযুক্ত বলিয়া আমার মনে হয়। তহোর যেমন রূপ, তেমন গুণ, তেমন বিদ্যাবুদ্ধি, তেমন সে ধনেমানে কুলে শীলে। ইহার হাতে খুল্লনা পড়িল তবে ঘট বুঝিয়া ফুল দেওয়া হইবে। খুল্লনা সেখানে রাজরাণীর মত স্নেহে থাকিবে। এখানেই তুমি মেয়ের সম্বন্ধ স্থির কর।”

পুরোহিতের মুখে ধনপতির রূপগুণ, বিদ্যা বুদ্ধি ও বংশের কথা শুনিয়া লক্ষপতি সন্মত হইল। রস্তাবতী কপাটের আড়ালে দাঁড়াইয়া দাঁড়াইয়া মেয়ের বিবাহের কথা শুনিতে-

## ❧শ্রীমন্ত❧

ছিল। জনাই পণ্ডিত চলিয়া গেলে সে লক্ষপতির কাছে আসিয়া রাগিয়া বলিল, “তোমার কি বুদ্ধি শুদ্ধি একেবারে লোপ পাইয়াছে যে, তুমি আমার অমন মেয়ে,—সোনার প্রতিমার মত যার রূপ, তাকে সতিনের ঘরে দিতে চাহিতেছ ! লহনাকে কি তুমি চেন না। সে যে খুল্লনাকে দিনরাত জ্বালা যন্ত্রণা দিয়া ভাজা ভাজা করিবে। প্রাণ থাকিতে আমি অমন বিবাহ হইতে দিব না, মেয়ে আমার আইবুড়ে হইয়া ঘরে থাকিবে সেও ভাল। খুল্লনাকে গলায় বাঁধিয়া আমি জলে ডুবিয়া মরিব, তবু তাহাকে দোজবরে দিতে পারিব না। চেষ্টা করিয়া দেখ, না হয় আরো কিছুদিন পরে আমরা মেয়ের বিবাহ দিব। ধনে জনে ভরা প্রথম-বরে দিলে মেয়েও সুখে থাকিবে, তোমার টাকা ব্যয়ও সার্থক হইবে, লোকেও ভাল বলিবে ; তুমি ও-সব পাগলামি বুদ্ধি ছাড়িয়া দাও।”

লক্ষপতি বলিল, “শোন রম্ভা, খুল্লনার অদৃষ্টে তাহাই আছে। অনেক দিন আগে এক গণকঠাকুর আসিয়া বলিয়া গিয়াছেন যে, খুল্লনা সতিন-ঘরেই পড়িবে, এবং তাহাতেই সে সুখী হইবে। তুমি আমি চেষ্টা করিয়া কি করিব ?”

স্বামীর কথা শুনিয়া রম্ভাবর্তী আর আপত্তি করিল না। ধনপতির সাথের খুল্লনার বিবাহ-সম্বন্ধ স্থগিত হইয়া গেল।

ধনপতির স্ত্রী লহনা যখন শুনিল, তাহার স্বামী খুল্লনাকে বিবাহ করিবার জন্ত দিন স্থির করিয়া ফেলিয়াছে, তখন রাগে দুঃখে তাহার বুক ফাটিয়া কান্না আসিতে লাগিল। সে আহাৰ নিদ্রা ছাড়িয়া দাসী দুর্ব্বলার কাছে বসিয়া তাহার মনের দুঃখের কথা বলিতে লাগিল, “শুনিয়াছি সু দুর্ব্বলা, আমার যে কপাল পুরিয়া গেল, সদাগর আবার বিবাহ করিবেন। আমার খুড়তুত বোন খুল্লনার সাথে তাঁহার সম্বন্ধ স্থির হইয়া গিয়াছে। সাধু পায়রা উড়াইবার চল করিয়া গিয়া খুল্লনাকে দেখিয়া একেবারে ভুলিয়া গিয়াছেন। হায় দুর্ব্বলা, ছোট বোন আমার সতিন হইয়া আসিয়া আমার সাজানগুছান স্নেহের সংসার আগলাইয়া বসিবে, এর চাইতে যে আমার মরণ ভাল ছিল। কত সাধ করিয়া ঘর বাড়ী সাজাইয়া ছিলাম তাহা সতিনের হাতে সঁপিয়া দিতে হইবে, সংসারে আমি দাসী বাঁদীর মত হইয়া থাকিব, স্বামী আমার পর হইবে।” দুর্ব্বলা তাহাকে অনেক বুঝাইয়া স্নুঝাইয়া একটু শান্ত করিল।

লহনা অভিমান করিয়া কয়েক দিন স্বামীর সাথে কোনও

## ✽শ্রীমন্তঃ

কথাই বলিল না। ধনপতি বুঝিলেন, তাহার এ রাগের অর্থ কি ? তিনি লহনাকে অনেক করিয়া বুঝাইলেন, তিনি বিবাহ করিয়া লহনাকে সুখেই রাখিবেন, রাঁধিয়া রাঁধিয়া তাহার শরীর শুকাইয়া গিয়াছে, এজন্য তিনি আর একটা বিবাহ করিবেন, নূতন বউ তার দাসী হইয়া থাকিবে,—ইত্যাদি কত কথাই তিনি লহনাকে বলিলেন, কিন্তু লহনা কিছুতেই স্বামীর আবার বিবাহে রাজি হইল না। সে মনে মনে এটা বেশ বুঝিল যে, নূতন বউ আসিয়া তাহার সমস্ত সুখ আত্মসাৎ করিয়া বসিবে, সে যে সংসারে এতদিন রাণী ছিল, সেখানে তাহাকে একটা বাজে লোকের মত থাকিতে হইবে। হিংসায় তাহার গা জুলিয়া যাইতে লাগিল।

ধনপতি দেখিলেন, মহামুস্কিল ; অথচ লহনাকে সম্মত করিতে না পারিলে তাঁহার বিবাহ করাই হইবে না। তিনি লহনাকে বলিলেন, “শোন লহনা, আমি বিবাহ করিয়া তোমাকে কোনও কষ্টই দিবনা, আগে তুমি যেমন ছিলে চিরকাল তেমনি থাকিবে। তুমি আমার ঘরের লক্ষ্মী, তোমাকে বিবাহ করিয়া আনিয়া আমার অদৃষ্ট ভাল হইয়াছে, তোমাকে কি আমি অনাদর করিতে পারি লহনা ? কাল তোমাকে আমি একখানা পাঠশাড়া আব পাঁচ ভরি সোনা দিয়া নূতন ধরণের চুড়ি তৈরী করিয়া দিব ; লক্ষ্মীটি আমার, আর অমত করিও না।”

ধনপতির আদরে ও পাটশাড়ী ও সোনার চুড়ির লোভে লহনার সমস্ত অভিমান দূরে গেল, সে আনন্দে স্বামীকে বিবাহ করার অনুমতি দান করিল।

প্রাতে জনাই পণ্ডিত আসিলে ধনপতি তাঁহাকে লক্ষ-পতির বাড়ী যাইয়া সম্বন্ধ স্থির করিতে বলিলেন। জনাই পণ্ডিত লক্ষপতিকে যাইয়া এ শুভ সংবাদ জানাইলেন। লক্ষপতি ও রস্তাবতী আনন্দে জনাই-এর পায়ে ধূলি লইয়া শুভদিন নির্ধারণ করিতে বলিল। জনাই অনেক শাস্ত্র ও পাঁজিপুঁথি ঘাঁটিয়া ফাল্গুন মাসের ত্রয়োদশী তিথি রোহিণী নক্ষত্রে বিবাহে লগ্ন করিলেন। বর ও ক'নের বাড়ীতে বিবাহের ধুম পড়িয়া গেল। শানাইএর মধুর সুরে আকাশ ভরিয়া উঠিল।

তারপর শুভদিনে শুভলগ্নে বিবাহ হইয়া গেল। ধনপতি স্বশুর শাশুড়ীকে প্রণাম করিয়া নববধূ খুল্লনাকে লইয়া সোনার পান্কাতে চড়িয়া বাড়ী ফিরিলেন। লহনা হিংসায় জ্বলিতে জ্বলিতে বুকভরা দুঃখ লইয়া খুল্লনাকে বরণ করিয়া ঘরে তুলিল।

উজ্জয়িনী নগরে দুই জন ব্যাধ বাস করিত। তাহারা প্রতিদিন বনে বনে ঘুরিয়া পাখী ধরিয়া লইয়া গিয়া সহরে বিক্রি করিত। একদিন তাহারা সাতনলায় আটার ফাঁদে দুইটা শুক ও শারী ধরিল, শুক কোনও রকমে ফাঁদ হইতে উড়িয়া গিয়া গাছের ডালে বসিল, কিন্তু শারী আর পলাইতে পারিল না। ব্যাধেরা তাহাকে ধরিয়া খাঁচায় পুরিল। তাহারা শাড়ীকে ধরিয়া লইয়া যায় দেখিয়া শূকের মনে বড়ই দুঃখ হইল। সে ব্যাধদিগকে বলিল, “ব্যাধ, তোমরা যে নিত্য নিত্য পাখী মারিয়া পাপ করিতেছ এজন্ম যে কি নরকজ্বালা তোমাদিগকে ভোগ করিতে হইবে তাহা কি একবার ভাবিয়া দেখিয়াছ? পাখী মারিয়া মাংস বেচিয়া কতই বা পয়সা পাও, ইহাতে যে তোমাদের পাপ হয় তাহাতে তোমরা সবংশে নষ্ট হইবে। যখন মরিয়া যাইবে তখন এই টাকা পয়সা সাথে যাইবেনা, কেবল পৃথিবীতে যে টুকু পাপ ও পুণ্য করিবে তাহাই সাথে যাইবে। তোমরা মানুষ, তোমাদের যেমন স্ত্রুত দুঃখ আছে, ভগবান কোনও প্রাণীকে তার চাইতে এক তিল কম দেন নাই। এসব পাপ কাজ ছাড়িয়া দিয়া সৎভাবে থাক, জীবন তোমাদের সুখের হইবে। শাস্ত্রে আছে, শিবিরাজ্য একটা পায়রার প্রাণ

রক্ষার জন্ত তাঁহার নিজের শরীরের মাংস কাটিয়া দিয়াছিলেন।  
তোমরা শারীকে ছাড়িয়া দাও ব্যাধ, তার বদলে আমাকে  
লইয়া যাও, রাজার কাছে আমাকে লইয়া গেলে আমার  
মূল্য তিনি যাহা দিবেন, তাহাতে তোমরা আজীবন পরম  
স্বখে থাকিতে পারিবে।”

শুকের কথায় ব্যাধদের মনটা যেন কেমন হইল, তাহারা শারীকে ছাড়িয়া দিয়া বলিল, “শুক, তোমার কথায় আজ আমাদের অনেক শিক্ষা হইল, আর আমরা কোনো দিন এমন পাপ কাজ করিব না।”

শরীকে ছাড়িয়া দিল দেখিয়া শুক উড়িয়া গিয়া  
ব্যাধদের হাতের উপর বসিয়া কহিল, “আমাকে তোমরা  
রাজার কাছে লইয়া যাও, আমাদের আশাতীত  
লাভ হইবে।”

ব্যাধেরা দেখিল, এমন সুন্দর পক্ষী তাহারা জীবনে কোনও দিন দেখে নাই; পাখীর সোণার পাখা, তাহার উপর চুনী, পাল্লা, নীলা ও মরকতের ফুটকি বসানো, মাথায় মাণিকের ঝুঁটি, হীরার ঠোট, পদ্মরাগ মণির চোখ, প্রবালের পা, কণ্ঠস্বর কি মিষ্টি ! শুককে লইয়া ব্যাধেরা রাজ-দরবারে চলিল . শুককে যাইতে দেখিয়া শারীও যাইয়া ব্যাধদের হাতে উড়িয়া বসিল ।

ব্যাধেরা যখন শুক শারীকে লইয়া রাজসভায় উপস্থিত



## ✽শ্রীমন্ত✽

হইল, রাজা, পাত্র, মিত্র, মন্ত্রী, উজীর, নাজির, সকলেই সেই পক্ষী দেখিয়া অবাক হইয়া গেলেন। অমন পক্ষী তাঁহারা আর কোনো দিন দেখেন নাই ! পাখীর পায়ের মণিমুক্তার আভায় রাজ-সিংহাসনের ও রাজার পোষাকের হীরা জহরত একে-বারে নিস্তেজ হইয়া গেল। শুক রাজাকে বলিল, “মহারাজ, আমরা পূর্ব জন্মের পাপের ফলে পক্ষী হইয়া জন্মিয়াছি। আমি রাজা বীরবাহুর পুত্র ছিলাম, ঋষি বিশ্বামিত্রের অভি-শাপে আমরা স্বামী স্ত্রী দুই জনেই পক্ষি জন্ম পাইয়াছি। তারপর কিছুদিন আমরা বৃন্দাবনে ছিলাম, শ্রীকৃষ্ণের সাগে সাথে গরুর পাল লইয়া গোষ্ঠে যাইতাম, কত খেলা খেলিতাম ;—বড় সুখের ছিল সে জীবন আমাদের। এক দিন স্বর্গের নন্দন বনে বেড়াইতে গিয়াছিলাম, দেবরাজ ইন্দ্র আমাদের কত কৌশল করিয়া ধরিয়া লইয়া গেলেন। আমরা ইন্দ্রের সভায় থাঁচায় বসিয়া তাঁহাকে শাস্ত্রের কথা শুনাইতাম। দেবতার আমাদের বড় ভাল বাসিতেন। শ্রীবৎস রাজা একবার তাঁহার বন্ধু ইন্দ্রের সভায় বেড়াইতে গিয়া আমাদের ইন্দ্রের নিকট হইতে চাহিয়া লইয়া গেলেন। সেই দিন হইতে আমরা শ্রীবৎস রাজার হইলাম, রাজ সভায় সোনার থাঁচায় বসিয়া আমরা রাজাকে শাস্ত্রের বচন শুনাইতাম, তিনি নিজ হাতে আমাদের গায়ে চন্দন মাখিয়া দিতে দিতে তাহা শুনিতেন। কিন্তু আমাদের কপালে সে সুখ সহ্য

হইল না। রাজরাণী শণির কোপে পড়িয়া বনবাসী হইলেন। আমরা আপনার প্রশংসার কথা শুনিয়া এখানে আসিলাম, আসিয়া ব্যাধের হাতে ধরা পড়িলাম। আমরা আপনার রাজসভাতেই থাকিব, আপনি ব্যাধদিগকে উপযুক্ত মূল্য দিয়া বিদায় করুন।” রাজা বিক্রমকেশরী শূকের কথা শুনিয়া মুগ্ধ হইয়া গেলেন, সভার লোক অবাক হইয়া পাথরের মত বসিয়া রহিল। তিনি ব্যাধদিগকে শুকশারীর মূল্য বাবদ এক হাজার মোহর গণিয়া দিতে হুকুম করিলেন।

রাজা পক্ষীর মুখে মানুষের মত কথা শুনিয়া বড়ই আশ্চর্য্য হইলেন,—আরও আশ্চর্য্য হইলেন শাস্ত্রের কথা শুনিয়া। তিনি পক্ষীদিগকে বলিলেন, “আমি তোমাদের কথা শুনিয়া পরম আহ্লাদিত হইয়াছি, তোমরা আমার রাজ সভায় থাক। আমিও তোমাদিগকে সোনার খাঁচায় রাখিয়া ঘি ভাত দুধ-ক্ষীর খাওয়াইয়া তোমাদের নিকট হইতে শাস্ত্রের কথা শুনিব।”

মন্ত্রী বলিলেন, “মহারাজ, এমন পক্ষী রাখার সোনার খাঁচাত এদেশে মিলিবে না। গোড় নগরে ভাল সোনার খাঁচা তৈরী হয়। ধনপতি সদাগর বাণিজ্য করিতে সে দেশে যাইয়া থাকেন, তাঁহাকেই খাঁচা অনিবার জন্ত আদেশ করুন।”

রাজা ধনপতিকে খাঁচা আনিতে গোড়ে যাইবার আদেশ

করিলেন। ধনপতি মাথা হেঁট করিয়া বলিলেন, “মহারাজ, বাড়ীতে আমার কেইই নাই। শুধু মাত্র দুই স্ত্রী, তাহাদিগকে একেলা ফেলিয়া যাওয়া ভাল হয় না, অন্য কেহকে আদেশ করুন।”

রাজা কিছুতেই ধনপতির অনুনয় বিনয় শুনিলেন না। কাজেই বাধ্য হইয়া ধনপতিকেই গোড়ে যাইতে হইল। যাইবার সময় তিনি খুল্লনাকে লহনার হাতে তুলিয়া দিয়া তাহাকে আদর যত্ন করিবার জন্য বিশেষ করিয়া বলিয়া গেলেন।

৫

লহনা খুল্লনাকে আপন বোনের মত স্নেহ ও ভাল-বাসায় আদর যত্ন করিতে লাগিল। খুল্লনার কষ্ট হইবে মনে করিয়া লহনা তাহাকে সংসারের কোনও কাজ করিতে দিত না। লহনা নিজ হাতে খুল্লনার মাথায় ফুলেল তেল দিয়া তাহার গা ঘষিয়া স্নান করাইয়া দিত, পঞ্চাশ ব্যঞ্জন রাঁধিয়া কাছে বসিয়া খাওয়াইত, তাহার নিজের ভাল ভাল পোষাক ও গহনা দিয়া খুল্লনাকে সাজাইয়া দিত, দুই জন এক চিঠিনায় শুইয়া কত গল্প করিত,—কে বলিবে ইহারা দুই সতিন ?—যেন এক মায়ের পেটের দুইটা বোন।

দুর্বলা তাহাদের বাড়ীর দাসী। বড় কুটিল স্বভাব তার। কাহারো ভাল সে দেখিতে পারেনা,—যেন চোখে কাঁটা ফোটে। দুই সতিনের এমন ভাব তাহার সহ্য হইলনা। সে মনে মনে ভাবিতে লাগিল, ইহাদের দুই জনের মন ভাঙ্গাইতে হইবে, যে ঘরে সতিনে সতিনে ঝগড়া হয়না সে ঘরে দাসীপনা করিয়া সুখ নাই, ঝগড়াঝাটি হইলে বেশ একটু মজা দেখা যায়, দুইজন দুইজনকে যদি বিষ নজরে দেখে তবে একজনের নিন্দা আর একজনের কাছে করিয়া বেশ ভাল মানুষটি মাজা যায়। এই ভাবিয়া দুর্বলা লহনার কাছে যাইয়া হাজির হইল। লহনা তখন খুল্লনার চুল বাঁধিয়া দিতেছিল। দুর্বলা তাহাকে আড়ালে ডাকিয়া লইয়া কহিতে লাগিল, “তোমার কি কিছুই বুদ্ধি শুদ্ধি নাই গো? নিজের কপাল যে নিজেই খাইতেছ। সতিনের এত আদর! ওমা, এমনত কোথাও দেখি নাই! তুমি যতই কেন করনা, সতিন, বাঘ আর সাপ এ কখনই পোষ মানিবেনা। আজ তুমি যে সতিনের জন্ত এত খানি করিতেছ একদিন সেই সতিনই তোমার বুকে ছোরা মারিবে। খুল্লনার এমন সুন্দর রূপ, আর তুমি বুড়ী হইতে চালায়ছ, রূপের জোলস আর তোমার তত নাই, সাধু গোড় হইতে আসিয়া তোমাকে আর ভালবাসিবেনা, খুল্লনাকেই সে আদর সোহাগ করিবে, তোমার সংসারেই তোমাকে তাহার দাসী বাঁদীর মত হইয়া থাকিতে হইবে। তোমাকে হুকু কথা

## ❧শ্রীমন্ত❧

বলিতেছি মা, রাগ হইওনা । এখনো সাবধান হও, না হইলে পরিণামে বড়ই বিপদে পড়িবে,—এখন হয়ত আমার কথা তোমার কাণে ভাল ঠেকিবেনা, কিন্তু দাসীর কথা বাসী হইলে কাজে লাগিবে ।”

লহনা দুর্বলার কথা শুনিয়া সত্যসত্যই মনে বড় ভয় পাইল ; সে ভাবিল, স্বামী দেশে ফিরিয়া আসিয়া তাহাকে হয়ত আর শুনজরে দেখিবেনা, খুল্লনাকেই ভাল বাসিবে । সে দুর্বলাকে বলিল, “আমি এতদিন বুঝিতে পারি নাই, তুমি আজ আমার পরম উপকার করিলে । চল আমার সেই লীলাবতীর বাড়ী যাইয়া তাহাকে ইহার উপায় জিজ্ঞাসা করি ।”

তাহারা দুইজনেই যাইয়া লীলাবতীর বাড়ী উপস্থিত হইল । লীলা বহুদিন পরে সইকে দেখিয়া তাহাকে হঠাৎ এমন সময়ে উপস্থিত হওয়ার কারণ জিজ্ঞাসা করিল । লহনা বলিল, “ভাই সই, আমায় এমন একটা উপায় বলিয়া দাও, আমি বাহাতে খুল্লনাকে স্বামীর দুই চোখের বিষ করিয়া দিতে পারি । সাধু গোড় হইতে ফিরিয়া আসিয়া খুল্লনার রূপে ভুলিয়া গিয়া আমাকে আর আগের মতন দেখিবেন না, আমার যে কপাল তাহা হইলে পুড়িয়া যাইবে ভাই । তুমি আমায় একটা উপায় করিয়া দাও ।”

লীলাবতী বলিল, “সেটা সত্যি কথা সই, সতিনের বড় জ্বালা । আমি তোমাকে একটা উপায় বলিয়া দেই, যদি

তুমি খুল্লনাকে সামান্য কিছু খাবার দিয়া খুব কষ্টে রাখ, তাহা হইলে অমন রূপ আর তাহার থাকিবেনা। সাধুও তাহা হইলে আর তাহাকে অত ভালবাসিবেন না। আমি সাধুর নামে তোমার কাছে একখানা চিঠি লিখিয়া দিতেছি, সাধু যেন গোড় হইতে তোমাকে লিখিতেছেন,—পিঞ্জর তৈরী করাইবার জন্য অনেকদিন আমাকে গোড় নগরে থাকিতে হইবে। কবে যে বাড়ী ফিরিব তাহার ঠিক নাই। পিঞ্জরের জন্য কিছু সোনার অভাব হইয়াছে, তুমি খুল্লনার গায়ের সমস্ত সোনার অলঙ্কার খুলিয়া আমাকে তাহা পাঠাইয়া দিবে, আর তাহাকে একখানা ছেঁড়া ময়লা কাপড় পরাইয়া ছাগল চড়াইতে নিযুক্ত করিবা, আমার ঘরে সে যেন আর শুইতে না পারে, তাহাকে ঢেঁকা শালায় শুইতে দিও। আমার এই আদেশ যদি তুমি পালন না কর তবে আমি বাড়ী আসিয়া তোমার মাথা মুড়াইয়া আমার বাড়ী হইতে তাড়াইয়া দিব।” লীলাবতী অনেক চেষ্টা করিয়া ধনপতির হাতের লেখার মত করিয়া চিঠিখানা লিখিয়া লহনার হাতে দিল, লহনা সন্তুষ্ট হইয়া তাহা লইয়া বাড়ী ফিরিল।

বাড়ী আসিয়া লোক-দেখানো চোখের জল ফেলিতে ফেলিতে খুল্লনার কাছে গিয়া সে একেবারে কাঁদিয়া ফেলিল। খুল্লনা তাহাকে কাঁদিতে দেখিয়া জিজ্ঞাসা করিল, “কি হইয়াছে দিদি ? তুমি কাঁদ কেন ?”

## ✽শ্রীমন্ত✽

“সাধুর মতিগতি এমন কেন হইল, তোর কপাল পুড়িয়াছে বোন, এই ছাখ্ তাঁর চিঠি”—এই বলিয়া লহনা খুল্লনাকে চিঠিখানা দেখাইল। খুল্লনা ভয়ে ভয়ে চিঠিখানা পড়িয়া শেষে একেবারে হাসিয়া কুটপাট্ হইয়া বলিল, “আচ্ছা পাগল দেখ্ছি তুমি দিদি, কে যেন ঠাট্টা করিয়া আমাকে একটু কাদাইয়া মজা দেখিবার জন্য এই কাণ্ড করিয়াছে, এজন্য তুমি ভাবিওনা। সাধুর হাতের লেখা আর এ লেখায় যে আকাশ পাতাল তফাৎ রহিয়াছে, তাহাও কি দেখিতেছনা?”

লহনা বলিল, “সাধুর কি আর অবসর আছে যে তিনি নিজের লিখিবেন, মুহুরি দিয়া লিখাইয়া দিয়াছেন, ইহাতে অবিশ্বাসের আর কিছুই নাই।”

খুল্লনা বলিল, “তুমি যে অবাক করিলে দিদি, এমন চিঠি কি কখনো কেহ মুহুরি দিয়া লেখায়? আমার কি অপরাধ যে তিনি আমাকে বিনাহ করিয়া আনিতে আনিতেই এমন সাজার ব্যবস্থা করিবেন?”

লহনা বলিল, “তুই আসিতে আসিতেই সাধুকে ঘর বাড়ী ছাড়িয়া বিদেশে গাইতে হইল, তুই খন্ড কপালী, রাক্ষস-গণী, তাই তোর উপর সাধুর এত রাগ।”

লহনার কথা শুনিয়া খুল্লনার বড় রাগ হইল, সে বলিল “দ্যাখো দিদি, তোমার মুখে যা’ আসে তাই যে বল, ভাবিয়া চিন্তিয়া কথা বলিও কিন্তু!”

লহনা তৎক্ষণাৎ খুল্লনার চুলের মুঠা ধরিয়া তাহাকে গালে মুখে পিঠে কিল চড় ঠোণা মারিতে মারিতে শোয়াইয়া ফেলিয়া বলিতে লাগিল, “কি হারামজাদো, ছোট মুখে বড় কথা ! আসিতে না আসিতেই যে আমার উপর চোখ রাঙানি দেখিতেছি ! সাধু আমাকে যাহা করিতে লিখিয়াছেন আমি তাহা করিবই, তারপর যাহা সাধ্য থাকে করিস্ ।”

লহনার অমন মার আর খুল্লনা সহ্য করিতে পারিলনা । সে দুর্বলার হাতে পায়ে ধরিয়া কাঁদিয়া বলিল, “যা দুর্বলা, আমার বাপের বাড়ী যাইয়া আমার এ দুঃখের খবরটা তাহা-দিগকে দিয়া আয়, আমি যে আর এ জ্বালা সহ্য করিতে পারিনা, তাহারা যেন আসিয়া আমাকে লইয়া যায় ।”

দুঃসমিতি দুর্বলা বলিল, “আমি যদি এখনই গিয়া তাহাদিগকে এ খবরটা দেই তবে লহনা নিশ্চয়ই আমাকেও অপমান করিবে । তার চাইতে তুমি এক কাজ কর, এটা যখন স্বামীর আদেশ, তখন তুমি অন্ততঃ কিছুদিন না হয় তাঁহার কথামত কাজ কর । স্বামীর আদেশ লঙ্ঘন করিতে নাই তাহাতে নরক ভোগ হয় । জানত, রামের কথায় সীতা বনবাসে গিয়াছিলেন । তুমি দিন দুই চারি ছাগল চড়াও, আমি একদিন অবসর মত যাইয়া তোমার বাপের বাড়ী খবর দিয়া আসিব ।”

খুল্লনা দুর্বলার কথা শুনিয়া ভাবিল’ সত্য সত্যই যদি



## শ্রীমন্ত

ইহা স্বামীর আদেশ হয়, তবে তাহা পালন না করা বড়ই অধর্মের কাজ হইবে।.....সে অনেক ভাবিয়া চিন্তিয়া ছাগল চড়াইতে স্বীকৃত হইল।

লহনা খুল্লনার গায়ের সমস্ত অলঙ্কার ও পরণের কাপড় খুলিয়া লইয়া তাহাকে একখানা অতি ময়লা ছেঁড়া কাপড় পরিতে দিল। খুল্লনা অতি কষ্টে কোনও রকমে তাহা পরিল। তারপর লহনা ছাগলগুলি গণিয়া হিন্দাব করিয়া প্রত্যেকটার গায়ে কালি দিয়া চিহ্ন করিয়া খুল্লনাকে দিল, ভয় পাছে খুল্লনা বনের ভিতর এক আধটা হারাইয়া আসে, বা অন্য কাহারও সাপে বদলাইয়া যায়।

খুল্লনা, ধনপতির বড় আদরের খুল্লনা,...বাপ মায়ের বড় সোহাগের ধন খুল্লনা, ছেঁড়া ন্যাকড়া পরিয়া হাতে লাঠি লইয়া মাথায় কচুর পাতা দিয়া চোখের জল ফেলিতে ফেলিতে ছাগলের পাল তাড়াইয়া লইয়া মাঠের দিকে চলিল। দুই ছাগলের দল পথে যাইতে যাইতে ফসলের ক্ষেত দেখিয়া তাহা খাইবার জন্য ছুটাছুটি করিয়া সেই দিকে যাইতে লাগিল। কৃষকদের গালিগালাজ সহ্য করিয়া রোদে পুড়িয়া ঘামে ভিজিয়া অভাগী খুল্লনা ছাগল তাড়াইয়া লইয়া চলিল। পথে একটা নদী পড়িল, ছাগলগুলিকে তাহার কোলে করিয়া একে একে পার করিতে হইল। মাঠে যাইয়া ছাগলগুলি এদিক ওদিক ছুটাছুটি করিয়া বেড়াইতে লাগিল। খুল্লনা তাহাদের

পেছনে পেছনে ছুটিয়া সেগুলিকে তাড়াইয়া দলের ভিতর আনিতে লাগিল। হায়, অমন কোমল সোনার শরীরে সে কষ্ট সহ্য হইবে কেন ? তাহার পা কুশের অঙ্কুরে রক্তাক্ত হইয়া গেল, মাথা ঘুরিতে আরম্ভ করিল, সারাগায়ে দর দর করিয়া ঘাম ঝরিতে লাগিল, ক্ষুধায় তৃণায় তাহার শরীর অবসন্ন হইয়া আসিল।

সন্ধ্যায় সে ছাগল তাড়াইয়া বাড়ী লইয়া আসিয়া তাহাদিগকে ঘরে বন্ধ করিল। লহনা একটা একটা করিয়া ছাগল গণিয়া লইল। তারপর খুল্লনা কচুর পাতা পাতিয়া খাইতে বসিল। লহনা তাহাকে কাকর ভরা ক্ষুদের জাউ, কলমীর শাক, ডালের বড়া, ও ডুমুরের ফল চচ্চড়ী আনিয়া তাহাকে দিল,—তাহাতে না আছে তেল, না আছে নুন ! খুল্লনা পেটের ক্ষুধায় তাহাই আধ পেটা খাইয়া উঠিয়া পড়িল। রাত্রিতে ঢেকী-শালে খড় পাতিয়া খড়ের বলিশ মাথায় দিয়া কোনও রকমে রাত্রি কাটাইল। ভোরে উঠিয়া আবার ছাগল লইয়া চলিল। এমনি করিয়া হতভাগিনী খুল্লনার দিন কাটিতে লাগিল। কি শীত, কি গ্রীষ্ম, কি বর্ষা, তাহাকে এমনি করিয়া প্রতিদিন ভোরে উঠিয়া ছাগল লইয়া বাহরে যাইতে হইত, আর সন্ধ্যার সময় ফিরিতে হইত। সে বনে বৃক্ষ, লতা, ফুল, পাতা, পাখী, ভ্রমর যাহা দেখিত তাহারই কাছে সে চোখের জলে ভাসিতে ভাসিতে দুঃখের কথা বলিত, কিন্তু হায়, তাহার দিকে যে কেহই ফিরিয়া চাহিতনা, বা একটা মিষ্ট কথাও বলিতনা।

এক দিন খুল্লনা ছুপুর বেলা বনের ভিতর ছাগল ছাড়িয়া  
 দিয়া গাছের শীতল ছায়ায় মৃদু বাতাসে ঘুমাইয়া পড়িয়াছে,  
 গভীর ঘুম ; ছাগলেরা নূতন ঘাস ও কচি পাতার লোভে এদিক  
 ওদিক চলিয়া গিয়াছে। এমন সময় মা ভগবতী দেব-কন্যা  
 দিগকে লইয়া সেই বনে আসিয়া উপস্থিত হইলেন। বনের  
 এক ধারে একটা সুন্দর সরোবর ছিল, ভগবতী দেব-কন্যা-  
 দিগকে সেই সরোবরের ধারে তাহার পূজা করিতে বলিয়া  
 তিনি স্বয়ং খুল্লনার মাতা রম্ভাবতীর বেশ ধরিয়া তাহার শিয়রে  
 বসিয়া কাঁদিয়া কাঁদিয়া বলিতে লাগিলেন, “বাছা খুল্লনা, আমি  
 তোরা মা রম্ভাবতী, তোরা কপালে যে আরও কত কষ্ট  
 আছে মা, তুই বনে ছাগল ছাড়িয়া দিয়া এখানে ঘুমাইয়া  
 পড়িয়াছিস্, তোরা সন্দর্শী ছাগল যে বাঘে খাওয়া ফেলিয়াছে।  
 আজ বাড়ী গেলে লহনা তোকে ছাগলের জন্য খুন করিয়া  
 ফেলিবে।—এই বলিয়া দেবী অন্তহিত হইলেন। স্বপ্ন দেখিয়া  
 খুল্লনা তাড়াতাড়ি উঠিয়া বসিয়া মাকে দেখিবার জন্য চারিদিকে  
 চাহিল, কিন্তু কোথায় মা, কেহই যে নাই ? চারিদিকে শুধু  
 বন। মাকে না দেখিয়া তাহার বুক ফাটিয়া কাশা আসিতে  
 লাগিল। কিন্তু হায়, একটু কাল কাঁদিয়া বুকটা পাতলা





করিবার অবসরও যে ভগবান তাহাকে দেন নাই। সর্ব্বশী ছাগল বাঘে খাওয়ার কথা তাহার মনে পড়িল, সে তাড়াতাড়ি উঠিয়া ছাগল খুঁজিতে লাগিল, সব ছাগলই খুঁজিয়া পাইল, কিন্তু সর্ব্বশীকে আর পাইল না। তাহার ঘুম শুকাইয়া গেল, আজ বাড়ী গেলে লহনার হাতে আর রক্ষা নাই। সর্ব্বশীকে ডাকিতে ডাকিতে সে সারা বন ঘুরিয়া বেড়াইতে লাগিল, কিন্তু কোথাও তাহার দেখা পাইল না। দূরে উলুর শব্দ শুনিয়া সে মনে ভাবিল, কাহারো বুঝি সর্ব্বশীকে বলি দিতেছে। সেই শব্দ লক্ষ্য করিয়া সে যাইয়া সরোবর তীরে উপস্থিত হইল। সেখানে পাঁচ জন দেবকন্যা ভগবতীর পূজা করিতেছিলেন, কিন্তু খুল্লনা তাঁহাদিগকে দেবকন্যা বলিয়া চিনিতে পারিল না। সে তাঁহাদিগকে তাহার ছাগলের কথা জিজ্ঞাসা করিল। তাঁহারা বলিলেন, “আমরা তোমার ছাগল দেখি নাই!..... তুমি কি দুঃখে এমন বনে বনে ঘুরিয়া বেড়াও? আমাদের কাছে যদি সত্য কথা বল তবে তোমার সকল দুঃখ ঘুচাইব, কিন্তু মিথ্যা কথা বলিলে আরও বেশী দুঃখে পড়িবে।”

খুল্লনা দেবকন্যাদের কাছে তাহার সমস্ত দুঃখের কথা বলিল। তাঁহারা বলিলেন “আমরা এই পাঁচ বোন দেবরাজ ইন্দ্রের কন্যা, ভগবতীর পূজা করিবার জন্য এখানে আসিয়াছি। তুমি যদি প্রতি মঙ্গলবারে তাঁহার পূজা কর, তবে তোমার সকল দুঃখ ঘুচিবে, লহনা আর তোমাকে কোনও কষ্ট

## ✽শ্রীমন্তঃ

দিবেনা, স্বামী প্রাণের চেয়ে বেশী ভালবাসিবে, তুমি ছেলের মা হইয়া স্নেহে ঘরকন্না করিতে পারিবে।”

খুল্লনা বলিল, “আমিত জানিনা, কি রূপে পূজা করিতে হয়, যদি আপনারা দয়া করিয়া বলিয়া দেন তবে আমি ভগবতীর পূজা করিব।”

তখন দেব-কন্যা তাহাকে একখানা ভাল কাপড় দিলেন। খুল্লনা সরোবরে স্নান করিয়া সেই কাপড় পড়িয়া তাঁহাদের সহিত মিলিয়া পরম ভক্তিসহকারে মা মঙ্গলচণ্ডীর পূজা করিলেন।

এমন সময় ভগবতী ব্রাহ্মণীর রূপ ধারণ করিয়া সেখানে আসিয়া তাহাকে ছলনা করিব'র জন্ত বলিতে লাগিলেন, “তুমি কেন ভগবতীর পূজা কর ? আমি বার বৎসর পূজা করিয়াও কোনই ফল পাই নাই, আর ভগবতী কি তোমাকে দয়া করিয়া বর দিবেন ?”

খুল্লনা বলিল, “ব্রাহ্মণি, তুমি ভগবতীর নিন্দা করিও না। আমি তাঁহার পূজা করিবই।”

খুল্লনার ভক্তি ও বিশ্বাস দেখিয়া ভগবতী পরম সন্তুষ্ট হইয়া ব্রাহ্মণীর বেশ পরিত্যাগপূর্বক সহসা ভগবতীর রূপ ধারণ করিয়া বলিলেন, “বাছা খুল্লনা, আমিই সেই মঙ্গলচণ্ডী ভগবতী, আমি তোমার পূজা ও ভক্তিতে বড়ই সন্তুষ্ট হইয়াছি। তুই প্রতি মঙ্গলবারে আমার পূজা করিস্, তাহা হইলেই

তামি তোর সকল দুঃখ দূর করিব। আমি তোকে বর দিতেছি, সংসারে তোর আর কোনও দুঃখ থাকিবে না, স্বামী তোকে লহনার চেয়েও বেশী ভাল বাসিবে, তুই সোনার চাঁদ ছেলের মা হইবি।”.....এই বলিয়া তিনি অন্তর্হিত হইলেন। খুল্লনার ছাগলের পাল আসিয়া সেখানে হাজির হইল; সে দেখিল, তাহার হারাণো সর্বদশী ছাগলও সাথে সাথে আসিয়াছে। সেই রাত্রিতে খুল্লনা আর বাড়ী ফিরিল না, দেব-কন্যাদের সাথে বনেই ভগবতীর পূজায় আনন্দে কাটাইয়া দিল।

ভগবতী সেখান হইতে গিয়া লহনাকে স্বপ্ন দেখাইলেন, “ছিছি, লহনা, এমন নিষ্ঠুর তুই! স্বামী খুল্লনাকে তোর হাতে সঁপিয়া দিয়া গিয়াছে, আর তুই তাহাকে ছাগল চড়াইতে বনে পাঠাইয়া দিয়াছিস্, পেট ভরিয়া খাইতে পর্য্যন্ত দিস্না! সদাগর বাড়ী ফরিয়া আসুক, তোর দুর্গতির সীমা থাকিবেনা। সতিন বলিয়া কি তাহাকে অমন কষ্টই দিতে হয়? তুই নিশ্চিত মনে স্নেহে ঘরে শুইয়া ঘুমাইতেছিস্, আর খুল্লনা বাঘ ভালুকে ভরা বনে রাত্রি কাটাইতেছে, এই পাপ হইতে তুই রক্ষা পাইবিনা! যে জন্তু খুল্লনাকে এত কষ্ট দিতেছিস্ তোর সে আশায় ছাই পড়িবে।”

প্রভাতে স্বপ্ন দেখিয়াই লহনা জাগিয়া উঠিল, তাহার সমস্ত গা ছম্ ছম্ করিতে লাগিল, ভয়ে গলা শুকাইয়া গেল।



## ❧শ্রীমন্ত❧

সে দুর্ব্বলাকে বলিল, “দুর্ব্বলা আমি আজ বড়ই খারাপ স্বপ্ন দেখিয়াছি। তোর কথায় আমি কি পাপ কাজে মতি দিয়া-ছিলাম! খুল্লনাকে আমি কতইনা কষ্ট দিয়াছি, আমার এ কলঙ্কের কথা যে শুনিলে সে-ই যে ছিছি করিবে। কাল ভোরে খুল্লনা ছাগল লইয়া গিয়াছে, আজ এখনো তাহার দেখা নাই, এক বছর হইতে চলিল, কোনও দিন ত এমন হয় না। তাহাকে কি সাপে বাঘে খাইল, না সে চোর ডাকাতের হাতে পড়িল? সাধু গোড়ে যাইবার সময় তাহাকে আমার হাতে তুলিয়া দিয়া গিয়াছিলেন, আর আমি এমন করিয়া তাহার সর্ব্বনাশ করিলাম। তুই-ইত আমায় এই দুর্ব্বুদ্ধি দিয়াছিল দুর্ব্বলা? আমি কি বলিয়া সাধুর কাছে মুখ দেখাইব? কাকা কাকীমা যখন আমাকে খুল্লনার কথা জিজ্ঞাসা করিবে তখন আমি তাহাদিগকে কি বলিব?” খুল্লনার জন্ত মন বড়ই উদ্বিগ্ন হইয়া উঠিল, এক তিলও আর সে বাড়ীতে টিকিতে পারিল না। খুল্লনা রোজ যে পথে ছাগল লইয়া যায়, সেও সেই পথ ধরিয়া যাইতে লাগিল।

পথেই খুল্লনার সহিত তাহার দেখা হইল। খুল্লনাকে দেখিবামাত্রই সে তাহাকে বৃকের মধ্যে জড়াইয়া লইয়া বলিল, “আমায় ক্ষমা কর্ বোন, আমি লোকের কথায় তোকে এত কষ্ট দিয়াছি। এক সংসারে থাকিলে ঝগড়া বিবাদ এক আধটু হইয়া থাকে এজন্য মনে কিছু করিস্না। আমি তোর

বড় বোন, আমায় ক্ষমা কর। কাল রাত্রিতে তুই বাড়ী ফিরিস্ নাই, এজন্য সারারাত আর চোখের পাতা ফেলিতে পারি নাই, কেবল কাঁদিয়াই কাটাইয়াছি। চল খুল্লনা শীগ্গীর বাড়ী চল। আর তোকে ছাগল চড়াইতে দিব না।” এই বলিয়া লহনা খুল্লনাকে বাড়ী লইয়া আসিল। বাড়ী আসিয়া নিজ হাতে তাহাকে গন্ধ তেলে স্নান করাইয়া ভাল কাপড় ও গহনা পরাইল। খুল্লনা লহনার এত আদর দেখিয়া ভক্তিভরে মনে মনে মা মঙ্গলচণ্ডীকে প্রণাম করিল। যে খুল্লনাকে লহনা এই একটা বছর ক্ষুদের ঝাউ ও শাক চর্চড়ী ছাড়া আর কিছুই খাইতে দেয় নাই, আজ তাহার জন্ম সেকত রকম রান্ধাই রান্ধিল, তাহাদের নাম শুনিলে তোমাদের জিভ জলে ভরিয়া আসিবে, বই পড়াই আর হইবেনা, কাজেই সে সব নাম আর করিলামনা। তাহারা দুই জনেই এক থালায় বসিয়া খাইয়া এক বিছানায় শুইয়া কত কথাই বলিতে লাগিল।

৭

ধনপতি পিঞ্জর লইয়া দেশে ফিরিলেন। সোনার পিঞ্জর দেখিয়া সারা নগরময় একটা মহা আনন্দের সাড়া পড়িয়া পড়িয়া গেল। দুর্বলা লোকের নিকট সাধুর দেশে ফিরিবার

## ❧ শ্রীমন্ত ❧

কথা শুনিয়া তাড়াতাড়ি খুল্লনার নিকট গিয়া বলিল, “ছোট মা, সাধু দেশে ফিরিয়াছেন। এখনই তিনি রাজসভা হইতে বাড়ী আসিবেন। লহনা তোমাকে যত কষ্ট দিয়াছে সাধুর কাছে তাহার দশগুণ বাড়াইয়া বলিয়া তাহাকে সাধুর দুই চোখের বিষ করিয়া দিও। সতিনের যত সর্বনাশ করিতে পারিবে, ততই তুমি সুখে থাকিবে। আমি তোমারই দাসী, আমাকে যাহা করিতে বলিবে তোমার জ্ঞা আমি তাহাই করিব। তোমাকে যে লহনা কষ্ট দিয়াছে তাহাতে আমার এতটুকু দোষও নাই, আমি তাহাকে কত মানা করিলাম, কত হাতে পায়ে ধরিয়া কাঁদিলাম, কিন্তু সে আমার কোনও কথাই শুমিল না; বলিব কি ছোট মা, তোমার দুঃখ দেখিয়া আমার বুক ফাটিয়া যাইতে লাগিল। আহা, অমন সোনার স্নেহের শরীরে কি অত কষ্ট সহ্য? সতিন হ’লে কি আর অমন ক’রেই সাজা দিতে হয় মা? লহনার শরীরে যেন বিধাতা-পুরুষ এক তিল দয়া মায়াও দেন নাই। আমাদের ছোট লোকের ঘরেও কিন্তু এমন হয় না। এসো, তোমাকে আমি ভাল করিয়া সাজাইয়া দেই, সে সাজ দেখিয়া যেন সাধু মোহিত হইয়া যান, লহনাকে যেন আর দু’চক্ষে দেখিতে না পারেন।” এই বলিয়া দুর্বলা খুল্লনাকে সাজাইতে বসিল।

খুল্লনার বেশভূষা করিয়া দিয়া দুর্বলা লহনার কাছে গিয়া বলিতে লাগিল, “শুনিয়াছ বড় মা, সাধু যে দেশে ফিরি-

যাচ্ছেন। খুল্লনা সে খবর পাইয়া আহ্লাদে আটখানা হইয়া কত রকম সাজপোষাক পড়িয়া যে বসিয়াছে তাহার অন্ত নাই, আমিত তাহার কাণ্ড দেখিয়া হাসিয়া অবাক ! লজ্জা সরম কি তার একেবারেই নাই ? ছি ছি বড় মা, আমি ঘেম্মায় ম'রে যাই ! তুমি সতিন হলেও তার ত বড় বোন, তোমার কাছে তার একটু চক্ষুলজ্জা থাকা দরকার।”

সদাগর বাড়ী আসিলেন। খুল্লনা যাইয়া তাঁহাকে প্রণাম করিয়া আসিল, কিন্তু কথাবার্তা কিছুই বলিল না। লহনা যাইয়া বলিল, “তুমি খুল্লনাকে আমার হাতে দিয়া গিয়াছিলে, এই এক বৎসর আমি নিজে না খাইয়া ভাল জিনিষটুকু তাহাকে খাওয়াইছি, নিজের ভাল ভাল কাপড় গহনা যাহা তুমি আমাকে দিয়াছিলে তাহা সবই আমি তাহাকে পরাইয়াছি। কোনও কক্ষে আমি তাহাকে রাখি নাই, শত হইলেও ছোট বোন ত। কিন্তু পোড়া কপাল আমার, আমার কাজের কি আর সুনাম আছে ? এত করিয়াও আমি তাহার মন পাই নাই, সে পাড়ায় পাড়ায় আমার নিন্দা করিয়া বেড়াইয়াছে। আমার কথায় বিশ্বাস না হয়, দুর্ব্বলাকে জিজ্ঞাসা করিয়া দেখ। সংসারের যত কাজ সবই আমি করিতাম, খুল্লনা জানেনা যে কেমন করিয়া উনানে একটা ফুঁ দিতে হয়, কেবল সে দিন রাত পাশা খেলিয়া বেড়ায়। নাওয়া খাওয়ার সময় পর্য্যন্ত তাহার জ্ঞান থাকিত না, আমি

নিজে তাহার গা মাথা ঘষিয়া স্নান করাইয়া দিতাম, কিন্তু তবু সে আমার দুর্নাম রটাইয়া বেড়াইত !” সদাগর লহনার কথায় পরম সন্তুষ্ট হইয়া তাহাকে একটা হীরার হার পুরস্কার দিলেন ।

সাধু লহনাকে বলিলেন, “লহনা, আমি খুল্লনাকে বিবাহ করিয়া আনিয়াই গোড়ে চলিয়া গিয়াছিলাম, তাহার হাতের রান্নাও আমি এক দিনও খাই নাই, আজ খুল্লনা রাঁধুক ।”

লহনা দুই চোখ কপালে তুলিয়া বলিল, “ওমা, তুমি বল কি ? তাহার হাতের রান্না কি তুমি মুখে দিতে পারিবে ? সে যে ভাত পর্য্যন্ত কোনো দিনও রাধিয়া দেখে নাই । আমি যে অমন রাঁধি, পাড়ার সবাই শতমুখে আমার রান্নার সুখ্যাতি করে, কোনো কোনো দিন আমার সে রান্না অবধি মুখে রোচেনা তোমার, তা’ খুল্লনার রাঁধা কি আর ভাল লাগিবে ? এক বৎসর পরে বিদেশ হইতে আসিয়াছ, আজ আমিই রাঁধি ।”

সাধু হাসিয়া বলিলেন, “না, আজ খুল্লনাই রাঁধুক ।”

খুল্লনা স্নান করিয়া মনে মনে ভগবতীকে ডাকিয়া পাকশালে গেল । ভগবতী আসিয়া তাহার মাথায় হাত দিয়া বর দিলেন, সে বাজা রাঁধিবে তাহা লোকে অমৃত বলিয়া খাইবে,—এমন রান্না কেহ কোনো দিন খায় নাই । ভগবতীর বর পাইয়া খুল্লনা পরম আনন্দে রাঁধিতে লাগিল । শাক

শুভ্র হইতে আরম্ভ করিয়া পিঠা পায়ের পর্য্যন্ত পরিপাটি করিয়া রাঁধিয়া সাধুকে খাওয়াইল। সাধু তাহা খাইয়া এমন খুসী হইলেন যে, তাঁহার মনে হইল, তিনি জীবনে এমন রান্না কোনো দিন খান নাই। তিনি শত মুখে রান্নার প্রশংসা করিতে লাগিলেন।

সাধুর খাওয়া হইলে খুল্লনা লহনাকে খাওয়ার জন্ত ডাকিল, কিন্তু সে রাগ করিয়া খুল্লনার রাঁধা কোনও জিনিষই খাইলনা। খুল্লনা তাহার হাতে পায়ে ধরিয়া কত সাধিল কিন্তু তাহার রাগ কিছুতেই পড়িল না। ঘরে, সরা দুই তিন বাসী পান্ডা ভাত ছিল, লবণ মরিচ দিয়া তাহা খাইয়াই সে সেই দিন কাটাইল।

সদাগর রাত্রিতে যাইয়া যেমন খাটে শুইলেন, অমনি ভগবতী খুল্লনার ভক্তি পরীক্ষা করার জন্ত সাধুর জ্ঞান হরণ করিয়া লইলেন। খুল্লনা শয়ন ঘরে গিয়া স্বামীর পাশে বসিয়া তাঁহাকে হাত দিয়া নাড়া দিয়া দেখিল, তিনি মড়ার মত শক্ত হইয়া পড়িয়া রহিয়াছেন, খুল্লনা তাঁহার নাকের কাছে হাত লইয়া দেখিল, নিশ্বাসও বন্ধ। তখন সে স্বামীর পায়ের কাছে লুটাইয়া পড়িয়া কাঁদিতে কাঁদিতে ভগবতীকে ডাকিতে লাগিল। সে মনে স্থির করিল, বিষ খাইয়া সেও স্বামীর সাথে মরিবে। ভগবতী খুল্লনার ভক্তি দেখিয়া সাধুর জ্ঞান ফিরাইয়া দিলেন। সাধু চোখ মেলিয়া চাহিতেই খুল্লনা লজ্জায় মাথার কাপড়

টানিয়া দিয়া ঘরের কোণে যাইয়া জড়সড় হইয়া লুকাইয়া রহিল। ধনপতি অনেক সাধ্য সাধনা করিয়া তাহাকে কাছে আনিলেন। খুল্লনা তখন অভিমান করিয়া বলিতে লাগিল, “তোমার এ ভালবাসা কেবল মুখে মুখে। তাহা না হইলে গোড়ে যাইয়া লহনা দিদির কাছে অমন করিয়া চিঠি লিখিয়াছিলে কেন? তোমার চিঠি পাইয়া দিদি আমার সমস্ত গহনা কাড়িয়া নিয়া একখানা ছেঁড়া কাপড় পরিতে দিয়া ছাগল চড়াইবার জন্য পাঠাইয়া দিয়াছিল। পেট ভরিয়া খাইতে দেয় নাই, ঢেকীশালে একখানা ছেঁড়া মাদুর পাতিয়া শুইয়া রাত কাটাইয়াছি। ভোরে উঠিয়া ছাগল লইয়া বাহির হইয়াছি, সারাদিন পরে বাড়ী ফিরিয়া আসিয়া ক্ষুদের জাউ আব শাক আধপেটা খাইয়া শুইয়া রহিয়াছি। একটা বছর আমার এমনি দুঃখে কষ্টে গিয়াছে। যদি তোমার মনে আমাকে সাজা দিবার ইচ্ছা ছিল, তুমি নিজ হাতে দিলেই আমি তাহা হাসি মুখে মাথা পাতিয়া লইতাম। তাহা না করিয়া তুমি সতিনের হাতে আমায় অমন যাতনা দিলে, তোমার স্ত্রী হইয়া আমি বনে বনে ছাগল চড়াইয়া বেড়াইয়াছি, ইহাতে কি তোমার গৌরব বড় বাড়িয়াছে? তার চাইতে আমার মরণও যে ভাল ছিল। বারটা মাস আমি যে কি কষ্টে কাটাইয়াছি তাহা শোন,—জ্যৈষ্ঠ মাসে তুমি খাঁচা তৈরী করিতে গোড়ে গেলে, আমিও সেই মাসে ছাগল

চড়াইতে বনে গেলাম । আষাঢ় মাসে সমস্ত আকাশ নূতন মেঘে ঢাকিল, অনবরত বৃষ্টি হইতে লাগিল, ছাগল চড়াইতে যাইয়া কত যে জোঁকে আমাকে খাইল তাহার শেষ নাই, কিন্তু আমার কপাল মন্দ তাই সাপে খাইল না, খাইলে আর এ যন্ত্রণা ভোগ করিবে কে ? শ্রাবণ মাসে দিনরাত বৃষ্টির অবসর নাই, আমি সেই বাদল মাথায় করিয়া কচু পাতায় মাথা ঢাকিয়া বনে বনে ছাগল চড়াইয়া বেড়াইতাম । ভাদ্র-মাসে মাঠ ঘাট সব জলে জলময় হইয়া গেল, আমি কোলে করিয়া ছাগল পার করিয়া মাঠে লইয়া যাইতাম । আশ্বিন মাসে লোকে মনের আনন্দে কত নূতন কাপড় নূতন গহনা পরে, কিন্তু আমি না খাইয়া ছেঁড়া কাপড় পরিয়া বনে বনে ছাগল চড়াই । শীতের কয়টা মাস আমি যে কি কষ্টে কাটাইয়াছি, তাহা তুমি হয়ত শুনিলে বিশ্বাস করিবে না ; ঢেকীশালে খড় পাতিয়া একথানা ছেঁড়া কাপড় গায়ে দিয়া শীতে ঠক্ ঠক্ করিয়া কাঁপিতে কাঁপিতে আমাকে কাটাইতে হইত, শীত সহ করিতে না পারিয়া আগুণ জ্বালিতাম, সতিনের চেয়ে আমার অত সুখ সহ হইত না, সেই জন্য সে তাহাতে জল ঢালিয়া দিত ।”—সদাগর তাহাকে বাধা দিয়া বলিলেন, “থাক্, খুল্লনা, আর বলিতে হইবে না । কিন্তু কই, আমি লহনাকে তেমন কোনও চিঠি লিখি নাই, তুমি বুঝি ঠাট্টা করিয়া এসব মনগড়া কথা বলিতেছ ।”



“এই দেখ, তোমার হাতের লেখা চিঠিই আমি ষড় করিয়া রাখিয়া দিয়াছি,” এই বলিয়া খুল্লনা চিঠিখানা সদাগরের হাতে দিল। সাধু চিঠি পড়িয়া লহনার উপর রাগে জ্বলিয়া উঠিলেন, তাঁহার বুকিতে বাকি রহিল না যে, লহনা কেবল খুল্লনাকে যন্ত্রণা দেওয়ার জন্য এই জাল ছিঠি তৈরী করিয়া এত ষড়যন্ত্র করিয়াছে। তিনি খুল্লনাকে অনেক প্রবোধ দিয়া শাস্ত করিয়া বলিলেন, “তুমি এজন্য দুঃখ করিও না, খুল্লনা, আমি লহনাকে ইহার উপযুক্ত শাস্তি দিব।

b

কিছুদিন পরে সদাগর তাঁহার পিতার বার্ষিক শ্রদ্ধ উপলক্ষে দেশ বিদেশে স্বজাতিদিগকে নিমন্ত্রণ করিলেন। তাঁহারা আসিয়া ছুঁতা ধরিয়া বসিল, ধনপতির বাড়ী কেহ খাইবে না, কারণ তাঁহার স্ত্রী খুল্লনা বনে বনে ঘুরিয়া ছাগল চড়াইয়াছে। সীতাদেবী যেমন অগ্নি পরীক্ষা দিয়াছিলেন, যদি খুল্লনা তেমন পরীক্ষা দিতে পারে তবে তাহারা খুল্লনার চরিত্রে নিঃসন্দেহ হইয়া ধনপতির বাড়ীতে খাইবে। অথবা যদি ধনপতি এক লক্ষ টাকা দিতে পারেন তবে আর খুল্লনাকে পরীক্ষা দিতে হইবে না। তাহাদের কথা শুনিয়া ধনপতির মাথায় আকাশ ভাঙ্গিয়া পড়িল, সীতা ছিলেন দেবী, তিনি যে

পরীক্ষা দিয়াছেন মানুষের সাধ্য কি সে পরীক্ষা দিতে পারে ? তিনি ঘরে যাইয়া লহনাকে তাহার অগ্নায় কপ্তের জন্য তিরস্কার করিতে লাগিলেন । খুল্লনা সে কথা শুনিয়া ধনপতিকে বলিল, “তোমার কোনও চিন্তা নাই, আমি পরীক্ষাই দিব, যদি আমি সত্যী হই তবে অগ্নি পরীক্ষায় আমার একগাছি চুল ও পুড়িবেনা ।”

ধনপতি বলিলেন, “আমার ত বড়ই ভাবনা হইয়াছে । মানুষের কি সাধ্য আছে যে, সে পরীক্ষায় উত্তীর্ণ হইতে পারে ? তুমি হয়ত পুড়িয়া মরিয়া যাইবে, আর আমার বংশের দুর্নামও যাইবে না । কাজেই তাহা না করিয়া এক কাজ করা যাউক, এক লক্ষ টাকাই দেই ।”

খুল্লনা বলিল, “আজ যদি টাকা দাও তবে তাহারা প্রত্যেক বৎসর এমন করিয়া টাকা আদায় করিবার জন্য ছুঁতা ধরিয়া বসিবে, অথচ আমার দুর্নামও যুচিবে না । আমি মনে মনে জানি, আমার মধ্যে কোনও পাপ নাই, আমি পরীক্ষাই দিব, ধর্ম আমারকে রক্ষা করিবেন । যদি তুমি আমাকে পরীক্ষা দিতে না দাও, তবে আমার এ কলঙ্কের বোঝা বহিয়া বেড়ান অপেক্ষা বিষ খাইয়া মরাও ভাল ।” ধনপতি বাধা হইয়া খুল্লনাকে পরীক্ষা দিতে সম্মত হইলেন ।

খুল্লনার পরীক্ষার আয়োজন হইল । সদাগরেরা পরামর্শ করিয়া স্থির করিল, খুল্লনাকে গালাগাল তৈরী ঘরে রাখিয়া



সদাগরেরা আর খাইতে আপত্তি করিল না। খুল্লনা  
স্বহস্তে রান্না করিয়া সকলকে খাওয়াইল। সদাগরেরা দেবীর  
হাতের রান্না খাইল মনে করিয়া পরম আহ্লাদে বাড়ী ফিরিল।

৯

কিছুদিন বেশ সুখে স্বচ্ছন্দে কাটিল। কিন্তু ভগবান  
বুঝি কেবল সুখ মানুষের কপালে লিখেন নাই। রাজা  
বিক্রমকেশরীর ভাণ্ডারে শস্ম ও চন্দনের অভাব পড়িয়া গেল।  
তিনি ধনপতিকে সিংহলে যাইয়া তাহা আনিতে আদেশ  
করিলেন। সিংহলে যাওয়ার কথা শুনিয়া সাধুর মাথায়  
যেন বাজ পড়িল; এইত সেদিন গোড়ে প্রায় এক বৎসর  
কাটাইয়া আসিলেন, এবার আবার সিংহলে যাইতে হইবে,  
তাহাও আবার সমুদ্র-পথে। সাধু জোড় হাত করিয়া রাজাকে  
বলিলেন, “মহারাজ, এইত আমি সেদিন গোড় হইতে  
আসিলাম। আপনার রাজ্যে আরও কত সদাগর আছে,  
তাহাদের একজনকে এজন্ম আদেশ করুন।” কিন্তু রাজা  
তঁাহার সে কথা শুনিলেন না। কাজেই ধনপতিকেই বাধ্য  
হইয়া সিংহলে যাইতে স্বীকার করিতে হইল। রাজা তঁাহাকে  
যাওয়ার জন্য খরচ বাবদ একলক্ষ টাকা দিতে আদেশ  
করিলেন।

লহনা যখন শুনিল, এবার সদাগরকে বহু দিনের জন্তু সিংহল যাইতে হইবে, তখন তাহার আত্মাদের সীমা রহিল না। সে দেখিয়া লইবে, খুল্লনার অত আদর সোহাগ এবার কোথায় থাকে।

সদাগরের সিংহলে যাওয়ার কথা শুনিয়া খুল্লনার মুখ-খানি একেবারে এতটুকু হইয়া গেল। সে ধনপতিকে বলিল, “তোমার অত দূর দেশে যাইয়া কাজ নাই, আমাদের ভাঙারে যে শস্ব চন্দন আছে তাহাই রাজাকে দিয়া আঁস। একবার তুমি গৌড়ে গিয়াছিলে, তখন লহনা দিদি আমাকে কত কষ্ট দিয়াছিল, এবং সেজন্তু আমাকে কতইনা লাঞ্ছনা সহ্য করিতে হইল স্বজাতিদের কাছে। এবার যদি তুমি সিংহল যাও তবে না জানি আমার কপালে আরও কত দুঃখ আছে। সেত আর দুই এক দিনের পথ নয়, সমুদ্র দিয়া কত মাসের পর মাস যাইতে হইবে। বাবার কাছে শুনিয়াছি, সে দেশ বড় খারাপ, সমুদ্রের পথে পায় পায় কত বিপদ,—জলে হাঙ্গর কুমীর তিমি মকর, ডাঙ্গায় বাঘ ভালুক, তারপর আবার চোর ডাকাতের ভয়ও আছে, মানুষ সে দেশে গেলে প্রায়ই ফিরিয়া আসে না। তোমার পায়ে পড়ি তুমি অমন দেশ যাইওনা।”

লহনা সব কথা শুনিল, শুনিয়া সে সদাগরকে বলিল, “কপাল আমাদের বড়ই মন্দ, তাহা না হইলে তোমাকে চিরকাল বিদেশেই কাটাইতে হইবে কেন? যখন রাজার আদেশ

তখন না যাইয়া কি আর রক্ষা আছে ? এজ্ঞ ভাবিয়া আর ফল নাই । শীঘ্র যাহাতে ফিরিতে পার তাহার চেষ্টা করিও । কেবল বাড়ী বসিয়া থাকিলেত আর সংসার চলিবেনা, বসিয়া খাইলে রাজভাণ্ডারও শেষ হইয়া যায় । আজ আমাদের যে টাকা পয়সা ধন দৌলত তাহা শশুর ঠাকুর বাণিজ্য করিয়াই রাখিয়া গিয়াছেন । বাণিজ্য ছাড়া আমাদের অণু উপায় নাই ।”

সদাগর গণৎকার আনাইয়া সিংহল যাত্রার জ্ঞাত ভাল দিন দেখাইলেন । সপ্তডিঙ্গা মধুকর সজ্জিত হইল । এদেশ হইতে যে যে জিনিষ সিংহলে লইয়া গেলে প্রচুর লাভ হইবে, সাত নায়ে তাহা বোঝাই করা হইল । খুল্লনা তখন ছয়মাস গর্ভবতী । সাধু তাহাকে বলিলেন, “আমি বোধ হয় বার বছরের আগে সিংহল হইতে ফিরিয়া আসিতে পারিবনা । যদি তোমার মেয়ে হয় তবে তাহার নাম শশিকলা রাখিও ও ভাল বরে বিবাহ দিও । আর যদি ছেলে হয়, তবে তাহার নাম শ্রীমন্ত রাখিয়া লেখা পড়া শিখাইও । যদি বার বৎসরের ভিতর আমি ফিরিয়া না আসি তবে তাহাকে তালাসে সাত ডিঙ্গা সাজাইয়া সিংহল পাটনে পাঠাইও ।” এই বলিয়া সদাগর খুল্লনাকে এই সব কথা একখানা কাগজে লিখিয়া দিয়া গেলেন ।

খুল্লনা যখন দেখিল, সদাগর তাহার কথা না শুনিয়া সত্য সত্যই সিংহল চলিয়াছেন, তখন সে উপায় না দেখিয়া

স্বামীর মঙ্গলের জন্য মা মঙ্গলচণ্ডীর পূজা করিতে বসিল। সে ঘট বসাইয়া ফুল বেলপাতা দূর্ব্বা ধূপ দীপ নৈবেদ্য দিয়া এক মনে পূজা করিতে লাগিল। লহনা তাহা দেখিয়া যাইয়া সদাগরকে বলিল, “দেখিয়া যাও, তোমার খুল্লনার কাণ্ড; সে কি এক ডাকিনী দেবতার পূজা আরম্ভ করিয়াছে। প্রতি মঙ্গলবারে সে উপবাসী থাকিয়া ধূপ দীপ জ্বলিয়া নৈবেদ্য সাজাইয়া এমনি করিয়া পূজা করে। জিজ্ঞাসা করিলে বলে, ‘মা ভগবতীর পূজা করি, এ পূজায় সমস্ত অমঙ্গল দূরে যায়।’ জ্ঞাতীরা ইহা দেখিয়া কত নিন্দা করে, কিন্তু সে কাহারো কথায় বড় একটা কাণ দেয়না। আমার ভয় হয়, তার জন্য তোমার উঁচু মাথা সমাজের কাছে হেঁট হইয়া যাইবে। তাহা ছাড়া সংসারে যে একটা অমঙ্গল হইবে তাহাতে সন্দেহ নাই। যে বংশে এক শিব পূজা ছাড়া অন্য কোনও পূজা কোনও কালে হয় নাই, সে বংশের বউ ডাকিনী দেবতার পূজা আরম্ভ করিয়াছে। আমার কথায় যদি তোমার বিশ্বাস না হয় তবে দেখিয়া যাও।”

ধনপতি লহনার সাথে খুল্লনার পূজার ঘরে চলিলেন। যাইতে যাইতে লহনা ভাবিল, “আজ স্বামীকে দিয়া খুল্লনার সাজার একশেষ করিয়া ছাড়িব।”

সাধু পূজার ঘরে গিয়া দেখিলেন, খুল্লনা সত্য সত্যই পূজা করিতেছে, তাহা দেখিয়া রাগে সদাগর জ্বলিয়া উঠিলেন।

কিছুক্ষণ চুপ করিয়া দাঁড়াইয়া থাকিয়া বলিলেন, “এ তোমার কি হইতেছে খুল্লনা ? আমার সংসারে একটা অমঙ্গল আনিবার জন্ত তুমি এই ডাকিনী পূজা আরম্ভ করিয়াছ ? তোমার এ পূজার কথা শুনিয়া জ্ঞাতিরা আমার আমাকে এক ঘরে করিবার জন্ত চল ধরিয়া বসিবে। আর বিশেষতঃ আমি দেবাদিদেব মহাদেবের ভক্ত। তুমি আমার স্ত্রী হইয়া তাহার বিপরীত কাজ করিতেছ। আমার চোখের উপর আমার বাড়ীতে তোমাকে আমি কিছুতেই এ মেয়ে দেবতার পূজা করিতে দিবনা।” এই বলিয়া তিনি রাগে দেবীর পূজার ঘট পায়ের লাথি মারিয়া ফেলিয়া দিলেন, ফুল নৈবেদ্য চারিদিকে ছড়াইয়া পড়িল।

খুল্লনা স্বামীর এই দুর্ম্মতি দেখিয়া ভয়ে আকুল হইয়া বলিতে লাগিল, “অমন কথা মুখে আনিওনা গো, অমন কথা মুখে আনিওনা। আমি তোমার অমঙ্গলের জন্ত এ পূজা করিনা। আমাদের মঙ্গলের জন্তই মা মঙ্গলচণ্ডীর পূজা করিতেছি, এ পূজা করিলে মানুষের রোগ, শোক, দুঃখ, দুর্দ্দশা সব দূরে যায়। রাজা রামচন্দ্র এই পূজা করিয়া লক্ষা জয় করিয়াছিলেন। তুমি ভয় করিওনা, এ পূজায় মঙ্গল ছাড়া কখনো অমঙ্গল হয়না, তুমি মা ভগবতীকে এখানে ভক্তিভরে প্রণাম কর, হায়, হায়, তুমি মায়ের পূজার ঘট পায়ে ঠেলিয়া ফেলিলে।”



সদাগর আরও রাগিয়া বলিলেন, “আমি মহাদেবের ভক্ত, আর তুই আমার স্ত্রী হইয়া মেয়ে দেবতার পূজা করিয়া আমার ধর্ম্মনষ্ট করিতেছিস্, আবার আমাকে এখানে প্রণাম করিতে বলিস্, ধিক্ তোকে !” এই বলিয়া তিনি পূজার ঘট আবার লাথি মারিয়া ঘর হইতে বাহির হইয়া গিয়া নৌকায় উঠিলেন ।

খুল্লনা আবার পূজার সামগ্রী সাজাইয়া গুছাইয়া স্বামীর এই দুর্ন্যতির জ্ঞা কঁাদিয়া কঁাদিয়া ভগবতীর কাছে বার বার ক্ষমা প্রার্থনা করিতে লাগিল । ভগবতী তাঁহার প্রতি সদাগরের অমন ব্যবহার দেখিয়া পদ্মাবতীকে ডাকিয়া বলিলেন, “ধনপতির বড় অহঙ্কার হইয়াছে, সে অহঙ্কারে মত্ত হইয়া আজ আমার পূজার ঘট লাথি মারিয়া ফেলিয়া সিংহল যাত্রা করিয়াছে । আমি তাহার এ অহঙ্কার নিশ্চয়ই চূর্ণ করিব,— তাহার সপ্তডিঙ্গা মধুকর সাগরের জলে ডুবাইয়া তাহাকে আমি প্রাণে মারিব,—তবে আমার গায়ের জ্বালা জুড়াইবে, অপমানের ঠিক প্রতিশোধ নেওয়া হইবে । পদ্মা, তুমি এখনই ভূত প্রেত লইয়া গিয়া সদাগরের সাত ডিঙ্গা সমুদ্রের জলে ডুবাইয়া দাও ।”

পদ্মা বলিলেন, “ভগবতি, তাহা হইলে আর তোমার পূজা হইবে না । যদি সদাগরের সাতডিঙ্গা ডুবাইয়া তাহাকে প্রাণে মারিয়া ফেল, তবে তুমি যে জ্ঞা রত্নমালাকে অভিষা-

দিয়া পৃথিবীতে নিয়াছ তাহা কোনই কাজে আসিবে না। সদাগর যে পাপ করিয়াছে সে পাপের জন্য তাহার ছয় ডিঙ্গা ডুবাইয়া তাহাকে অনেক কষ্ট দিয়া সিংহলে লইয়া যাইব, সেখানে তাহাকে রাজ-কারাগারে বন্দী করাইব। তাহা হইলে তোমার দুই কাজই সিদ্ধ হইবে।”

১০

সদাগরের সপ্তডিঙ্গা মধুকর কত দেশ, কত গ্রাম, কত নগর, কত নদনদী অতিক্রম করিয়া শেষে যাইয়া মগরায় উপস্থিত হইল। ভগবতী এইখানে তাঁহার ছয়খানি নৌকা ডুবাইয়া তাহাকে শাস্তি দিবার ইচ্ছা করিয়া মেঘ, পবন, বরুণ ও নদনদীদিগকে ডাকিয়া খুব বড় বৃষ্টি তুলিয়া দিতে আদেশ করিলেন। ভগবতীর আদেশে তখনই আকাশ কালো মেঘে ঢাকিয়া ফেলিল, বিদ্যুৎ চমকাইতে লাগিল, কড় কড় করিয়া বাজ পড়িতে আরম্ভ করিল, নদীর জল উথাল পাথাল করিয়া বড় বহিতে লাগিল। বড় দেখিয়া মাঝী মাঝীদের প্রাণ শুকাইয়া গেল, সদাগর ভয়ে অস্থির হইয়া শিব নাম জপ করিতে আরম্ভ করিলেন। কিন্তু কিছুতেই কিছু হইল না, মাঝীরা প্রাণপণ চেষ্টা করিয়াও নৌকা বাঁচাইতে পারিল না, একে একে ছয়খানি নৌকা ডুবিয়া গেল।

সদাগর যে নৌকায় ছিলেন সেখানা ডুবিতে ডুবিতে অতিকষ্টে রক্ষা পাইল।

সেখান হইতে সদাগর একখানি মাত্র নৌকা লইয়া সমুদ্রের পথে চলিতে চলিতে যাইয়া চিংড়ি দহে উপস্থিত হইলেন। সেখানে কেবল মস্ত বড় বড় চিংড়ি মাছ থাকে এই জন্য এস্থানটার নাম হইয়াছে চিংড়ি দহ। প্রকাণ্ড প্রকাণ্ড চিংড়ি, তাদের প্রকাণ্ড প্রকাণ্ড মস্ত মস্ত গৌফ। নৌকার সাড়া পাইয়া চিংড়িগুলি সব গৌফ উঁচু করিয়া ভাসিয়া উঠিল। সদাগর দূর হইতে তাহা দেখিয়া মাঝীকে জিজ্ঞাসা করিলেন, “একি, সমুদ্রের মধ্যে নল খাগড়ার বন কেন?”

মাঝীরা হাসিয়া বলিল, “ওসব নল খাগড়ার বন নয় সাধু, ও চিংড়ি মাছের গৌফ!” এই বলিয়া তাহারা কতক-গুলি চাউল গুড়া জলে ফেলিয়া দিল, আর চিংড়ি মাছেরা মনের আনন্দে তাহা খাইতে লাগিল।

সেখান হইতে তাহারা যাইয়া কাঁকড়া দহে উপস্থিত হইল। সেখানে ভীষণ কাঁকড়া। প্রকাণ্ড প্রকাণ্ড দাঁড়া তাদের, তাহাতে করাতের মত ধার। তাহারা সেই দাঁড়া দিয়া কামড়াইয়া নৌকা আটকাইয়া ফেলিল। আর নৌকা চলে না। সদাগর বলিলেন, “এত বড় কাঁকড়া ত কোথাও দেখি নাই, দাঁত দিয়া কামড়াইয়া এতবড় নৌকা আটকাইয়া

ফেলিল।” মাঝীদের ভিতর কয়েকজন খুব চালাক লোক ছিল, তাহারা এই পথে অনেকবার আসা যাওয়া করিয়াছে, তাহারা খুব জোরে শেয়ালের মত চোঁচাইতে লাগিল। তোমরা বোধ হয় জান, শেয়াল খুব কাঁকড়া খায়, কাঁকরা-রাও সেজন্ত শেয়ালকে বড্ড ভয় করে। শেয়ালের ডাক শুনিবামাত্রই কাঁকড়ারা নৌকা ছাড়িয়া দিয়া প্রাণের ভয়ে যাইয়া সমুদ্রের নীচে লুকাইল।

এই রকম করিয়া সদাগর সাপ-দহ, কুমীর-দহ, কড়ি-দহ, শঙ্খ দহ ইত্যাদি করিয়া বহু দহ পার হইয়া সিংহলের প্রায় কাছে কালী-দহে গিয়া উপস্থিত হইলেন। সেখানে তিনি এক অদ্ভুত কাণ্ড দেখিলেন। দেখিলেন, সমুদ্রের নীল জল ধু ধু করিতে করিতে যাইয়া আকাশের সাথে মিশিয়া গিয়াছে, তাহাতে পাহাড়ের মত ঢেউ উঠিয়াছে। সেই অগাধ জলের উপর একখানি সুন্দর ফুলের বন ভাসিতেছে, তাহাতে নানা গাছে নানা রঙের সুন্দর সুগন্ধি ফুল ফুটিয়া রহিয়াছে, বাতাসে ফুলের গন্ধ চারিদিকে ছড়াইয়া পড়িতেছে, ভ্রমরেরা মধুলোভে গুণ গুণ করিয়া সেই ফুলের উপর উড়িয়া বেড়াইতেছে। কোকিল, পাখিয়া, চন্দনা কত পাখী গাছে গাছে উড়িয়া কতই মধুস্বরে গান গাহিতেছে। সেই বনের উপর মণি মুক্তা খচিত নীল চাঁদোয়া টাঙ্গানো, চারি ধারে সোণার নিশান উড়িতেছে, শাদা চামর দুলিতেছে, মুক্তার মালা ঝুলিতেছে।

## ✽শ্রীমন্ত✽

...এই সমস্তের চাইতে একটা আরও বেশী আশ্চর্য্যের জিনিস ছিল সেখানে,—সেই ফুলবনের একধারে সমুদ্রের জলের উপর এক মস্ত বড় পদ্মের বন, তাহাতে লাল, নীল, সাদা, পীত, সবুজ, নানা রঙ্গের পদ্মফুল ফুটিয়া রহিয়াছে, ভ্রমরেরা পদ্মে পদ্মে উড়িয়া মধু খাইতেছে। সমুদ্রের ঢেউএ পদ্মগুলি হেলিয়া ছুলিয়া পড়িতেছে। তাহার একটা পদ্মের উপর একটা ষোল বছরের পরমা সুন্দরী মেয়ে হাসিমুখে বসিয়া এক হাতে একটা প্রকাণ্ড হাতী ধরিয়া গিলিতেছে, আবার তাহা উদগার করিয়া ফেলিতেছে, আবার তাহা গিলিতেছে, হাতীটা মাঝে মাঝে পলাইবার চেষ্টা করিতেছে, কিন্তু সে মেয়েটা লেজ ধরিয়া হাতীটাকে টানিয়া আনিয়া গালে পুরিতেছে। তাহাদের ভাৱে পদ্মটা হেলিতেছে মাত্র কিন্তু ডুবিতেছে না। সাধু এই কামলে কামিনী অর্থাৎ পদ্মের উপর স্ত্রীলোক দেখিয়া অবাক হইয়া গেলেন,—এমন অপার সমুদ্র, উত্তাল ঢেউ, তাহাতে পদ্মবন, তাহার উপর আবার স্ত্রীলোক বসিয়া হাতী গিলিতেছে! সমস্তই অদ্ভুত!! এই ব্যাপার কেবল সদাগর নিজেই দেখিলেন, মাঝী মাল্লারা কিছুই দেখিতে পাইলেন না। সদাগর মনে করিলেন, সিংহলে ঘাইয়া রাজসভায় এ কথা জিজ্ঞাসা করিবেন, তাহা হইলে সমস্ত কথা জানিতে পারিবেন।

সিংহলের রত্নমালা-ঘাটে ঘাইয়া সাধু নৌকা লাগাইলেন।

ঘাটে উঠিবারাত্রই কোটাল আসিয়া তাঁহাকে রাজার নিকট লইয়া যাইবার জন্ত জেদ করিতে লাগিল। সাধু রাজার জন্ত নান্ জিনিসের ভেট সাজাইয়া লইয়া গিয়া রাজসভায় হাজির হইলেন।

সিংহল-রাজ শালবান সদাগরকে জিজ্ঞাসা করিলেন, “তুমি কে, তোমার বাড়ী কোথায়? কি জন্ত সিংহলে আসিয়াছ? সত্য করিয়া বল।”

ধনপতি বলিলেন, “মহারাজ আমি একজন সদাগর, নাম শ্রীধনপতি দত্ত, জাতিতে গন্ধবণিক্। বাড়ী বঙ্গদেশের উজ্জয়িনী নগরে। উজ্জয়িনীর রাজা বিক্রমকেশরীর ভাণ্ডারে চন্দন ও শঙ্খ ফুরাইয়া গিয়াছে, আমি রাজার আদেশে আপনার রাজ্য হইতে তাহা কিনিয়া লইতে আসিয়াছি। আর সেই সঙ্গে আপনার রাজ্যে কিছুদিন বাণিজ্য করিবারও ইচ্ছা আছে, দয়া করিয়া মহারাজ আমাকে সে অনুমতি দিন।”

রাজা সদাগরের দেওয়া সমস্ত ভেটের জিনিস দেখিয়া ও তাঁহার কথা শুনিয়া পরম সন্তুষ্ট হইয়া তাঁহাকে সিংহলে বাণিজ্য করিতে ও শঙ্খ, চন্দন ইত্যাদি প্রয়োজনীয় দ্রব্য লইয়া যাইতে অনুমতি দিলেন। সদাগর রাজাকে অভিবাদন করিয়া বিদায় হইলেন।

রাজার পুরোহিত অগ্নিশর্মা আসিয়া রাজসভায় উপস্থিত হইলেন। তিনি নামে যেমন অগ্নিশর্মা, কাজেও তাই।

রাজসভার চারিদিকে ভেটের জিনিষ দেখিয়া তিনি জিজ্ঞাসা করিলেন, “এ সব জিনিষ পত্রের কোথা হইতে আসিল মহারাজ ?” পাত্র মিত্র সকলে বলিল, “একজন সদাগর সিংহলে বাণিজ্য করিতে আসিয়াছে, সে ইহা মহারাজকে দিয়াছে।”

অগ্নিশর্মা তখন রাগে অগ্নিশর্মা হইয়া বলিলেন, “আজকাল দেশ হইতে গুরু ব্রাহ্মণের সম্মান লোপ পাইয়াছে, যত ভেট সব রাজ-রাজড়ার, ব্রাহ্মণের বেলায় রম্ভা। এমন দেশে না থাকাই ভাল”। বলিয়া রাগে তিনি রাজসভা ছাড়িয়া চলিয়া যাইতে উদ্যত হইলে, পাত্র মিত্র সকলে তাঁহাকে এক রকম পায়ে ধরিয়া শাস্ত করিল। রাজা সদাগরকে ডাকিয়া আনিবার আদেশ করিলেন। সদাগর আসিলে অগ্নিশর্মা বলিলেন, “কি হে বাপু সদাগর, সিংহলে ত বাণিজ্য করিতে আসিয়াছ, কিন্তু রাজার পুরোহিতকে যে কিছু দিয়া সম্মান করিতে হয়, তাহা কি তোমার জানা নাই ?”

ধনপতি বড়ই লজ্জা পাইয়া কয়েকটা মোহর দিয়া অগ্নিশর্মা কে প্রণাম করিলেন। অগ্নিশর্মা পরম পরিতুষ্ট হইয়া তাঁহাকে আশীর্ব্বাদ করিয়া বলিলেন, “পথে ত মঙ্গল মত আসিয়াছ, কোনও কষ্ট ত হয় নাই ? আসিতে পথে কি কি দেখিলে ?”

সদাগর বলিলেন, “পথে বড়ই কষ্ট পাইয়াছি, সাগর-

সঙ্গমে আসিয়া জল-ঝড়ে আমার ছয় খানি ডিঙ্গা ডুবিয়া গিয়াছে, বাণিজ্যের জন্ত যে সব জিনিষ আনিয়াছিলাম, তাহা প্রায় সবই নষ্ট হইয়া গিয়াছে, মহাদেবের দয়ায় কোনও রকমে প্রাণে বাঁচিয়া আসিয়াছি। তারপর কালীদহে আসিয়া এক অদ্ভুত দৃশ্য দেখিলাম। দেখিলাম,—সমুদ্রের জলের উপর প্রকাণ্ড এক পদ্মবন, একটা ফোটা পদ্মের উপর দেবতার মত সুন্দরী একটা ষোল সতের বছরের মেয়ে বসিয়া একটা হাতী ধরিয়া গিলিতেছে, আবার ওগুঁরাইয়া ফেলিতেছে, ভারে পদ্মটা ডাঁটা সহ থর থর করিয়া কাঁপিতেছে, কিন্তু ডুবিতেছে না। এরকম আশ্চর্য ব্যাপার আমি কখনো জীবনে দেখি নাই বা কোথাও শুনি নাই।”

• সাধুর কথা শুনিয়া রাজা ও পাত্র মিত্র সকলেই হাসিয়া আকুল ! সদাগর নিশ্চয়ই পাগল, তাহা না হইলে এমন কথা কি কেহ বলে ? কেহ কেহ জিজ্ঞাসা করিল, “ওহে সাধু, তোমার কি নেশা ভাঙ্গ টাঙ্গ অভ্যাস আছে ? বিদেশে আসিয়া বুঝি ভয় পাইয়াছিলে, তাই নৌকার ভিতর শুইয়া চোখ বুজিয়া স্বপ্ন দেখিতেছিলে। ভাগ্যে তোমার নৌকা গিলিয়া ফেলে নাই।”

এই সব ঠাট্টা তামাসা শুনিয়া সদাগর ভিতরে ভিতরে খুব রাগিয়া গেলেন, কিন্তু বাহিরে সে রাগটা প্রকাশ করিতে পারিলেন না, কি জানি, একে রাজ সভা, তাহাতে আবার



বিদেশ । তিনি বলিলেন, “মহারাজ, আপনার আজ্ঞা পাইলে সেই কমলেকামিনী বাঁধিয়া আনিয়া আপনার রাজসভায় হাজির করিতে পারি ।”

সদাগরের কথা শুনিয়া পাত্র মিত্র সকলে বলিতে লাগিল, “বেটা ভণ্ড, রাজসভায় বলিয়া এমন জ্বলজ্যান্ত মিথ্যা কথা বলিস্ ! বেটা নিশ্চয়ই চোর ডাকাত হইবে, সাধুর ছদ্মবেশ ধরিয়া সিংহলে আসিয়াছে ।”

সদাগর আর এই কটুবাক্য সহ করিতে না পারিয়া বলিলেন, “মহারাজ, দয়া করিয়া এখনই সমুদ্রের ধারে চলুন, আমার কথা সত্য কি মিথ্যা তাহার প্রমাণ দিব । প্রতিজ্ঞা করুন মহারাজ, যদি আমি কমলে-কামিনী দেখাইতে পারি তবে অর্দ্ধেক রাজ্য আমাকে দিবেন । আর যদি আমি না দেখাইতে পারি, তবে আমার বাণিজ্যের জিনিস ও মধুকর ডিঙ্গা আপনার হইবে এবং আমাকে কারাগারে বন্ধ করিয়া রাখিবেন ।”

রাজা ও পাত্র মিত্র সকলেই সদাগরের কথায় স্বীকৃত হইলেন । তখনই সমুদ্র-পারে যাওয়ার জন্য হাতী, ঘোড়া, পান্ধী, নৌকা, লোকলস্কর সাজিল । রাজা শালবান সদাগরকে সঙ্গে লইয়া পাত্রমিত্র সহ কালীদহে চলিলেন ।

কালীদহে উপস্থিত হইয়া দেখিলেন, কেবল সমুদ্রের নীলজল পাহাড়ের মত ঢেউ তুলিয়া গড়াইয়া যাইতেছে,

সমুদ্রের সাদা ফেনা ছাড়া আর কোথাও কিছু নাই, পদ্মের বন দূরে থাকুক, একটা পদ্মের পাতা পর্যন্ত নাই। সকলে সদাগরকে জিজ্ঞাসা করিতে লাগিল, “কি সদাগর, কোথায় তোমার কমলে কামিনী?”

সদাগর বলিলেন, “মহারাজ, আমি মিথ্যা কথা বলি নাই। আমার সাথের মাঝিমাঝারা ইহার সাক্ষী আছে। আমার বোধ হয় আপনি এত লোক জন লইয়া আসিয়াছেন, সেই জন্ত সে ভয় ও লজ্জা পাইয়া লুকাইয়া আছে। আর সমুদ্রের যেমন ঢেউ, এক টুকরা খড় ধরিলে দুই টুকরা হইয়া যায়, স্রোতে হয়ত পদ্মের বন ছিঁড়িয়া ভাসিয়া গিয়াছে। মহারাজ, লোকজন বিদায় দিয়া আপনি একাকী আমার সঙ্গে থাকুন, আমি নিশ্চয়ই আপনাকে কমলে কামিনী দেখাইব। আমি বিদেশী সদাগর, আপনার রাজ্যে বাণিজ্য করিতে আসিয়াছি, কিজন্ত আমি মিথ্যা কথা বলিব?”

পাত্রমিত্র সকলেই বলিতে লাগিল, “বেটা নিশ্চয়ই ডাকাত আর না হয় পাগল।”

রাজা শালবান ধনপতির মাঝিদিগকে ডাকিয়া কমলে কামিনীর কথা জিজ্ঞাসা করিলেন। মাঝিরা সকলেই এক বাক্যে বলিল, “না মহারাজ, আমরা কেহই কিছু দেখি নাই।”

তখনই রাজা সদাগরকে বাঁধিয়া কারাগারে লইয়া যাইতে

ଶ୍ରୀକୃଷ୍ଣ

ছকুম দিলেন। সেই দিন হইতে সদাগর চোখের জলে বুক ভাসাইয়া কারাগারে দিন কাটাইতে লাগিলেন। তাঁহার মধুকর ডিঙ্গা ও বাণিজ্যের দ্রব্য সমস্তই রাজভাণ্ডারে বাজেয়াপ্ত হইয়া গেল।

রাত্রিতে সদাগর কারাগারে ঘুমাইয়া আছেন, এমন সময় ভগবতী বৃদ্ধা ব্রাহ্মণীর বেশ ধরিয়া তাঁহার শিয়রে বসিয়া স্বপ্ন দেখাইলেন,—“সদাগর, যদি তুমি ভগবতীর পূজা কর, তবে তোমার সমস্ত দুঃখ ঘুচিবে, তুমি কারাগার হইতে মুক্তি পাইয়া বাণিজ্য করিয়া নৌকা ভরিয়া ধন দৌলত লইয়া দেশে ফিরিতে পারিবে, সাগর সঙ্গমে মগরার জল-ঝড়ে তোমার যে ছয়খানা নৌকা ডুবিয়া গিয়াছে, তাহাও ভগবতীর বরে ফিরিয়া পাইবে। আর যদি চণ্ডীর পূজা না কর, তবে এই কারাগারেই তোমাকে পচিয়া পচিয়া মারিতে হইবে। লহনা ও খুল্লনা পেটের দায়ে সূতা বেচিবে।”

স্বপ্ন দেখিয়া সদাগরের ঘুম ভাঙ্গিয়া গেল। তিনি মনে মনে বলিতে লাগিলেন, “যদি কারাগারে আমার প্রাণও যায়, তবু আমি মহাদেবের পূজা ছাড়িয়া অন্য কাহাকেও পূজা করিব না। মহাদেবই আমার একমাত্র দেবতা।”

ধনপতির সিংহল-যাত্রার কয়েক মাস পরেই খুল্লনার একটা ছেলে হইল। স্বামীর কথামত সে ছেলের নাম রাখিল শ্রীমন্ত। শ্রীমন্ত ক্রমে ক্রমে পাঁচ বছরে পড়িল। সে দিন রাত কেবল খেলিয়াই বেড়াইত। খুল্লনা শ্রীমন্তকে কোলে লইয়া ভাগবত শোনে, শ্রীমন্ত ভাগবতে শ্রীকৃষ্ণের সমস্ত লীলা শুনিয়া খেলার সাথীদিগকে লইয়া সেই খেলাই খেলে।—কখনো সে শ্রীকৃষ্ণ সাজিয়া পুতনা রাক্ষসীর মাই খাইয়া তাহাকে মারিয়া ফেলে, কখনো ননী চুবি করিয়া খায়, কখনো কালীয় সাপের মাথায় পা দিয়া তাহাকে জব্দ করে, কখনো গোপাল সাজিয়া গরুর পাল লইয়া গোষ্ঠে যায়, কখনো কংস বধ করে, কখনো কদম তলায় বাঁকা হইয়া দাঁড়াইয়া বাঁশী বাজায়, কখনো মথুরায় গিয়া রাজা হয়।

সারা দিন ছেলেকে এমন করিয়া খেলিয়া বেড়াইতে দেখিয়া খুল্লনার বড়ই চিন্তা হইল। পাঁচ বছরের ছেলে, এখনো তাহার হাতে খড়ি হইল না। তাই সে পুরোহিতকে ডাকিয়া ভাল দিনে শ্রীমন্তের হাতে খড়ি দিয়া তাহাকে জন-দীন ওঝার পাঠশালায় পাঠাইয়া দিল। শ্রীমন্ত অল্প দিনের মধ্যেই ব্যাকরণ, কাব্য, অলঙ্কার, জ্যোতিষ, পুরাণ, ন্যায়

## শ্রীমন্ত

প্রভৃতি নানা শাস্ত্রে সুপণ্ডিত হইয়া উঠিল। তাহার বিদ্যা দেখিয়া জনাই পণ্ডিত পর্যন্ত আশ্চর্য্য হইয়া গেলেন।

এক দিন শ্রীমন্ত গুরু মহাশয়কে জিজ্ঞাসা করিল, “আচ্ছা গুরু মহাশয়, পুতনা রাক্ষসী শ্রীকৃষ্ণকে মাই-এ বিষ মাখাইয়া খাওয়াইয়া তাঁহাকে মারিয়া ফেলিবার চেষ্টা করিয়াছিল, আর যশোদা ও দৈবকী কৃষ্ণকে মায়ের মতন ভাল বাসিয়া কত কষ্টে লালন পালন করিয়াছিলেন ; কিন্তু শেষে যশোদা দৈবকীও স্বর্গে গেলেন আর পাপ-মতি পুতনাও স্বর্গে গেল, ইহার কারণ কি ?”

পণ্ডিত মহাশয় বলিলেন, “সমস্তই বাবা, সেই শ্রীকৃষ্ণের ইচ্ছা।”

শ্রীমন্ত জিজ্ঞাসা করিল, “শূর্ণনখা রামচন্দ্রকে আত্মদান করিতে গিয়াছিল, কিন্তু ফলে তাহার নাককান কাটা গেল। আপনি বলিয়াছেন যে, নয় প্রকার ভক্তির মধ্যে আত্মদানই শ্রেষ্ঠ, তবে শূর্ণনখা আত্মদান করিয়াও এমন শাস্তি পাইল কেন ?”

পণ্ডিত মহাশয় বলিলেন, “ওসব বাবা, ভগবানের খেলা।”

শ্রীমন্ত বলিল, “এমন অন্ধ্যায় ইচ্ছা ভগবানের হইবে কেন ? আমি এসব বুঝিতে পারিলাম না, আপনি আমাকে ভাল করিয়া ব্যাখ্যা করিয়া ইহা বুঝাইয়া দিন।”

গুরু দেখিলেন, মহামুগ্ধ ! তাঁহার পেটে অত বিদ্যা

নাই যে তিনি এত কথা শ্রীমন্তকে শাস্ত্র প্রমাণ দেখাইয়া ভাল করিয়া বুঝাইয়া দিতে পারেন। কাজেই শ্রীমন্তের উপর তাঁহার বড়ই রাগ হইল, এক কোঁটা ছেলে, তাহার পেটে গুরু-ঠকানো বুদ্ধি ! তিনি বলিলেন, “দ্যাখ্ ছিরাই, আমার এই পঁচাশী বছর বয়সে তোর মত হাজার ছেলে আমি পড়াই-  
য়াছি, কিন্তু কাহাকেও শাস্ত্রের কথা বুঝাইতে অত টীকা টিপ্তনীর দরকার হয় নাই। তুই এক রত্তি ছেলে হইয়া এমন জ্যাঠা হইয়াছিস্ যে আমার বিদ্যা পরীক্ষা করিতে আসিস্ ? তোর বড়ই অহঙ্কার হইয়াছে, আমি যদি উচিত কথা বলি, তবে এখনই মাথা হেঁট করিয়া পাঠশালা হইতে বাহির হইয়া যাইতে হইবে।”

শ্রীমন্ত বলিল, “গুরুমহাশয়, একটা কথা জিজ্ঞাসা করিলে ভাল করিয়া বুঝাইয়া দিতে পারেন না, দুইবার জিজ্ঞাসা করিলে আবার রাগ করেন কেন ? যাহা বুঝিতে পারিব না তাহা শত বার আপনাকে জিজ্ঞাসা করিব, যতক্ষণ পর্য্যন্ত না বুঝিব, ততক্ষণ আপনাকে বলিয়া দিতেই হইবে। আমায় এমন কি অপমানের কথা আপনি বলিবেন যে, আমাকে মাথা হেঁট করিয়া চলিয়া যাইতে হইবে ?”

গুরু এবার রাগিয়া একেবারে টঙ্ হইয়া বলিতে লাগিলেন, “বেণের ছেলে হইয়া তুই আমাকে এত ছাত্রের মধ্যে অপমান করিলি ? ছোট মুখে তোর বড় কথা ! তোর মা

## শ্রীমন্ত

ছাগল চড়াইয়া খাইত । প্রায় বার তের বছর হইল তোর বাপ সিংহলে গিয়াছে, আমরা শুনিয়াছি, সে সেখানে মরিয়াছে, আর তোর মা এখনো মাছ খায়, শাঁখা হাতে দেয়, পেড়ে শাড়ী পরে, সিঁথিতে সিন্দূর দেয় । আর তুই তার ছেলে হইয়া আসিস্ আমাকে অপমান করিতে !”

গুরু মহাশয়ের মুখে মায়ের নিন্দা শুনিয়া শ্রীমন্ত আর সহ্য করিতে পারিল না, সে বলিল, “দেখুন গুরু মহাশয়, আপনি ব্রাহ্মণ বলিয়া আপনার এত কথা আমি সহ্য করিলাম । আমার বাবা সিংহলে আছেন, তিনি মরিবেন কেন ? আপনি না জানিয়া শুনিয়া আমার মায়ের নিন্দা করিতেছেন । এমন কথা কোনও ভদ্রলোকের মুখ দিয়া বাহির হয় না, আপনি নিশ্চয়ই ছোট ব্রাহ্মণ ।”

গুরু মহাশয় রাগে চোখ লাল ও টিকি খাড়া করিয়া দাঁড়াইয়া উঠিয়া বলিলেন, “পাজি, এখনই তুই এখান হইতে দূর হ, আমি ছোট লোকের বাচ্চাকে পড়াই না । পড়াইলে আমার জাত যাইবে ।”

শ্রীমন্ত তখনই পুঁথি পত্র লইয়া অপমানে ও রাগে চোখের জল ফেলিতে ফেলিতে পাঠশালা হইতে বাহির হইয়া বাড়ীর দিকে চলিল । বাড়ী আসিয়া সে চুপ করিয়া এক ঘরে ঢুকিয়া দুয়ার বন্ধ করিয়া শুইয়া কাঁদিতে লাগিল ।

অনেক বেলা হইয়া গেল তবু শ্রীমন্তকে বাড়ী ফিরিতে

না দেখিয়া খুল্লনার বড়ই চিন্তা হইল। সেই ভোরে উঠিয়া শ্রীমন্ত পাঠশালে গিয়াছে, দুপুর হইতে চলিল তবু আজ তাহার দেখা নাই, অগ্নি দিন ত তাহার বাড়ী ফিরিতে এত দেৱী হয় না। তবে কি তাহার কোনও আপদ বিপদ হইল? তাহার গায়ে হীরা মুক্তার অলঙ্কার আছে, সেই লোভে ত কেহ তাহাকে গলা টিপিয়া মারিয়া ফেলে নাই? মায়ের প্রাণ নানা রকম ভয়ে কাঁপিয়া উঠিতে লাগিল। খুল্লনা একবার শ্রীমন্তের বাড়ী আসিবার পথে গিয়া দেখিয়া আসে, আবার রান্না ঘরে গিয়া শ্রীমন্তের জন্ম বাড়ী ভাতের কাছে বসে। এমনি ঘর-বাহির করিয়া অনেকক্ষণ কাটাইয়া যখন সে দেখিল, শ্রীমন্ত আর বাড়ী ফিরিল না, অথচ বেলা অনেক বাড়িয়া গেল, তখন সে আর বাড়ীতে টিকিতে পারিল না। শ্রীমন্ত যখন বাড়ী আসিয়া ঘরে দুয়ার দেয়, তখন লহনাই মাত্র তাহা দেখিয়াছিল; সে দুর্বলার কানে কানে সেকথা বলিয়া দুই জনে মুখ টিপিয়া টিপিয়া হাসিল। খুল্লনা কাঁদিতে কাঁদিতে যাইয়া দুর্বলাকে একবার শ্রীমন্তের খোঁজ করিয়া আসিতে বলিল। দুর্বলা এদিক সেদিক একটু ঘুরিয়া বেড়াইয়া খুল্লনাকে আসিয়া বলিল, সে শ্রীমন্তের কোনই খোঁজ পাইল না। সেই কথা শুনিয়া খুল্লনার প্রাণ শুকাইয়া গেল। সে দুর্বলাকে সাথে লইয়া নিজেই এপাড়া সেপাড়া তন্ন তন্ন করিয়া খুঁজিয়া জনার্দন পণ্ডিতের বাড়ী যাইয়া উপস্থিত হইল। পণ্ডিত মহাশয়ের পায়ে



পড়িয়া চোখের জলে মাটি ভাসাইয়া খুল্লনা বলিতে লাগিল, “বলুন গুরু মহাশয়, আমার ছিরাই কোথায় ? আমি যে তাহাকে সারা গ্রামটা খুঁজিয়াও পাইলাম না, সেত এমন করিয়া বাড়ী ফিরিতে কোনো দিন দেরি করে না। আপনার চারি মাসের মাহিয়ানা বাকি রহিয়াছে, তাহা আদায় করিবার জন্য বুঝি তাহাকে লুকাইয়া রাখিয়াছেন। আপনার পায়ে ধরিয়া বলিতেছি, তাহাকে বাহির করিয়া দিন। আমি আজই আপনাকে বাকি মাহিনার দ্বিগুণ দিব।”

গুরু মহাশয় আগেই শ্রীমন্তের কথায় রাগিয়া অগ্নিশর্মা হইয়াছিলেন, এখন আবার তাহার মায়ের কথায় যেন তাঁহার কাটা ঘায়ে নুণের ছিটা পড়িল। তিনি বলিলেন, “দেখ খুল্লনা, তুমি ঘরের বউ হইয়া এমন লাজ সরমের মাথা খাইয়া গ্রামে গ্রামে ঘুরিয়া বেড়াইতেছ, এটা কিন্তু কিছুতেই ভাল কাজ হইতেছে না ! তোমার কি জাত মানের ভয় নাই ? ছেলে ঘরে ফিরিয়া গিয়াছে, তবু তুমি তাহার জন্য ঘুরিয়া বেড়াইতেছ, আর অনর্থক আমাকে কতকগুলি মন্দ কথা বলিলে। মনে রাখিও, ব্রাহ্মণের উপর মিথ্যা দোষারোপ করিলে তোমার ভাল হইবে না। আমি কি চোর না ডাকাত যে তোমার ছেলেকে লুকাইয়া রাখিব ?” পণ্ডিত মহাশয়ের নিকট এই রূপ কটু কথা শুনিয়া খুল্লনা আবার চোখের জল ফেলিতে ফেলিতে বাড়ীর দিকে চলিল।

বাড়ী ফিরিয়া শুনিল, লহনা ঘরে বসিয়া তাহার সখী-  
দিগকে বলিতেছে, “ছেলে কি আর কাহারো হয় না ? কিন্তু  
খুল্লনা যেমন ছেলে-পাগলী এমন আর কোথাও দেখি নাই।  
ছেলে ত গোঁসা করিয়া ঘরে দুয়ার দিয়া পড়িয়া আছে, আর  
মা সারা পাড়াময় তাহাকে খুঁজিয়া মরিতেছে ; আমাকেও  
অবধি একটা কথা জিজ্ঞাসা করিল না। ছেলেও কিন্তু আচ্ছা  
আত্মরে হইয়া উঠিতেছে দিন দিন।”

১২

লহনার কথা শুনিয়া খুল্লনা তাড়াতাড়ি ঘরে গিয়া দেখিল  
সত্য সত্যই ঘর ভিতর হইতে খিল বন্ধ রহিয়াছে।  
সে বাহির হইতে কাঁদিয়া কাঁদিয়া বলিতে লাগিল, “দুয়ার খোল  
বাবা শ্রীমন্ত, তোকে না দেখিয়া আমি যে কত খুঁজিয়া  
আসিলাম। কি জন্য তুই এমন রাগ করিয়া বসিয়া আছিস ?  
কিসের দুঃখ তোর আমাকে বল। আমার কিসের অভাব ?  
তুই যাহা চাহিবি আমি তোকে তাহাই দিব। দুয়ার খোল  
বাবা, তাহা না হইলে আমি এইখানে কপাল খুঁড়িয়া মরিব।”

মায়ের কান্নায় শ্রীমন্ত দুয়ার খুলিয়া দিল। খুল্লনা  
তাহাকে কোলে লইয়া আঁচলে চোখ মুছাইয়া কত কথাই  
জিজ্ঞাসা করিতে লাগিল। শ্রীমন্ত কিন্তু কোনই উত্তর

দিল না, কেবলই কাঁদিতে লাগিল। দাসী দুর্বলা শ্রীমন্তের মাথায় তেল দিয়া তাহাকে স্নান করাইল। খুল্লনা পঞ্চাশ ব্যঞ্জন দিয়া সোণার থালায় ভাত বাড়িয়া খাওয়ার জন্য তাহাকে সাধিতে লাগিল, কিন্তু শ্রীমন্ত কোনও মতেই খাইতে স্বীকৃত হইল না। সে বলিল, “মা, আজ গুরু মহাশয় আমাকে অত ছাত্রের মধ্যে বড়ই অপমান করিয়াছেন। তিনি বলিয়াছেন, বাবা সিংহল গিয়া মরিয়া গিয়াছেন, আর তুমি সধবার মত পেড়ে শাড়ী পর, মাছ খাও, হাতে শাঁখা পর, সিঁথিতে সিন্দূর দাও, এজন্য লোকে নাকি তোমাকে কত নিন্দা করে। আমি এ অপমান কিছুতেই সহ্য করিতে পারিব না মা, যদি তুমি আমাকে সাত ডিঙ্গা সাজাইয়া বাবার খোঁজে সিংহল যাইতে অনুমতি দাও, তবেই আমি ভাত খাইব, তাহা না হইলে আমি না খাইয়া মরিব, তোমার কোনো কথাতেই ভুলিব না।”

অতটুকু ছেলের মুখে অমন প্রতিজ্ঞার কথা শুনিয়া খুল্লনার প্রাণ কাঁপিয়া উঠিল। সে তাহাকে কোলে লইয়া আঁচলে চোখ মুছাইতে মুছাইতে বলিল, “ওসব কথায় কান দিও না বাবা, লোকে হিংসা করিয়া কত কথাই বলে। সিংহল কি আর এখানে? সে যে বহু দূরের পথ, সমুদ্র দিয়া যাইতে হয়, সমুদ্রে সাপ, কুমীর, হাঙ্গর, তিমি, কত ভীষণ ভীষণ জন্তু থাকে, কত দশু সে পথে ঘুরিয়া বেড়ায়! তুমি বড় হও বাবা, তখন বাণিজ্যে যাইও, এ বয়সে কি সমুদ্রে যাওয়া যায়?”

বাবার কাছে শুনিয়াছি সিংহলে যে বায় সে-ই খুব কষ্ট পায় । তুমি ছেলে মানুষ, সে কষ্ট সহিতে পারিবে না । সিংহলে যাইতে হইলে প্রকাণ্ড নৌকা গড়িতে হয় ; এক শত কারিগর যদি এক বৎসর অনবরত খাটে, তবে সে রকম একখানা নৌকা তৈরী হয় । মায়ের কথা শোন বাবা, এখন ভাত খাও, তুমি বড় হইলেই আমি তোমাকে সাত ডিঙ্গা সাজাইয়া সিংহলে পাঠাইয়া দিব ।”

শ্রীমন্ত বলিল, “মা, আমি হোমার কোনও কথাই শুনিব না । আমি সিংহলে যাইবই, যদি তুমি অনুমতি না দেও, তবে আমি জলে ডুবিয়া মরিব, তবু অমন অপমানের কথা শুনিয়া বাঁচিয়া থাকিতে পারিব না । আমি এখনই শুনিতে চাই, তুমি আমাকে সিংহলে যাওয়ার জন্য সাত ডিঙ্গা তৈরী করিয়া দিবে কিনা ?”

খুল্লনা অগত্যা অনুমতি দিল । তখন শ্রীমন্তের মুখে হাসি ফুটিয়া উঠিল । সে মায়ের কোলে বসিয়া পেট পুরিয়া মনের আনন্দে ভাত খাইল ।

তখনই উজ্জয়িনী নগরের পথে পথে ঢোল বাজাইয়া ঘোষণা করিয়া দেওয়া হইল, যে শীঘ্র শীঘ্র সাত ডিঙ্গা তৈরী করিয়া দিতে পারিবে, তাহাকে যথেষ্ট টাকা পুরস্কার দেওয়া হইবে । ভগবতী দেখিলেন, যদি মানুষ সাত ডিঙ্গা তৈরী করিতে আরম্ভ করে, তবে অন্ততঃ দুই তিন বৎসরের পূর্বে

তাহা কিছুতেই শেষ হইবে না, তাহা হইলে তাঁহার কার্য্য-  
সিদ্ধিতেও বিলম্ব হইয়া যাইবে, কাজেই তিনি বিশ্বকর্মা ও  
তাঁহার পুত্র দারুবর্মা কে ডাকিয়া কহিলেন, “আজ রাত্রির  
ভিতর তোমাদিগকে শ্রীমন্তের সিংহলে যাওয়ার জন্ত সাতথানা  
নৌকা তৈরী করিয়া দিতে হইবে। হনুমানকে সাথে লইয়া  
যাও, তাহা হইলে তোমার কাজের সুবিধা হইবে।”

বিশ্বকর্মা, দারুবর্মা ও হনুমান তিন জন তিন বৃদ্ধ  
কারিগরের রূপ ধরিয়া উজ্জয়িনী নগরে উপস্থিত হইয়া নৌকা  
তৈরী করার প্রার্থনা জানাইলেন। তাঁহাদিগকে অতি বৃদ্ধ  
দেখিয়া শ্রীমন্ত জিজ্ঞাসা করিল, “তোমরা যেমন বুড়া, তেমন  
শরীরের চেহারা, কানে শোন না, চোখে দেখ না, গায়ে এক  
তিল বল নাই, লাঠি ভর ছাড়া হাটিতে পার না, ইহাতে কেমন  
করিয়া তোমরা আমার সাত ডিঙ্গা তৈরী করিবে? সেত  
আর যে সে ডিঙ্গা নয়, সমুদ্রে যাওয়ার ডিঙ্গা। তোমাদের  
চেহারা দেখিয়া ত আমার ভরসা হয় না। তোমাদের বাড়ী  
কোথায়?”

বিশ্বকর্মা বলিলেন, “আমাদের বাড়ী পুরন্দরপুর।  
আমরা বৃদ্ধ হই আর রোগাই হই, তুমি যদি অনুমতি দাও  
তবে সকলের চেয়ে বেশী তাড়াতাড়ি আমরা তোমার সাত  
ডিঙ্গা তৈরী করিয়া দিতে পারিব।”

তাঁহাদের কথা শুনিয়া শ্রীমন্ত তাঁহাদের উপরেই ডিঙ্গা

নিৰ্মাণের ভার দিল। তিনজন কারিগর মিলিয়া এক রাত্রির মধ্যেই ঘি-এর প্রদীপ জ্বালিয়া সাত ডিঙ্গা নিৰ্মাণ করিয়া রাত্রি শেষে স্বর্গে চালায়া গেলেন। প্রাতে শ্রীমন্ত ঘুম হইতে উঠিয়া কারিগরদিগের সন্ধান গিয়া দেখে—ভ্রমরা নদীর জলে সাত ডিঙ্গা ভাসিতেছে, কিন্তু কারিগরেরা কেহ নাই। তখন তাহার মনে হইল, নিশ্চয়ই কোনো দেবতা আসিয়া এই ডিঙ্গা তৈরী করিয়া রাখিয়া গিয়াছেন। তাহা না হইলে পৃথিবীতে এমন কেহ নাই, যাহারা তিনজন মিলিয়া এক রাত্রির মধ্যে এমন সুন্দর করিয়া এত বড় সাতখানা নৌকা নিৰ্মাণ করিয়া দিতে পারে।

তখনই যাত্রার আয়োজন চলিতে লাগিল। দৈবজ্ঞ আসিয়া যাত্রার দিন দেখিয়া বলিল, “আগামী রবিবার মৃগশিরা নক্ষত্রে দশমী তিথিতে বণিজকরণ যোগে যাত্রাই উৎকৃষ্ট, ইহাই বাণিজ্য ব্যাপারে সর্বোত্তম দিন। এই যাত্রায় তুমি মগরায় জল-বাড়ে খুব কম পাইবে, কিন্তু ভগবতী তোমাকে রক্ষা করিবেন।”

বাণিজ্যের নানা জিনিসে নৌকা পূর্ণ করা হইল। শ্রীমন্ত রাজার অনুমতি লইয়া সিংহল যাত্রার জন্য প্রস্তুত হইতে লাগিল। খুল্লনা দিন রাত বসিয়া কায়মনে দুর্গতি-নাশিনী মঙ্গলচণ্ডীর পূজা করিয়া দেবীর চরণে পুস্ত্রের জন্য আশীর্বাদ প্রার্থনা করিল। যাত্রার দিনে সে শ্রীমন্তের হাতে দেবীর আশীর্বাদী দূর্ব্বা ও ফুল দিয়া বলিলেন, “সুখে দুঃখে সব

## শ্রীমন্ত

সময় মা মঙ্গলচণ্ডীর নাম স্মরণ করিয়া এই ফুল ও দূর্ব্বা সাথে সাথে রাখিও । কখনো ভগবতীর নাম ভুলিও না, তিনিই তোমাকে আপদে বিপদে রক্ষা করিবেন ।” পাছে ধনপতি শ্রীমন্তকে চিনিতে না পারেন, এই ভয়ে তাহার হাতে ধনপতির আংটি ও ছাতা দিয়া দিলেন । শ্রীমন্ত মা ও বিমাতাকে প্রণাম করিয়া পায়ের ধূলা লইয়া দুর্গা দুর্গা বলিয়া নৌকায় উঠিল । খুল্লনা চোখের জল মুছিতে মুছিতে মা মঙ্গলচণ্ডীকে ডাকিতে ডাকিতে যাইয়া নদীর ধারে দাঁড়াইল । মাঝি-মাল্লারা বদর বদর বলিয়া দাঁড়ে টান দিল । দেখিতে দেখিতে শ্রীমন্তের সাত ডিঙ্গার বহর চোখের আড়ালে চলিয়া গেল । খুল্লনা চোখের জল মুছিতে মুছিতে বাড়ী ফিরিল ।

১৩

**শ্রী**মন্ত বহু নদনদী, গ্রাম, নগর, বন্দর, তীর্থ অতিক্রম করিয়া আসিয়া মগরায় উপস্থিত হইল । এই সেই মগরা, যেখানে ধনপতি জল-বাড়ে পড়িয়া সমস্ত নৌকা হারাইয়া মাত্র একখানা নৌকা লইয়া সিংহলে গিয়াছিলেন ।

ভগবতী এইখানে শ্রীমন্তকে পরীক্ষা করিবার জন্ত জল-বাড়ের স্রষ্টি করিলেন । তুমুল বেগে বাড় উঠিল, নদীর জলে

পাহাড়ের মত ঢেউ উঠিয়া তীরে আছাড় খাইয়া পড়িতে লাগিল। মেঘে বৃষ্টিতে চারিদিক অন্ধকার হইয়া গেল। নৌকার পালের দড়ি ছিঁড়িয়া মাস্তুল ভাঙ্গিয়া নৌকায় বলকে বলকে জল উঠিতে লাগিল। শ্রীমন্ত ভয়ে চীৎকার করিয়া কাঁদিয়া বলিতে লাগিল, “মা ভগবতি, একি করিলে মা ? আমায় রক্ষা কর, আমার সমস্ত আশা ভরসা যে নষ্ট হয়, তুমি ছাড়া এ বিপদে কে আমায় রক্ষা করিবে ?” এই বলিয়া সে ঝড়ের ভিতর নদীতে লাফাইয়া পড়িল। অমনি ভগবতীর কৃপায় বড় বৃষ্টি থামিয়া নদীতে মাত্র এক হাঁটু জল হইল। শ্রীমন্ত ভগবতীর চরণে সহস্র সহস্র প্রণাম জানাইয়া আবার গিয়া নৌকায় উঠিল। নৌকা আবার চলিতে লাগিল।

চলিতে চলিতে শ্রীমন্তের নৌকার বহর যাইয়া কালীদহে উপস্থিত হইল, যেখানে ধনপতি কমলে কামিনী দেখিয়াছিলেন। ভগবতী এবারও শ্রীমন্তকে ছলনা করিবার জন্য সমুদ্রের নীল জলের উপর সুন্দর একখানি ফুলের বন সৃষ্টি করিলেন, তাহার এক ধারে একখানি পদ্মের বন, ভগবতী স্বয়ং একজন যোল বছর বয়সের স্ত্রীলোকের মূর্তি ধরিয়া একটা পদ্মের উপর বসিয়া একটা হাতী ধরিয়া গিলিতে লাগিলেন,—ঠিক যেমন ধনপতি দেখিয়াছিলেন। শ্রীমন্ত এই অদ্ভুত কাণ্ড দেখিয়া অবাক হইয়া গেল। সে নৌকার মাঝি-মাল্লাদিগকে ডাকিয়া সে দৃশ্য দেখাইতে লাগিল ; কিন্তু তাহারা কিছুই



## শ্রীমন্ত

দেখিতে পাইল না, কেবল দেখিল, নীল সাগরের সীমাহীন বুকের উপর কেবল ঢেউএর পর ঢেউ গড়াইয়া যাইতেছে, আর তাহাতে সাদা ফেনাগুলি ভাসিয়া যাইতেছে। শ্রীমন্ত অনেকক্ষণ ধরিয়া সেই সুন্দর অদ্ভুত দৃশ্য দেখিল, দেখিয়া ভাবিল, ইহা হয়ত কোনও দেবতার ছলনা। যাহা হউক, ইহা সিংহলের অতি নিকটে, সিংহলে গিয়া এ কথা সেখানকার রাজ-সভায় বলিব, রাজ-সভায় অনেক পণ্ডিত থাকেন, তাঁহারা নিশ্চয়ই এ বিষয় জানেন, তাহা হইলেই ব্যাপারটা বুঝিতে পারা যাইবে।

সেখান হইতে শ্রীমন্তের সাত ডিঙ্গা যাইয়া সিংহলের রত্নমালা ঘাটে লাগিল। ঘাটে নৌকা বাঁধিয়া মাঝি মাল্লারা উপরে উঠিয়া বাজনা বাজাইয়া সদাগরের আগমন ঘোষণা করিল। সেই বাজনার শব্দে কোটাল আসিয়া শ্রীমন্তের পরিচয় জিজ্ঞাসা করিল। শ্রীমন্ত বলিল, “আমি বিদেশী সদাগর, বাণিজ্য করিতে এ দেশে আসিয়াছি।”

কোটাল বলিল, “যদি বাণিজ্য করিতে সিংহল আসিয়া থাক, তবে আগে গিয়া রাজার সাথে দেখা করিয়া আইস। যদি চুরি ডাকাতি হয়, তবে আমার মাথা কাটা যাইবে। বিদেশী লোক এদেশে আসিলে রাজার হুকুম লইয়া এদেশে থাকিতে হয়। আর আমি এ দেশের কোটাল, আমাকে পঞ্চাশ কাহন বখশিস্ দিতে হইবে।”

কোটালের কথা শুনিয়া শ্রীমন্তের বড় রাগ হইল, সে বলিল, “এইসবে ঘাটে আসিয়া ডিঙ্গা বাঁধিলাম, জলটুকু অবধি মুখে দেই নাই, এখনই কি রাজার কাছে না গেলে নয় ? বখশিস্ টখশিস্ এখানে কিছু মিলিবে না বাপু ।”

কোটাল বলিল, “তুই বেটা নিশ্চয়ই ডাকাত, সাধুর চঙ্গ করিয়া আসিয়াছিস্, স্ত্রীবিধা পাইলেই গৃহস্থের পাড়ায় ঢুকিয়া ডাকাতি করিয়া পলাইয়া যাইবি । বাণিজ্য টানিজ্য ওসব কিছু নয়, অনেক বেটাই অমন সদাগরী চঙ্গ ধরিয়া আসিয়া শেষে লুটপাট করিয়া রাতারাতি চম্পট দেয় ।”

শ্রীমন্ত বলিল, “দেখ কোটাল, তুমি লোক চিনিয়া কথা বলিতে জান না । তুমি নিজে যেমন, অন্তকেও তেমনি মনে কর । আমার ধন-দৌলতের কোনো অভাব নাই, কোন্‌ দুঃখে আমি চুরি ডাকাতি করিব ?”

কোটাল বলিল, “অমন মুখে মুখে অনেক বেটাই অনেক কথা বলে । আচ্ছা, যদি তুমি ধনী সদাগর হইয়া থাক, তবে তোমার মাথার ঐ সোণার মুকুটটা সাগরের জলে ফেলিয়া দাও দেখি ।”

শ্রীমন্ত ছেলে মানুষ, টাকারও অভাব নাই তার, কাজেই সে কোটালের কথায় মাথার সোণার মুকুটটা সাগরের জলে ফুড়িয়া ফেলিয়া দিয়া দেখাইয়া দিল যে,—হ্যাঁ আমি একজন ধনী সদাগর বই কি ?

## শ্রীমন্ত

ভগবতী তখন পদ্মাবতীকে সাথে লইয়া আকাশ পথে যাইতেছিলেন। তিনি শ্রীমন্তের কাণ্ডটা দেখিয়া পদ্মাকে বলিলেন, “দেখিলে পদ্মা, খুল্লনার ছেলে শ্রীমন্ত একটা কত বড় বোকা, কোটালের কথায় সে অনায়াসে অমন সোণার মুকুটটা সাগরের জলে ফেলিয়া দিল ! খুল্লনা রোজ আমার পূজা করে, আমি তাহাকে অভিশাপ দিয়া স্বর্গ হইতে পৃথিবীতে আনিয়াছি, বনে দেখা দিয়া তাহার মঙ্গল করিবার জন্ম তাহার কাছে প্রতিজ্ঞা করিয়াছি ; আজ তাহার ছেলে খামখেয়ালী করিয়া লক্ষ টাকার সোণার মুকুটটা নষ্ট করিয়া ফেলিতে বসিয়াছে, ইহা আমি স্বচক্ষে দেখিয়া সহ্য করিতে পারিব না। এক মাত্র পুত্র শ্রীমন্তকে সিংহলে পাঠাইয়া খুল্লনা কাঁদিয়া কাটিয়া ভাবিয়া চিন্তিয়া দিন কাটাইতেছে, চল পদ্মা, এই মুকুট লইয়া তাহার কাছে গিয়া একটু প্রবোধ দিয়া আসি।” এই বলিয়া দেবী জল হইতে মুকুট তুলিয়া লইয়া উজানী নগরের দিকে চলিলেন।

খুল্লনা তখন ঘরে জানালার ধারে বসিয়া নোলাকাশের দিকে চাহিয়া শ্রীমন্তের কথা ভাবিতেছিল। ভগবতী যাইয়া তাহাব সম্মুখে মুকুটটা ফেলিয়া দিলেন। শ্রীমন্তের মুকুট দেখিয়া খুল্লনা চমকিয়া উঠিল, একি ! এ যে শ্রীমন্তের মাথার টোপর, বাণিজ্যে যাইবার সময় সে নিজেই যে উহা শ্রীমন্তের মাথায় পরাইয়া দিয়াছে, আজ কত দিন হয় শ্রীমন্ত

সিংহল যাত্রা করিয়াছে, এত দিন পরে এই মুকুট কোথা হইতে আসিল ? মায়েৰ প্রাণ কাঁদিয়া উঠিল, চোখের জলে তাহার বুক ভাসিয়া গেল। সে ভগবতীকে ডাকিয়া বলিতে লাগিল, “মা, আমার আবার কোন্ সৰ্বনাশ হইল ?”

ভগবতী তাহার নিকট উপস্থিত হইয়া বলিতে লাগিলেন, “খুল্লনা, তুমি দিন রাত কান্নাকাটি কর, এই জন্ত হোমাকে প্রবোধ দিতে আসিলাম। তোমার কোনই চিন্তা নাই, তুমি নিশ্চিন্ত হইয়া থাক। শ্রীমন্ত নিরাপদে সিংহলে পৌঁছিয়াছে। সেগানকার কোটালের কথায় সে এই টোপের সমুদ্রের জলে ফেলিয়া দিয়াছিল, আমি তাহা তুলিয়া লইয়া আসিয়াছি। তাহার জন্ত তোমার কোনো চিন্তা নাই, আমি বিপদে আপদে তাহাকে রক্ষা করিব, তারপর সেগানকার রাজকন্যা বিবাহ করাইয়া আমি তোমার কোলের ছেলে আবার তোমার কোলে ফিরাইয়া আনিব।”

খুল্লনা বলিল, “মা, আপনার দয়াতেই আমি পুত্রের মুখ দেখিখাছি, যাহা আপনি নিজে দয়া করিয়া দিয়াছেন, তাহা যদি আপনি না রক্ষা করেন, তবে আর কে রক্ষা করিবে ? আমি ছিরাইকে আপনার পায়ে সাঁপিয়া দিয়াছি, এখন আপনার চরণই আমার ভরসা।”

খুল্লনাকে প্রবোধ দিয়া ভগবতী কৈলাসে চলিয়া গেলেন।

শ্রীমন্ত নানা জিনিসে ভেট সাজাওয়া রাজসভায় গিয়া উপস্থিত হইল। রাজা ভেটের জিনিস দেখিয়া পরম আনন্দিত হইয়া জিজ্ঞাসা করিলেন, “তুমি কে, কি উণ্ড সিংহলে আসিয়াছ?”

শ্রীমন্ত বলিল, “মহারাজ, আমার বাড়ী বঙ্গদেশে, উজানী নগরে। আমরা জাতিতে গন্ধবর্ণক, নাম শ্রীমন্ত দত্ত। রাজা বিক্রনকেশরীর আদেশে বাণিজ্য করিবার জন্য আপনার রাজ্যে আসিয়াছি।”

রাজা জিজ্ঞাসা করিলেন, “কি কি জিনিষ লইয়া বাণিজ্য করিতে আসিয়াছ?”

শ্রীমন্ত বলিল, “মহারাজ, আমাদের দেশে যে সব জিনিষ বেশী পাওয়া যায়, তাহা লইয়াই বাণিজ্য করিতে আসিয়াছি। সে সব জিনিসের বদলে যাহা আপনার রাজ্যে বেশী পাওয়া যায় এবং আমাদের দেশে মোটেই পাওয়া যায় না বা তল্প পাওয়া যায় তাহা লইয়া যাইব। আমি নারিকেলের বদলে শঙ্খ, বিড়ঙ্গের বদলে লবঙ্গ, বহরার বদলে শুপারী, সিন্দূরের

বদলে হিঙ্গুল, পাট ও শণের বদলে চামর, চই এর বদলে চন্দন, বিনুকের বদলে মুক্তা, লবণের বদলে সৈন্ধব লইয়া যাইব। ইহা ছাড়া মাষ, মসুরী, চিনা, মুগ, তিল, মাড়ুয়া, ছোলা ইত্যাদি লইয়া আসিয়াছি।”

রাজা বলিলেন, “বেশ্, তুমি আমার রাজ্যে ইচ্ছামত বাণিজ্য করিতে পার।”

রাজ-সভায় সভা-পণ্ডিত অগ্নিশর্মা বসিয়াছিলেন, শ্রীমন্ত তাঁহাকেও কিছু ভেট দিয়া প্রণাম করিল। পণ্ডিত সন্তুষ্ট হইয়া তাহাকে অশীর্ব্বাদ করিয়া জিজ্ঞাসা করিলেন, “পথে কুশলে আসিয়াছ ত? কোনও কষ্ট হয় নাই? পথে কি কি দেখিলে বল শুনি।”

শ্রীমন্ত বলিতে লাগিল, “রাজার আদেশে সাত ডিঙ্গা লইয়া কত নদনদী বাহিয়া কত দেশ বিদেশের মধ্য দিয়া ত্রিবেণীর ঘাটে আসিলাম, রাত্রি দিন নৌকা বাহিয়া সাগর-সঙ্গমের কাছে মগরায় আসিয়া বড় বৃষ্টিতে বহু কষ্ট পাইলাম, ভগবতী দয়া করিয়া সে বিপদে রক্ষা করিলেন। সেখান হইতে যাত্রা করিয়া শ্রীক্ষেত্রে জগন্নাথ দেব দেখিয়া কালীদহে পৌঁছিলাম। কালীদহে যাহা দেখিলাম, তাহা জীবনে কেন স্বপ্নেও কোনো দিন দেখি নাই। সে এক অদ্ভুত দৃশ্য, দেখিলাম সমুদ্রের জলের উপর এক প্রকাণ্ড পদ্মের বন, একটা পদ্মের উপর বসিয়া একটা সুন্দরী স্ত্রীলোক একটা হাতী

ধরিয়া একবার গিলিতেছে, আবার বমি করিয়া ফেলিতেছে, আবার গিলিতেছে। তাহার ভারে পদ্মটা থর থর করিয়া কাঁপিতেছে, কিন্তু ডুবিতেছে না।”

রাজা ও পাত্র মিত্র সকলেই শ্রীমন্তের কথা শুনিয়া হাসিয়া উঠিলেন। তাঁহাদের মনে হইল, বহুদিন পূর্বের আর এক সদাগর এমনি কথা বলিয়াছিল, কিন্তু কাজে কিছুই নহে, সব মিছে কথা। এবারও ঠিক তাই।

শ্রীমন্ত তাঁহাদিগকে হাসিতে দেখিয়া বলিল, “আপনারা আমার কথা শুনিয়া হয়ত মনে করিতেছেন, আমি মিথ্যা কথা বলিতেছি, কিন্তু আমি ধর্ম্ম সাক্ষী করিয়া প্রতিজ্ঞা করিতেছি, আমি যাহা বলিয়াছি তাহার এক বর্ণও মিথ্যা নহে। আপনারা যদি দয়া করিয়া আমার সাথে কালীদেহ যান, তবেই দেখিতে পারিবেন আমার কথা সত্য কিনা। যদি আমার কথা মিথ্যা হয়, তবে আমার সাত ডিঙ্গা আপনারা লুটিয়া লইয়া মশানে আমাকে হত্যা করিবেন।”

রাজা বলিলেন, “বেশ কথা, যদি তুমি আমাকে ‘কমলে কামিনী’ দেখাইতে পার, তবে আমি অর্দ্ধেক রাজ্য আর রাজকন্যা স্ত্রীলাকে তোমায় দান করিব; কিন্তু যদি মিথ্যা হয়, তবে তোমার সাত ডিঙ্গা ত বাইবেই তা ছাড়া মশানে তোমার প্রাণ যাইবে।”

তখনই রাজা পাত্র মিত্র লইয়া কালীদেহ চলিলেন।

রাজ্যের লোকেরা যখন সেই অদ্ভুত কথা শুনিল, তখন তাহারাও সেই দৃশ্য দেখিবার জন্য সাথে সাথে চলিল।

কালোদহে ঘাইয়া দেখে, কোথাও কিছুই নাই, কেবল সাগরের নীল জল ঢেউ খেলিয়া বহিয়া চলিয়াছে, পদ্মবনের নাগগন্ধও সেখানে নাই। রাজা রাগিয়া আগুন হইয়া গেলেন। পাত্রমিত্র সকলে বলিতে লাগিল, “কি সদাগর, কোথায় তোমার কমলে কামিনী? ঠাট্টা করিবার বুঝি আর যায়গা পাও নাই, মহারাজের সাথে ঠাট্টা তামাসা করিতে আসিয়াছ?”

শ্রীমন্ত মহারাজের সম্মুখে জোড় হাত করিয়া বলিল, “দোহাই মহারাজ, আমি আপনার কাছে এক তিলও মিথ্যা কথা বলি নাই; আমি স্বচক্ষে যাহা দেখিয়াছি, তাহাই বলিতেছি। হয়ত ইহা কোনও দেবতার মায়া, এত লোকজন দেখিয়া তিনি লুকাইয়া গিয়াছেন। আমার আর কোনও সাক্ষ্য নাই, আমি তাহা দেখিয়া আমার মাঝি-মাল্লাদিগকে দেখাইয়া ছিলাম, তাহাদিগকে আপনি জিজ্ঞাসা করিয়া জানিতে পারেন।”

রাজা মাঝিদিগকে জিজ্ঞাসা করিলেন। মাঝিরা বলিল, “মহারাজ, সাধু আমাদের কাছে সে কথা বলিয়াছিলেন সত্য, কিন্তু আমরা কেহই কিছু দেখিতে পাই নাই।”

পাত্রমিত্র রাজাকে বলিল, “মহারাজ, এ বেটা সাধুও



## ✧শ্রীমন্ত✧

নয়, সদাগরও নয়, নিশ্চয়ই এ বেটা ডাকাত—বদমায়েস, চুরি ডাকাতি করিতে এদেশে আসিয়াছে। ইহার উচিত শাস্তি হওয়া দরকার।”

রাজা তখন সিপাহী লস্করদিগকে শ্রীমন্তের সাত ডিঙ্গা লুট করিয়া রাজভাণ্ডারে লইয়া যাইতে এবং শ্রীমন্তকে বাঁধিয়া দক্ষিণ মসানে নিতে আদেশ করিলেন। সেখানে তাহার প্রাণ দণ্ড হইবে। তখনই সিপাহীরা শ্রীমন্তের গায়ের সমস্ত মণিমুক্তার অলঙ্কার ও সাজ পোষাক কাড়িয়া লইয়া তাহাকে নৌকার দড়ি দিয়া বাঁধিয়া ফেলিল। তাহার বাণিজ্যের সমস্ত জিনিষ—ঘোড়া বলদ, মহিষ ও গাড়ী বোঝাই করিয়া রাজভাণ্ডারে লইয়া যাওয়া হইল। শ্রীমন্ত রাজার পায়ে পড়িয়া চোখের জলে মাটি ভিজাইয়া কত কাঁদিল ! কিন্তু পাষণ রাজা তাহার সে কান্না কানেই তুলিলেন না। তাহাকে মসানে লইয়া যাওয়ার জন্ত আদেশ করিয়া তিনি হাসিমুখে পাত্রমিত্রদিগকে লইয়া রাজসভায় চলিয়া গেলেন।

শ্রীমন্তকে তখনই মসানে লইয়া যাওয়া হইল। সেখানে তাহার মাথা কাটা হইবে। ঘাতক তীক্ষ্ণ খড়্গ লইয়া আসিয়া তাহার পাশে দাঁড়াইল। শ্রীমন্ত চোখের জলে ভাসিতে ভাসিতে তাহার নৌকার মাঝিদিগকে কাছে ডাকিয়া বলিল, “ভাই, এখনই ত আমার প্রাণ যাইবে, আর তোমাদের সাথে দেখা হইবে না। মায়ের সাথেও আর জীবনে দেখা হইল না। আমাদের বাণিজ্যের জিনিস সবই রাজা লুণ্ঠ করিয়া লইয়া গিয়াছেন, তোমরা আর এদেশে থাকিও না। ভিক্ষা করিয়া দেশে চলিয়া যাও। দেশে যাইয়া রাজাকে বলিও, শ্রীমন্ত পিতার দেখা পায় নাই, সিংহল-রাজের হুকুমে মসানে তাহার প্রাণ গিয়াছে। রাজা যেন আমার দুই মাকে খাইতে দেন, তাঁহাদের যেন কোনও কষ্ট না হয়। গুরুমহাশয়কে আমার প্রণাম জানাইয়া বলিও, তাঁহার কথাতেই শ্রীমন্ত সিংহলে আসিয়া প্রাণে মরিল। দুর্ব্বলাকে বলিও, সে যেন মায়েদের সেবা শুশ্রূষা করে। আমি মায়ের এক ছেলে, মা যখন আমার মরার খবর পাইবেন, তখনই যে তিনি আমার শোকে ছটফট করিয়া মরিয়া যাইবেন। তাঁহাকে কি বলিয়া এই সংবাদ দিবে ভাই? মা যে আমার কত আশা করিয়া বসিয়া

## শ্রীমন্ত

আছেন। এই কি তাঁহার আশার ফল ফলিল? মাকে আমার এমন করিয়া মরার কথা বলিও না; তাঁহাকে বলিও নৌকা ডুবি হইয়া শ্রীমন্ত মরিয়াছে। আর আমার বলার কিছুই নাই ভাই, তোমরা দেশে ফিরিয়া যাও।”

কোটাল তাহার বিলম্ব দেখিয়া তাড়াতাড়ি কথাবাত্তা শেষ করিবার জন্য গালিগালাজ আরম্ভ করিল। শ্রীমন্তের কাপড়ের আঁচলে কয়েকটা সোনার মোহর বাঁধা ছিল, সে তাহা কোটালের হাতে দিয়া বলিল, “ভাই কোটাল, আর একটু সময় দাও ভাই, আর ত এ জীবনে পৃথিবীর মুখ দেখিব না! জীবনে কোনই ধর্ম্যকাজ করিতে পারি নাই, অদৃষ্টের দোষে আজ মসানে প্রাণ যাইবে। আমায় একটু সময় দাও ভাই, মরার সময় আমি একটু তর্পণ করিয়া লই।” টাকা হাতে পাইয়া কোটাল মনে মনে ভারী খুসী হইয়া বলিল, “নাও তাড়াতাড়ি সারিয়া নাও, আর বেশী সময় দিবার লুকুম নাই।”

সেই মসানের ধারে একটা সরোবর ছিল। শ্রীমন্ত তাহাতে স্নান করিয়া তিলক ফোঁটা কাটিয়া ঘাটের উপর তর্পণ করিতে বসিল। তর্পণ শেষ করিয়া সে সূর্যকে নমস্কার করিয়া বলিতে লাগিল, “সূর্য্য দেব, তুমি ত পৃথিবীর সবই দেখিতেছ, আমি যে কমলে কামিনী দেখিয়াছি তাহা ত মিথ্যা কথা নহে, সত্য কথা বলিয়া আজ আমার প্রাণ যাইতেছে। যদি আমার কথা সত্য হয়, তবে যেন আমার প্রাণ রক্ষা হয়, আর

যদি মিথ্যা কথা বলিয়া থাকি, তবে যেন প্রাণ যায়। আমার আর অন্য কোনও প্রমাণ নাই, তুমিই আমার একমাত্র সাক্ষী।”

শ্রীমন্ত এইরূপে সূর্য্যের স্তব করিতেছে; কোটাল তাহার দেরি দেখিয়া চুল ধরিয়া তাহাকে উপরে টানিয়া তুলিতে তুলিতে বলিতে লাগিল, “বেটা ভণ্ড, ডাকাতি করিতে সিংহলে আসিয়া আবার লোক দেখানো পূজা তর্পণ আরম্ভ করিয়াছিস্, এখনই এই মাথা দুইখণ্ড হইয়া মাটিতে গড়াগড়ি করিবে, মরার সময় আবার কিসের পূজা?” কোটালের সাথে সিপাহী বরকন্দাজ যাহারা আসিয়াছিল, তাহারা শ্রীমন্তের চুলের মুঠা ধরিয়া তাহাকে হিচ্‌ড়িয়া টানিয়া উপরে তুলিয়া ঘাতককে মাথা কাটিয়া ফেলিতে হুকুম করিল। ঘাতক খড়গ উঠাইল, সূর্য্যের কিরণে খড়গ বিক্‌ মিক্‌ করিয়া বলসিয়া উঠিল। এমন সময় শ্রীমন্তের চক্ষু হঠাৎ সরোবরের জলে পড়িল, সে দেখিল জলে ফুল ও দূর্ব্বা ভাসিতেছে, তখনই তাহার মায়ের কথা মনে পড়িল, যাত্রা করিয়া সিংহলে আসিবার সময় তাহার মা তাহাকে ভগবতীর আশীর্ব্বাদী ফুলদূর্ব্বা সাথে দিয়া বন্দিয়া দিয়াছিল, সম্পদে বিপদে ভগবতীর স্মরণ করিবে। কিন্তু কই, সে ত একবারও ভগবতীকে স্মরণ করে নাই। সে তখন কোটালের পায়ে ধরিয়া বলিতে লাগিল, “ভাই কোটাল, এতক্ষণ যখন সময় দিয়াছ, আর একটু সময় আমাকে ভিক্ষা দাও, এই মরণ কালে তোমার চরণে আমার এই একমাত্র শেষ প্রার্থনা, আমি

একবার জীবনের শেষ প্রাণ ভরিয়া মা ভগবতীকে ডাকিয়া লই।” তাহার অমন কথা শুনিয়া নিষ্ঠুর কোটালের মনেও একটু দয়া হইল। সে বলিল, “এইবার কিন্তু শেষ, আর চালাকি করিলে চলিবে না, যাহাকে ডাকিতে হয় প্রাণ ভরিয়া ডাকিয়া নেও।”

শ্রীমন্ত চোখ বুজিয়া বসিয়া ভগবতীর মূর্তি ধ্যান করিতে লাগিল। তাহার ধ্যানে কৈলাশে ভগবতীর আসন নড়িয়া উঠিল। তাহা দেখিয়া তিনি পদ্মাবতীকে জিজ্ঞাসা করিলেন, “পদ্মা, তুমি গণিয়া দেখ দেখি, দেবতা, মানুষ, যক্ষ, রক্ষ, পিশাচ, নাগ, দৈত্য, দানব কে আমাকে ডাকিতেছে? তাহার ধ্যানে আমার আসন টলিতেছে—মন চঞ্চল হইয়া উঠিতেছে।”

পদ্মাবতী গণিয়া বলিলেন, “ভগবতি, তোমার দাসী খুল্লনার ছেলে আজ সিংহলের মসানে বসিয়া তোমাকে ডাকিতেছে। এখনই মসানে রাজার ভকুমে তাহার প্রাণ যাইবে, এই মরণ সময়ে সে তোমাকে ডাকিতেছে। তুমিই তাহার এই মৃত্যু ঘটাইলে, তুমি মায়া করিয়া বালীদহে কমলে কামিনী হইয়াছিলে, শ্রীমন্ত তাহা দেখিয়া রাজাকে সেই কথা বলিয়াছিল, রাজা কমলে কামিনী দেখিতে চাহিয়াছিল, কিন্তু শ্রীমন্ত তাহা দেখাইতে পারে নাই, সেই অপরাধে এখনই মসানে তাহার প্রাণ যাইবে। খুল্লনা দিনরাত তোমার পূজা করে, সেই পূজার ফলে বুঝি তুমি তাহার একমাত্র পুত্রকে এমন করিয়া মারিয়া

ফেলিবার ফন্দি করিয়াছ ? ছেলে মরিলে খুল্লনাও সেই শোকে মারা যাইবে, তাহা হইলে পৃথিবীতে আর কেহ তোমার পূজা করিবে না। পূজা প্রচার করিবার জন্ম এতদিন যত চেষ্টা করিলে সমস্তই বুথা হইল। এখন লোকে তোমার নিন্দা ছাড়া পূজা কখনই করিবে না। এখনই গিয়া শ্রীমন্তকে রক্ষা কর।”

পদ্মাবতীর কথা শুনিয়া শ্রীমন্তের জন্ম ভগবতীর বড়ই দুঃখ হইল, আর রাগ হইল সিংহলের রাজার উপর। তিনি তখনই তাঁহার আট হাজার যোগিনীকে সাজাইয়া সাথে লইয়া নিজে দশভুজা সিংহবাহিনী মূর্তিতে দশ হাতে দশ অস্ত্র ধরিয়া যুদ্ধের জন্ম সিংহলে চলিলেন। ভূত, প্রেত ও যোগিনীগণের টাংকারে—অস্ত্রের বান্ধনিতে স্বর্গের দেবতারা পর্য্যন্ত ভয়ে কাঁপিতে লাগিলেন। আজ বুঝি ভগবতী পৃথিবী রসাতলে দিতে যাইতেছেন। স্বর্গের রাজা ইন্দ্র তখনই দেবর্ষি নারদকে ভগবতীর কাছে পাঠাইয়া দিলেন। নারদ যাইয়া দেবীর পায়ের ধূলা মাথায় লইয়া বলিলেন, “মা, একি ! আজ কি আপনি স্বর্গ মর্ত্য পাতালে প্রলয় ঘটাইবেন ? আজ আপনিই যে স্বয়ং যুদ্ধে সাজিয়াছেন ? একজন মানুষ রাজার বিরুদ্ধে যুদ্ধ করিতে আপনার এত সাজ সজ্জার ত কোনই দরকার নাই। আপনি ইচ্ছা করিলেই স্বর্গ মর্ত্য পাতাল ওলট পালট করিয়া দিতে পারেন। মশা মারিতে কামান দাগিবার প্রয়োজন কি ? মানুষের বিরুদ্ধে আপনার যুদ্ধ কিছুতেই শোভা পায় না।

আপনি দয়া করিয়া এসব যুদ্ধের আয়োজন পরিত্যাগ করিয়া বৃদ্ধা ব্রাহ্মণী বেশে সিংহলে যাইয়া কোটালের নিকট হইতে শ্রীমন্তকে চাহিয়া লইয়া আনুন। যদি না দেয়, তবে যুদ্ধের আয়োজন করিবেন।”

নারদের কথায় ভগবতী সেই ভীষণ মূর্তি পরিত্যাগ করিয়া বৃদ্ধা ব্রাহ্মণী সাজিলেন। তাঁহার মাথায় পাকাচুল, মুখে একটাও দাঁত নাই, গায়ের চামড়া ঝুলিয়া পড়িয়াছে, শরীর একেবারে রোগা, মাথা ঠক্ ঠক্ করিয়া নড়ে। তিনি লাঠি ভর করিয়া বাম কাঁখে ভিক্ষার ঝুলি লইয়া নুইয়া নুইয়া ধীরে ধীরে হাটিতে হাটিতে যাইয়া মসানে উপস্থিত হইলেন। তখনো শ্রীমন্ত ধ্যানে বসিয়া আছে, যাতক কাছেই খড়গ লইয়া দাঁড়াইয়া রহিয়াছে। ভগবতী কোটালের মাথায় হাত দিয়া আশীর্ব্বাদ করিয়া বলিলেন, “বাবা কোটাল, আমি বড় গরীব বামুণের মেয়ে, তোমার কাছে একটা ভিক্ষার জল আসিয়াছি। দেখিতেছ আমার শরীর কত রোগা, এমন কেহ আমার নাই যে একবার আমার দিকে ফিরিয়া চায়। এই নাতিটা আমার সম্বল। ছেলে মানুষ খেলিতে খেলিতে এদেশে আসিয়া পড়িয়াছে, বুদ্ধিশুদ্ধি ত আর তেমন হয় নাই, কাজেই কি বলিতে কি বলিয়াছে। তুমি বাবা ইহাকে ছাড়িয়া দাও। আমার আশীর্ব্বাদে তুমি ধনে পুত্রে লক্ষীবন্ত হইবে। আমার ডুংখের কথা কি বলিব বাবা, ছেলেবেলায় তপস্যা করিয়া কপাল-



মশানে শ্রীমন্ত





দোষে এমন স্বামী পাইয়াছি যে, তাঁহার সম্বলের মধ্যে আছে একটা ষাঁড়, ষাঁড়ে চড়িয়া শ্মশানে মসানে ঘুরিয়া বেড়ান, আর গাঁজা ভাজ সিদ্ধি খান, সংসারের কোনো ধার ধারেন না। ভাই ছিল আমার একটা, সে সমুদ্রে ডুবিয়া মরিল, স্বামী বিষ খাইলেন। বড় ছুঃখের কপাল বাপু আমার। দাও বাবা, বড় বেলা হইয়া গেল, অনেক দূর যাইতে হইবে, হাটিতে আর পারি না, ছিরার কাঁধে ভর দিয়া কোনও রকমে ধীরে আস্তে যাইব, ছিরাকে ভিক্ষা চাই।”

কোটাল বলিল, “আমি রাজার হুকুম পালন করিতে আসিয়াছি মাত্র, ইহাকে ছাড়িয়া দেওয়ার আমার কোনই ক্ষমতা নাই। তুমি ইহার আশা ছাড়িয়া দাও, রাজা ইহার প্রাণদণ্ডের হুকুম দিয়াছেন। যদি নিতাস্তই ইহার প্রাণ ভিক্ষা চাও, তবে রাজার কাছে যাও, তিনি বড় দানশীল, দয়া করিলেও করিতে পারেন। আমি যদি তোমাকে ইহার প্রাণ দান করি তবে রাজা আমার প্রাণ লইবেন।”

কোটালের কথা শুনিয়া ভগবতী পদ্মাবতীকে স্মরণ করিলেন। পদ্মা আসিয়া ভগবতীর কাণে কাণে বলিলেন, “রাজসভায় অত লোকের মাঝে তুমি কেন যাইবে? শ্রীমন্তকে কোলে লইয়া বস, দেখি কোটাল কেমন করিয়া তাহার প্রাণ লইতে পারে।”

ভগবতী হাসিয়া শ্রীমন্তকে কোলে লইয়া বসিলেন।

ঘাতক কোটালকে বলিল, “কোটাল ভাই, ব্যাপার কি ? বুড়ী একা আসিয়াছিল, এখন দেখি দুই জন হইল। এই মসানে বুড়ী যে হঠাৎ কোথা হইতে আসিল, তাহাও দেখিলাম না। বুড়ী সদাগরের প্রাণ ভিক্ষা চাহিল, তাহা না পাইয়া তাহাকে কোলে করিয়া বসিল। আশী বছরের বুড়ী, কিন্তু তাহার চোখ দিয়া যেন রাগে আগুন জ্বলিতেছে। আমার মনে হয়, কোনও দেবতা ইহাকে রক্ষা করিতে চন্দ্রবেশে আসিয়া উপস্থিত হইয়াছে। তাহা না হইলে এত সিপাহী লস্কর দেখিয়াও বুড়ীর মনে ভয় হয় না। আজ যে কপালে কি আছে কে জানে ? যদি সদাগরকে ছাড়িয়া দিয়া যাই, তবে রাজার হাতে আমাদের প্রাণ যাইবে ; আর যদি সদাগরের প্রাণ লইতে চাই, তবে না জানি মসানে আমাদেরই প্রাণ যায়।”

কোটাল তাহার কথায় গর্জিয়া বলিল, “এই বুড়ী বামণীকে ঠেলিয়া ফেলিয়া সদাগরের চুলের মুঠা ধরিয়া মাথাটা কাটিয়া লও।”

ঘাতক যেমন শ্রীমন্তের মাথায় খড়েগর ঘা মারিল, খড়্গখানা অমনি বাম্ বাম্ করিয়া ভাঙ্গিয়া পড়িয়া গেল। শ্রীমন্তের গায়ে একটুও কাঁটার আঁচড় লাগিল না। এক দুই তিন করিয়া কয়েকখানা খড়্গ শ্রীমন্তের গায়ে লাগিয়া দুই খণ্ড হইয়া গেল, কিন্তু শ্রীমন্তের কিছুই হইল না দেখিয়া কোটাল ভাবিল, এই বুড়ীই যত অনর্থের মূল, ইহাকে সরাইতে না

পারিলে আর কার্য্য সিদ্ধি হইবে না, বুড়ী যেন কি মায়া জানে । এই ভাবিয়া সে ব্রাহ্মণীকে বলিল, “ছাখ্ বুড়ি, এখনই এখান হইতে দূর হ, তাহা না হইলে তোর মাথা এই মসানের ধূলায় লুটাইবে । শ্রীলোক বলিয়া আমরা এতক্ষণ কিছু বলি নাই, আর আমরা তাহা মানিব না, ডাইনী বুড়ী তুই কোথা হইতে আসিয়া আমাদের এক পলকের কাজে এত গোলমাল বাঁধাইয়া দিলি । এখনই সরিয়া যা, না গেলে এই সিপাহী লস্কর দিয়া আগে তোর মাথা কাটাইব ।”

ভগবতী কোনও কথা বলিলেন না ; যেমন বসিয়াছিলেন, শ্রীমন্তকে কোলে লইয়া তেমনি বসিয়া রহিলেন । কোটাল তাহার গায়ে খড়্গ মারিল, খড়্গ দুই খণ্ড হইয়া ভাঙ্গিয়া পড়িল । সিপাহী লস্কর আসিয়া তাঁহাকে ঠেলিয়া ফেলিবার জন্ত টানাটানি করিতে লাগিল । ইহা দেখিয়া পদ্মাবতী ঘণ্টা বাজাইয়া নাগিনী, ডাকিনী, দানা ও পিশাচদিগকে ডাকিলেন । তাহারা যে যাহাকে সম্মুখে পাইল, তাহারই ঘাড় মটকাইয়া রক্ত খাইতে লাগিল । রাজার সিপাহী লস্করের সহিত ভগবতীর ডাকিনী, নাগিনী, ভূত, পিশাচদিগের ভীষণ যুদ্ধ বাঁধিয়া গেল । একে একে রাজার সমস্ত সৈন্য সামন্ত মরিয়া গেল দেখিয়া কোটাল উপায় না দেখিয়া রাজাকে গিয়া জানাইল, “মহারাজ, সদাগরকে লইয়া মসানে গেলাম, কিন্তু এক ব্রাহ্মণী আসিয়া সর্ব্বনাশ ঘটাইল । সে সৈন্য সামন্ত

লইয়া আসিয়া আমাদের সমস্ত সিপাহী লস্কর মারিয়া ফেলিয়াছে। আমার মনে হয় বুড়ী কোনও রাজার দূত হইয়া আসিয়াছে, কোনও বিদেশী রাজা নিশ্চয়ই যুদ্ধ করিবার জন্য আসিয়া আপনার রাজ্যে উঠিয়াছে; আর রক্ষা নাই মহারাজ, এবার বুঝি সবংশে মরিতে হয়!”

কোটালের কথা শুনিয়া রাজা তখনই সেনাপতিকে সৈন্য সাজাইতে হুকুম দিলেন। রাজ্যময় সাজ সাজ রব পড়িয়া গেল। হাতীশালে হাতী, ঘোড়াশালে ঘোড়া, দুর্গে সৈন্য সাজিতে লাগিল। যুদ্ধের বাদ্যে কানে তালা লাগিয়া গেল।

শ্রীমন্ত যুদ্ধের বাজনা ও সৈন্য-সামন্তের কোলাহল শুনিয়া ভগবতীকে বলিল, “মা, আপনি যে-ই হউন, এখন সরিয়া পড়ুন। আমার জন্য কেন আপনি বিপদে পড়িবেন? রাজা বড় দুরন্ত, আর তাহার ষত সৈন্য সামন্ত, তাহাতে সে এক নিমেষে সমস্ত মারিয়া কাটিয়া লণ্ডভণ্ড করিয়া ফেলিবে। আপনি স্ত্রীলোক হইয়া এই সামান্য লোকজন লইয়া অত সৈন্য সামন্তের সাথে কিছুতেই পারিয়া উঠিবেন না। ঐ শুশুন, রাজার সৈন্য সামন্ত এইদিকে আসিতেছে।”

শ্রীমন্তের কথা শুনিয়া ভগবতী হাসিয়া কহিলেন, “তোমার কোনো ভয় নাই বাছা, রাজা লোকজন লইয়া বাজনা বাজাইয়া তাহার মেয়ের সাথে তোমার বিবাহ দিতে আসিতেছে।”

ভগবতী আরও দৈত্য, দানব, ভূত, প্রেত, যক্ষ, রক্ষ, পিশাচ, নাগিনী, যোগিনী, ডাকিনী ও ভূতিকে স্মরণ করিলেন। অমনি ভীষণ ভীষণ অস্ত্রশস্ত্র লইয়া তাহারা আসিয়া যুদ্ধস্থলে উপস্থিত হইল। ভগবতী নিজে বুদ্ধা ব্রাহ্মণী বেশ পরিত্যাগ করিয়া দশহাতে দশ অস্ত্র লইয়া দশভুজা মূর্তিতে দেখা দিলেন।

দুই দলে ভীষণ যুদ্ধ আরম্ভ হইল। ভগবতীর সেনারা রাজার সৈন্যদিগের মাথা চিবাইয়া রক্ত শুষিয়া খাইয়া আনন্দে তাথে তাথে করিয়া নাচিয়া যুদ্ধ করিতে লাগিল। এইরূপে রাজার সৈন্য, সামন্ত, সিপাহী, লস্কর, হাতী, ঘোড়া, অস্ত্রশস্ত্র সবই শেষ হইয়া গেল। মসানে রক্তের চোট খেঁচে আরম্ভ করিল, মড়া পড়িয়া পড়িয়া পাহাড়ের মত উঁচু হইয়া উঠিল।

দূতের মুখে যখন রাজা শুনিলেন যে, তাঁহার সমস্ত সৈন্যই মরিয়াছে তখন তাঁহার প্রাণ চমকিয়া উঠিল। দূত বলিল, “মহারাজ, আর রক্ষা নাই, এবার সবংশে মরিতে হইবে। স্বয়ং ভগবতী যুদ্ধে আসিয়াছেন। যদি রক্ষা

পাইতে চান তবে এখনই মসানে গিয়া তাঁহার পায়ে পড়িয়া ক্ষমা ভিক্ষা করুন, নচেৎ আর উপায় নাই মহারাজ।”

রাজা তখনই উদ্ধ্বাসে মসানে গিয়া গলায় কাপড় দিয়া ভগবতীর পায়ে উপর উপর হইয়া পড়িয়া বলিতে লাগিলেন, “মা, আমাকে ক্ষমা করুন. আপনি দয়া না করিলে আর রক্ষা নাই, আমার রাজ্য চারেখারে যাইবে। আমি জানি না মা, আপনি যুদ্ধে আসিয়াছেন, তাহা জানিলে আমি আগেই আসিয়া আপনার পায়ে ক্ষমা চাহিতাম। আপনার অজ্ঞান সন্তানকে ক্ষমা করুন মা।”

রাজার স্তবস্তুতিতে দেবীর প্রাণ দয়ায় গলিয়া গেল। তিনি বলিলেন, “শালবান, তুমি বড়ই অত্যাচার করিয়াছ; এই বালক আমার দাস, সে বাণিজ্য করিতে সিংহলে আসিয়াছে, আর তুমি তাহার সাত ডিঙ্গা লুণ্ঠ করিয়া লইয়া মসানে তাহার প্রাণদণ্ডের আদেশ দিয়াছ। সে তোমার রাজ্যে চুরিও করে নাই, নিতান্ত ছেলেমানুষ সে, বিনা অপরাধে তাহাকে তুমি অমন শাস্তির ছকুম দিলে। যদি তুমি শ্রীমন্তকে তাহার সমস্ত জিনিস ফিরাইয়া দিয়া পরম সমাদরে তাহার সহিত তোমার কন্যা সুশীলার বিবাহ দেও, তবে আমি তোমার সব অপরাধ ক্ষমা করিব।”

রাজা বলিলেন, “মা, এখন জানিলাম যে, সদাগর আপনার ভক্ত। আগে জানিলে আমি ইহার প্রতি এমন

বাবহার কখনই করিতাম না। সদাগর রাজসভায় পাত্র-মিত্রের সম্মুখে এক অসম্ভব কথা বলিয়া প্রতিজ্ঞা করিয়াছিল। সে আমাকে কালীদহে কমলে কামিনী দেখাইতে চাহিয়াছিল; যদি না দেখাইতে পারে, তবে তাহার সাত নৌকা আমার রাজ-ভাণ্ডারে যাইবে, আর দক্ষিণ মসানে তাহার প্রাণ দণ্ড হইবে। কিন্তু সদাগর তাহা দেখাইতে পারে নাই, এমন কি মানি-মাল্লারাও পর্যন্ত সে কথা অস্বীকার করিয়াছে। মা, আপনি আমার প্রতি একটা মন্ত বড় অগ্রায় আদেশ করিয়াছেন, আমি জাতিতে ক্ষেত্রি হইয়া কিরূপে বণিকের ছেলের সাথে মেয়ের বিবাহ দিব? আমাকে এজন্য যে সমাজে নিন্দা পাইতে হইবে।”

ভগবতী বলিলেন, “আমার কথার চেয়ে তোমার সমাজটা কি এমনই বেশী হইল? আমি বলিতেছি, এজন্য সমাজে তোমার কোনই নিন্দা হইবে না। শ্রীমন্ত তোমার কাছে কোনই মিথ্যা কথা বলে নাই, কালীদহে সত্য সত্যই সে কমলে কামিনী দেখিয়াছে। সে তোমাকে তাহা দেখাইবে, যদি না দেখাইতে পারে, তবে তুমি তাহার প্রাণ লইও, আমি আর কোনও কথাই বলিব না।”

ভগবতীর কথা শুনিয়া রাজা কমলে কামিনী দেখিতে ইচ্ছা করিয়া পাত্রমিত্র সাথে লইয়া কালীদহে চলিলেন। দেবী বৃদ্ধা ব্রাহ্মণীবেশে শ্রীমন্তের হাত ধরিয়া যাইতে লাগিলেন।



সেখানে উপস্থিত হইয়া ভগবতী বৃদ্ধা ব্রাহ্মণীর বেশ করিত্যাগ করিয়া ষোল বছরের এক পরমা সুন্দরীর রূপ ধরিলেন। সমুদ্রের উপর এক পদ্মের বন সৃষ্টি হইল। দেবী একটি পদ্মের উপর বসিয়া হাতী ধরিয়া গিলিতে লাগিলেন। তাহা দেখিয়া শ্রীমন্তের মুখে হাসি ফুটিয়া উঠিল, সে সকলকে তাহা দেখাইয়া বলিল, “দেখুন মহারাজ, আমি মিথ্যা কথা বলিয়াছি কিনা?”

শ্রীমন্তের নিকট রাজা প্রতিজ্ঞায় হারিয়া গিয়া মুখ নীচু করিলেন। তিনি জোড় হাত করিয়া দেবীকে বলিলেন, “মা, বুকিলাম, সবই আপনার মায়া। আমি শ্রীমন্তের সহিত স্ত্রীলার বিবাহ দিব। কিন্তু মা, এই যুদ্ধে আমার বৃদ্ধ পিতা, আত্মীয় স্বজন ও সৈন্য সামন্ত সমস্তই মরিয়াছে, কাজেই এক বৎসর আমাকে অশৌচ পালন করিতে হইবে। তাহার আগে আমি কিরূপে মেয়ের বিবাহ দিব?”

ভগবতী শ্রীমন্তকে বলিলেন, “তুমি এ বৎসর সিংহলে থাকিয়া রাজকন্যা বিবাহ করিয়া উজানীতে ফিরিয়া যাইও। সেখানে গিয়া আমার পূজার প্রচার করিও। আমি এখান হইতে কৈলাসে চলিলাম।”

শ্রীমন্ত বলিল, “মা, তাহা হইবে না। আমাকে দেশে পৌঁছাইয়া দিয়া তবে আপনি কৈলাশে যাইবেন। নতুবা রাজা আমাকে আবার না জানি কত কষ্ট দিবে।”

পদ্মাবতী ভগবতীকে বলিলেন, “তুমি সমস্ত মৃত সৈন্য-দিগকে বাঁচাইয়া দাও, তাহা হইলে শ্রীমন্তের বিবাহের জন্য আর এক বৎসর বিলম্ব করিতে হইবে না। শীঘ্র তাহার বিবাহ দিয়া তাহাকে দেশে পৌঁছাইয়া শেষে আমরা কৈলাশে যাইব।”

ভগবতী তখনই হনুমানকে ঔষধ আনিবার জন্য আদেশ করিলেন। হনুমান তখনই পাহাড় পর্বত খুঁজিয়া বিশল্য-করণী, অস্থি-সঞ্চারিণী, ও মৃতসঞ্জীবনী নামে তিনটি ঔষধ লইয়া আসিল। পদ্মাবতী, জয়া ও বিজয়া তিন জনে ঔষধ বাটিয়া তিনটি কলসীতে রাখিলেন। ভগবতী সেই ঔষধ-জল সমস্ত মড়া সৈন্যের উপর ছিটাইয়া দিলেন। অমনি সৈন্যেরা নাঁচিয়া উঠিয়া ভয়ে বাড়ীর দিকে ছুটিয়া পলাইল। তেমনি করিয়া দেবী হাতী ঘোড়াগুলিকেও বাঁচাইয়া দিলেন।

২৭

ভগবতী পদ্মাবতীকে শ্রীমন্তের বিবাহের শুভ দিন দেখিতে বলিলেন। পদ্মাবতী বিবাহের উপযুক্ত একটা খুব ভাল দিন দেখিয়া দিলেন। তখনই সিংহল রাজ্যের ঘরে ঘরে রাজকন্যার বিবাহের আনন্দ সংবাদ রটিয়া গেল। রাজ্য-ময় একটা তুমুল আনন্দের সাড়া পড়িল। রাজবাড়ীতে গীত

## ❧ শ্রীমন্ত

বাঘ আরম্ভ হইল, আত্মীয় স্বজন সব আসিয়া রাজবাড়ী ভরিয়া গেল ।

শ্রীমন্ত ভগবতীকে বলিল, “মা, আমি দেশ হইতে মনে বড়ই কষ্ট পাইয়া সিংহলে বাবাকে খুঁজিতে আসিয়াছি । তাঁহাকে না পাইলে আমি বিবাহও করিব না, দেশেও যাইব না । বহু বৎসর ধরিয়া পিতার কোনও খোঁজ খবর পাই নাই, নানা লোকে নানা কথা বলিতেছে ; এমন সময় যদি আমি বিবাহ করিয়া দেশে যাই তবে হয়ত জ্ঞাতীরা চল ধরিয়া বসিবে, কেহই আমার বাড়ী ভাত খাইবে না । যাহাতে আমি বাবাকে পাইতে পারি আগে আপনি সে ব্যবস্থা করুন । আমি যখন সিংহলে আসি তখন এক গণক বামুন আমায় বলিয়া দিয়াছেন, যে পিতা কারাগারে বন্দী হইয়া আছেন । আপনি যখন আমাকে এত দয়াই করিয়াছেন, তখন আমি যে জন্ম সিংহলে আসিয়াছি, যাহাতে সে কাণ্ড সিদ্ধ হয়, দয়া করিয়া তাহাই করুন, আর আমি কিছুই চাই না ।”

ভগবতী রাজাকে বলিলেন, “শালবান, তুমি আমাকে তোমার বন্দীঘর দান কর ।”

রাজা তখনই দেবীকে তাহা দান করিলেন । দেবী আবার তাণ্ড শ্রীমন্তকে দিলেন । শ্রীমন্তের আদেশে এক একজন করিয়া বন্দী তাহার সম্মুখে আনা হইতে লাগিল । তাহাদের কেহ দশ বৎসর, কেহ বার বৎসর, কেহ পাঁচ বৎসর,

কেহ দুই তিন বৎসর, এমনি করিয়া রাজার কারাগারে বন্দী হইয়া আছে। তাহাদের এক একজনের চুল ও দাঁড়ি গোঁফ জটা ধরিয়া গিয়াছে। হাত পায়ের নখ বড় হইয়া আঁকিয়া বাঁকিয়া গাছের শিকড়ের মত আঙ্গুলে জড়াইয়া গিয়াছে। শ্রীমন্ত নাপিত ডাকাইয়া তাহাদের এক একজনের চুল দাঁড়ি ও নখ কাটাইয়া স্নান করাইয়া ভাল কাপড় পরাইয়া পরিচয় লইতে লাগিলেন, আর প্রত্যেককে বাড়ী যাওয়ার খরচ ও কাপড় দিয়া বাড়ী পাঠাইয়া দিতে লাগিল। এমনি করিয়া প্রায় সাতঘর বন্দী শেষ হইয়া আসিল, তবু শ্রীমন্ত তাহার পিতার দেখা না পাইয়া বড়ই আকুল হইয়া উঠিল। বন্দী-ঘরের সিপাহী আসিয়া বলিল, “সাতঘর বন্দী সবই শেষ হইয়া গিয়াছে, আর একজনও বন্দী নাই।” এই কথা শুনিয়া শ্রীমন্তের মাথায় যেন আকাশ ভাঙিয়া পড়িল, হায় বাহার জন্ম সে এত দুঃখ কষ্ট সহ্য করিল, তাহারই দেখা নাই ! সে সিপাহীদিগকে ভাল করিয়া বন্দী-ঘর খুঁজিয়া দেখিতে বলিল। তাহারা যাঁইয়া এক এক একটা করিয়া ঘর খুঁজিয়া দেখিতে লাগিল। ঘরগুলি ভীষণ অন্ধকার, চামচিকা, ইন্দুর, পেঁচা ও ব্যাঙ ঘরগুলিতে তাহাদের আড্ডা গড়িয়া তুলিয়াছে, দুর্গন্ধে ঘরের ভিতর টিকে সাধ্য কাহার ? সেই অন্ধকারে বন্দীদিগকে হাতড়াইয়া খুঁজিয়া বাহির করিতে হয়। সিপাহীরা সমস্ত ঘর এক এক করিয়া খুঁজিয়া যখন শেষ ঘরটায়

খুঁজিতেছিল, তখন তাহাদের পা একজন বন্দীর গায়ে লাগিল। তাহার বৃকে পাষণ চাপাইয়া রাখা হইয়াছে, অতি ধীরে ধীরে সে নিশ্বাস ফেলিতেছে। সিপাহীরা তাহার চুলের মুঠা ধরিয়া আনিয়া শ্রীমন্তের কাছে হাজির করিল। শ্রীমন্তের আদেশে নাপিত বন্দীর দাড়ি চুল ও নখ কাটিয়া দিল। বন্দীর দিকে চাহিয়া শ্রীমন্তের তাহার মায়ের কথা মনে পড়িল, খুল্লনা তাহাকে বলিয়া দিয়াছিল,—সাধুর গায়ের বর্ণ উজ্জ্বল গৌর, নাকের বাঁ ধারে একটা আঁটিল, কপালে তিল, বেশ উঁচু খাড়া নাক, লম্বা চেহারা, চণ্ডীর ঘট পায়ে ঠেলিয়াছেন বলিয়া পায়ে একটা গোদ আছে। শ্রীমন্ত মনে মনে ভাবিতে লাগিল, ইনিই হয়ত তাহার পিতা ধনপতি সদাগর হইবেন।

ধনপতি শুনিয়াছিলেন, রাজার জামাই আজ সমস্ত বন্দী-দিগকে মুক্তি দিতেছেন। তিনি শ্রীমন্তকে হাত জোড় করিয়া বলিতে লাগিলেন, “ধর্ম্মাবতার, ভগবান আপনার মঙ্গল করুন। আপনি দয়ার সাগর, তাই আজ আমরা দিগকে মুক্তি দিতেছেন, যে বিবাহ উপলক্ষে আপনি এই পুণ্য কাজ করিলেন, মহাদেবের রূপায় আপনার সে বিবাহ সুখের হইবে, আপনি সুখে রাজত্ব করুন, আমি শিব পূজা করিয়া ঠাকুরের কাছে সেই প্রার্থনা করিব। বহু দিন বন্দী হইয়া আছি, আজ আপনার দয়ায় মুক্তি পাইলাম। কিন্তু দেশে ফিরিয়া

বাইবার সম্বল নাই, দয়া করিয়া পথের খরচটা দিয়া দিন, আর একখানা কাপড় আপনার কাছে ভিক্ষা চাই।”

শ্রীমন্ত তাঁহাকে বলিল, “তোমার পরিচয় দাও বন্দী। তোমার কি নাম, কোন্ জাতি, কোথায় বাড়ী, তোমাদের দেশের রাজা কে, কেন এখানে আসিয়া বন্দী হইলে, দেশে তোমাকে কে কে আছে, সব কথা আমায় বল, আমি তোমাকে পুরস্কার দিয়া দেশে পাঠাইব।”

ধনপতি বলিলেন, “আমার নাম ধনপতি দত্ত, আমরা গন্ধৰ্বগণক, বঙ্গদেশে উজ্জয়নী নগরে আমার বাড়ী, রাজার নাম বিক্রম কেশরী। আমি রাজার জন্য শয্যা চন্দন নিতে সিংহলে আসিয়াছিলাম, পথে কালীদহে কমলে কামিনী দেখিয়া আসিয়া রাজসভায় তাহা বলিয়াছিলাম, কিন্তু রাজাকে তাহা দেখাইতে পারি নাই, এই জন্য বার বৎসর বন্দী হইয়া আছি। দেশে আমার দুই স্ত্রী আছে, তাহাদের নাম লহনা ও খুল্লনা, আমার কোনো ছেলেপিলে নাই, তবে আমি যখন বাণিজ্যে আসি তখন খুল্লনার ছয় মাস গর্ভ ছিল, ছেলে কি মেয়ে হইয়াছে জানি না।

ধনপতির কথা শুনিয়া শ্রীমন্তের আর বুঝিতে বাকি রহিল না যে, ইনিই তাহার পিতা ধনপতি। কিন্তু সে পিতাকে তাহার কোনও পরিচয় না দিয়া বলিল, “আজ আপনি আমার এখানে আহার করিবেন, কাল সকালে উঠিয়া আপনাকে

আমি দেশে ফিরিবার ভাল বন্দোবস্ত করিয়া দিব, আপনার কোনই কষ্ট হইবে না।”

ধনপতি স্বীকৃত হইয়া বলিলেন, “আমি বার বৎসর যাবৎ শিবপূজা করিতে পারি নাই, আজ একটু শিবপূজা করিতে চাই। শিবপূজা না করিয়া আমি জল গ্রহণ করিতে পারিব না।”

শ্রীমন্ত আজ রাজ-জামতা হইতে চলিয়াছে, স্ততরাং তাহার কিছুই অভাব নাই, যাহাকে যেই আদেশ করিতেছে সে তৎক্ষণাৎ তাহা করিতেছে। চাকর নফরদিগকে সে ধনপতিকে স্নান করাইয়া শিব পূজার যোগাড় করিয়া দিতে আদেশ করিল, তখনই পাঁচসাত জন চাকর ছুটিয়া আসিয়া কেহ ধনপতির মাথায় সুগন্ধি তেল মাখাইয়া দিল, কেহ কুঙ্কুম চন্দনে গা ঘষিয়া দিল, কেহ মাথায় জল ঢালিতে লাগিল, কেহ গা মোছাইয়া দিল, কেহ গরদের কাপড় পরাইয়া দিল। ব্রাহ্মণেরা শিব পূজার যোগার করিয়া দিলেন, মালী ফুল তুলিয়া লইয়া আসিল। ধনপতি মনের আনন্দে শিবপূজা করিতে লাগিলেন। পূজা শেষ করিয়া উঠিয়া ধনপতির মনে হইল, আজ তাঁহাকে ইহারা এত আদর যত্ন করে কেন! হয়ত শেনে চণ্ডীর কাছে বলি দিবে। কিন্তু যখন শ্রীমন্ত তাঁহাকে লইয়া খাইতে বসিল, তখন তাঁহার মনের সন্দেহ দূর হইল। পিতাপুত্র দুইজন এক যায়গায় খাইতে বসিল, বায়ুণ

সোণার থালায় সোণার বাটীতে পঞ্চাশ ব্যঞ্জন দিয়া ভাত বাড়িয়া আনিয়া দিল। ধনপতি শাকশুভ্র যাহা মুখে দেন, তাহাই যেন তাঁহার মুখে অমৃতের মতন লাগে। বার বছর পরে তিনি আজ পেট ভরিয়া তৃপ্তির সহিত ভাত খাইলেন।

খাওয়া শেষ হইলে সোণার খাটে ধনপতি বিশ্রাম করিতে লাগিলেন। শ্রীমন্ত কিন্তু এখনো পরিচয় দেয় নাই যে, সে ধনপতির ছেলে। সে ধনপতির খাটের পাশে বসিয়া জিজ্ঞাসা করিল, “আপনি কি বাংলা লেখা পড়িতে পারেন?”

ধনপতি বললেন, “বাংলা ও নাগরী দুই-ই আমি পড়িতে জানি।”

শ্রীমন্ত তাঁহার হাতে এক খানা চিঠি দিয়া বলিল, “এ চিঠিখানা পড়ুন।”

ধনপতি পড়িতে লাগিলেন,—“অশেষ মঙ্গলধাম শ্রীমতী খুল্লনা সুন্দরী আমার আশীর্ব্বাদ জানিবা। আজ আমি রাজার আদেশে শঙ্খ চন্দন আনিবার জন্ত সিংহলে চলিলাম। তুমি এখন গর্ভবতী; যদি তোমার মেয়ে হয়, তবে তাহার নাম শশিকলা রাখিয়া ভাল বরে তাহার বিবাহ দিও। আর যদি ছেলে হয়, তবে তাহার নাম শ্রীমন্ত রাখিয়া ভাল করিয়া লেখা পড়া শিখাইও। বার বৎসরের মধ্যে যদি আমি ফিরিয়া



না আসি, তবে তাহাকে আমার সম্মানে সিংহলে পাঠাইয়া দিও। ইতি—

আশীর্ব্বাদক —

শ্রীধনপতি দত্ত ।”

পত্র পড়িয়া ধনপতির চোখ জলে ভরিয়া গেল। তিনি বলিতে লাগিলেন, “এ পত্র আমি আসিবার সময় খুল্লনাকে লিখিয়া দিয়া আসিয়াছিলাম। ইহা কেমন করিয়া সিংহলে আসিল? ইহা যে আমার মানিক ভাণ্ডারে রাখিতে বলিয়াছিলাম, তবে কি কোনও চোর ডাকাত উজানী নগর লুটপাট করিয়া লইয়া আসিয়াছে? হায়, তাহা হইলে বাড়ী ফিরিয়া গিয়া আমি কি দেখিব?”

শ্রীমন্ত তাঁহাকে সান্ত্বনা করিয়া পায়ে ধূলি লইয়া বলিল, “বাবা, দুঃখ করবেন না, আমিই আপনার পুত্র শ্রীমন্ত।” তারপর একে একে সে সমস্ত ব্যাপার ধনপতিকে শুনাইল।

শ্রীমন্তের মুখে সমস্ত কথা শুনিয়া ধনপতি আনন্দে আত্মহারা হইয়া তাকে কোলে তুলিয়া লইলেন। তিনি সমস্ত পৃথিবীর রাজত্ব পাইলেও বুঝি এত সুখী হইতেন না।

শ্রীমন্ত তাঁহাকে বলিল, “আপনি মঙ্গলচণ্ডীর পূজা না করিয়া এত দুঃখ পাইলেন। চণ্ডীর দয়ায় আমি সিংহলে আসিয়াছি, তিনি মশানে আমার শ্রাণ রক্ষা করিয়াছেন, ভগবতীর দয়া না হইলে আজ আপনার সাথে আমার দেখা

হইত না। আপনি মা মঙ্গলচণ্ডীর পূজা করুন, সমস্ত বিপদ দূর হইবে।”

পুত্রের কথায় ধনপতি রাগে জ্বলিয়া উঠিয়া বলিলেন, “আমার বংশে তুই কুপুত্র জন্মিয়াছি। আমাদের বাপ ঠাকুর দাদা চৌদ্দ পুরুষ শিব পূজা করিয়া স্বর্গে গেলেন, আর তুই ডাকিনী দেবতার পূজা আরম্ভ করিয়াছি। আমার প্রাণ যায় তাও স্বীকার, তবু মেয়ে দেবতার পূজা কখনো আঁম করিতে পারিব না।” এই বলিয়া তিনি শ্রীমন্তকে কোল হইতে নামাইয়া দিলেন।

শ্রীমন্ত কোনও উত্তর না দিয়া কিছুক্ষণ চুপ করিয়া থাকিয়া বলিল, “বাবা, সিংহলের রাজা শালবান আমার সাথে তাঁহার মেয়ের বিবাহ দিতে চাহিতেছেন, দিনও স্থির হইয়া গিয়াছে, আপনি অনুমতি দিন।”

ধনপতি রাগিয়া উঠিয়া বলিলেন, “না-না, এ পাপ দেশে বিবাহ করিয়া কাজ নাই। চল, দেশে চলিয়া যাই। রাজা যে কি পাষণ্ড তাহা ত আর বুঝিতে বাকি নাই। মহাদেব দয়া না করিলে তোমারও মসানে প্রাণ যাইত, আঁমিও বন্দী ঘরে পচিয়া মরিতাম। এ দেশে বিবাহ করিলে দেশে যাইয়া একঘরে হইয়া থাকিতে হইবে। দেশে যাইয়া তোমাকে কুলীন ঘরে সাত বিবাহ করাইব। তুমি এ দেশে বিবাহ করিও না।”

শুভ লগ্নে শুভ দিনে রাজকন্যা স্মৃশীলার সাথে শ্রীমন্তের বিবাহ হইয়া গেল ।

ফুল-শয্যা রাত্রিতে ভগবতী খুল্লনার রূপ ধরিয়া শ্রীমন্তের শিয়রে বসিয়া তাহাকে স্বপ্ন দেখাইলেন, “বাছা শ্রীমন্ত, রাজার জামাই হইয়া এ অভাগিনী মাকে ভুলিয়া গিয়াছিন্ ? তুই দেশে ফিরিয়া আসিবি বলিয়া যে কত আশা করিয়া বসিয়া আছি ! তুই এখানে পঞ্চাশ ব্যঞ্জনে ভাত খাস্, সোণার খাটে ঘুমাস্, কিন্তু আমাদের যে এখন দুই বেলা পেট ভরিয়া শাকভাতও জোটে না । রাজা আমাদের বাড়ী ঘর টাকা কড়ি সব কাড়িয়া লইয়া গিয়াছে, আমরা দুই বোন এখন সূতা কাটিয়া খাই । কি কষ্টে যে আমাদের দিন বাইতেছে, তাহা তুই আজ আর বুঝিতে পারিবি না ! আমরা রোগে ভুগিয়া ভুগিয়া মরিতে বসিয়াছি । তোকে দেখিব বলিয়া বুঝি আজও প্রাণ বাহির হয় নাই ।”

স্বপ্ন দেখিয়া শ্রীমন্ত কাঁদিয়া উঠিল । স্মৃশীলা তাহাকে জিজ্ঞাসা করিলে শ্রীমন্ত স্বপ্নের কথা বলিল । স্মৃশীলা কহিল, “স্বপ্ন কি কখনো সত্য হয়, সে জ্ঞান মনে কিছু করিও না ।”

শ্রীমন্ত বলিল, “না স্ত্রীলা, আমার মন কিছুতেই প্রবোধ মানিতেছে না, আমি কালই সাত ডিগ্রা সাজাইয়া বাড়ী রওনা হইব, মা সেখানে কত কষ্টে আছেন, আর আমি ছেলে হইয়া তাঁর দিকে ফিরিয়াও চাহিব না ?”

স্ত্রীলা বলিল, “তুমি অস্থির হইও না, আমি লোক পাঠাইয়া শীঘ্র তাঁদের খবর দিতেছি। লোকের সাথে যথেষ্ট টাকা পয়সা কাপড় চোপড় পাঠাইয়া দিব, তাঁহারা তাহা হইলে খুব সুখে থাকিবেন।”

শ্রীমন্ত বলিল, “না স্ত্রীলা, ও কথা বলিও না, আমি নাড়ী গিয়া নিজ চোখে মাকে না দেখিলে আমার প্রাণ কিছুতেই শান্ত হইবে না।”

স্ত্রীলা বলিল, “তুমি রাজার জামাই, সিংহলের অর্দ্ধেক রাজ্য তুমি পাইবে, তাহা ছাড়িয়া কি তুমি দেশে গিয়া দোকানদারী করিয়া খাইতে চাও ?”

শ্রীমন্ত বলিল, “হাঁ, স্ত্রীলা, আমি তাই চাই। মায়ের হাসি মুখ দেখিয়া শাক ভাত খাইয়াও আমি সুখে থাকিব। যদি তুমি আমার সাথে যাইতে চাও, তবে মন স্থির কর। আমি নিশ্চয়ই দেশে যাইব।”

স্ত্রীলা স্বামীর পায়ে ধরিয়া বলিল, “আর এক বছর এখানে থাকিয়া যাও, তারপর দুই জনেই এক সাথে উজানা যাইব।”

শ্রীমন্ত বলিল, “না সুশীলা, মায়ের জন্ম আমার মন কাঁদিতেছে। জানি না, আমার জন্ম মা যেন কত কাঁদিতেছেন, কতই না কষ্ট পাইতেছেন; আর আমি এখানে রাজসুখে থাকিয়া রাজ-ভোগ খাইব?”

পরদিন ভোর হইতে হইতেই রাজা রাণীর কানে কথাটা গেল। তাঁহারা দুই জনেই শ্রীমন্তকে কত রকমে বুঝাইয়া আরও কিছু দিন সিংহলে থাকিয়া যাইতে বলিলেন। কিন্তু শ্রীমন্ত তাঁহাদিগকেও ঐ একই কথা বলিল। অগত্যা তাঁহারা শ্রীমন্তকে দেশে যাওয়ার অনুমতি দিলেন। সুশীলাও স্বামীর সাথে যাইবে। তখনই সাত ডিঙ্গা মধুকর সাজান হইল। রাজা ধনপতি ও শ্রীমন্তের যে সব জিনিস লুট করিয়া লইয়াছিলেন, তাহাত ফিরাইয়া দিলেনই, তাহা ছাড়া রাজ-ভাণ্ডারের প্রায় অর্দ্ধেক মণিমুক্তা হীরা জহরত নৌকা বোঝাই করিয়া দিলেন।

রাজা ধনপতিকে আলিঙ্গন করিয়া বলিলেন, “বেহাই, অপরাধ লইবেন না, না জানিয়া বড়ই অগ্নায় কাজ করিয়াছি, ক্ষমা করিবেন।”

সদাগর হাসিয়া বলিলেন, “না মহারাজ, আপনার দোষ কি? আমার অদৃষ্টে কষ্ট ছিল, ভোগ করিলাম। সে জন্ম আপনাকে অপরাধী করিব কেন?”

রাজারাণী মেয়ে ও জামাইকে আশীর্বাদ দিয়া বিদায়

দিলেন। তাঁহাদের চোখে জল ঝরিয়া পড়িতে লাগিল।  
সুশীলা মা বাপকে প্রণাম করিয়া কাঁদিতে কাঁদিতে গিয়া  
নৌকায় উঠিল, শ্রীমন্ত ও ধনপতি সাতডিঙ্গা মধুকর সাজাইয়া  
মনের আনন্দে আবার বাড়ীর দিকে চলিল।

১৯

যখন গিয়া তাহাদের সাতডিঙ্গা মধুকর মগরায় পৌঁছিল,  
তখন ধনপতি তাঁহার সেই ছয় ডিঙ্গা ও বাণিজ্য-দ্রব্যের  
শোকে পাগলের মত হইয়া উঠিলেন। তিনি শ্রীমন্তকে  
বলিলেন, “শ্রীমন্ত, তুমি দেশে যাও, আমি আর যাইব না।  
এই মগরায় আমার সর্বনাশ হইয়া গিয়াছে, ছয় ডিঙ্গা ডুবিয়াছে  
কি সুখে আর আমি বাড়ী ফিরিব? যখন সেই মাঝি-মাল্লা-  
দের স্ত্রীপুত্র আসিয়া তাহাদের কথা জিজ্ঞাসা করিবে, তখন  
আমি তাহাদিগকে কি বলিব? কি বলিয়া আমি তাহাদিগকে  
মুখ দেখাইব? এই মগরার জলে ডুবিয়া মরিব। তুমি  
দেশে চলিয়া যাও, রাজাকে বলিও, আমি পথে আসিতে  
আসিতে মরিয়া গিয়াছি। তোমার দুই মাকে সুখে রাখিও,  
তাহাদের যেন কোনও কষ্ট না হয়। শিবপূজা করিতে  
কখনও ভুলিও না। যাহাতে দেশে ও সমাজে সুনাম থাকে,  
সর্বদা সেইদিকে লক্ষ্য রাখিও।”

## শ্রীমন্ত

ধনপতির কথা শুনিয়া শ্রীমন্তের মাথায় যেন বাজ পড়িল। আজ তাহার এত আনন্দ, এত কষ্টের পর সে আজ পিতাকে লইয়া রাজ-কন্যা বিবাহ করিয়া দেশে ফিরিতেছে, এই আনন্দের মধ্যে তাহার পিতার মুখে এ আবার কি সর্বনাশের কথা !

দেখিতে দেখিতে ধনপতি মগরার জলে বাঁপ দিয়া পড়িল। শ্রীমন্ত তখনই জোড় হাত করিয়া মা মা বলিয়া ভগবতীকে ডাকিতে লাগিল। ভগবতী তখনই নৌকার সাথে সাথে আকাশ পথ দিয়া যাউত্যাছিলেন। তাহার দয়ায় মগরার জল এক হাটু হইয়া গেল।

মগরায় জলঝড়ের সময় ধনপতির যে নৌকা ডুবিয়াছিল, ভগবতীর আদেশে সমুদ্রের দেবতা বরুণ তাহা লইয়া গিয়া অতি যত্নে নিজের ভাণ্ডারে রাখিয়া দিয়াছিলেন। মান্নি-মাল্লারাও বরুণের পুরীতে স্থখে ঘুমাউয়া ঘুমাউয়া যেন স্বপ্ন দেখিতেছিল। ভগবতীর আদেশে এখন বরুণদেব বাণিজ্যের দ্রব্যাদি সহ ছয় ডিঙ্গা ও মান্নিমাল্লাদিগকে ফিরাইয়া দিলেন। মান্নীদের মনে ভইতে লাগিল, তাহারা যেন ঘুম হইতে জাগিয়া উঠিল। তাহারা সদাগরকে বলিতে লাগিল, “মাধু, ঝড় বৃষ্টি থামিয়া গিয়াছে, আর এখানে বিলম্ব করিয়া লাভ নাই। চলুন সিংহলের দিকে নৌকা বাওয়া যা'ক।”

ধনপতি হাসিয়া মান্নিদিগকে সমস্ত কথা বুঝাইয়া দিয়া

বলিলেন, “মহাদেবের দয়ায় এবার রক্ষা পাইলাম, জয় শিব শঙ্কর, বিশ্বেশ্বর কি জয় !”

মান্নিমাল্লারাও সাথে সাথে মহাদেবের জয়ধ্বনি করিয়া উঠিল। শ্রীমন্ত চক্ষু বুজিয়া ভগবতীর ধ্যান করিতে লাগিল।

২০

দূত যাইয়া খুল্লনাকে সংবাদ দিল যে, তাহার পুত্র শ্রীমন্ত সিংহলের রাজকন্যা বিবাহ করিয়া পিতাকে লইয়া দেশে ফিরিয়াছে। একদিন দেবী ভগবতীও তাহাকে এই কথাই বলিয়াছিলেন। খুল্লনার তখন আহ্লাদের সীমা রাহল না। সে ও লহনা বৌ বরণ করিয়া আনিতে সাতজন এয়ো এবং বাহুবাজন লইয়া ভ্রমরা নদীর ধারে সদাগরের বহরের কাছে গিয়া উপস্থিত হইল। শ্রীমন্ত দূর হইতে তাহাদিগকে দেখিয়া উঠিয়া আসিয়া লহনা ও খুল্লনাকে প্রণাম করিল। তাহারা আনন্দে শ্রীমন্তকে বুকের ভিতর টানিয়া লইয়া আশীর্ব্বাদ করিল। ধনপতি উপরে উঠিয়া আসিলে তাহারা তাঁহাকে প্রণাম করিয়া দেখিল, তাঁহার সেই সোনার কাস্তি শরীর আর নাই সমস্ত গা দাদে ভরিয়া গিয়াছে, পায়ের গোদটা আরও বড় হইয়াছে। ধনপতি তাহাদিগকে বৌ বরণ করিয়া ঘরে লইয়া যাঁতে বলিলেন। সকলে সোণার টাঁদ বৌ দেখিয়া



ভারী খুসী হইল। লহনা ও খুল্লনা এয়োদিগকে লইয়া বৌ বরণ করিয়া সোণার দোলায় তুলিয়া বাড়ী লইয়া আসিল। পরে পরে ধনপতি ও শ্রীমন্ত বাড়ী আসিলেন। বহুদিন পরে আবার ধনপতির বাড়ীতে আনন্দের ঢেউ উঠিল। শ্রীমন্ত মায়ের কাছে সিংহলের সমস্ত কথা বলিল। খুল্লনা মনের আনন্দে চণ্ডীপূজা করিয়া নগরের সমস্ত লোকদিগকে নিমন্ত্রণ করিয়া প্রসাদ দিল।

কিন্তু এখনো তাহাদের দুঃখের শেষ হয় নাই। তাহাদিগকে আরও বিড়ম্বনা ও দুঃখ কষ্ট সহ্য করিতে হইবে। ধনপতি ও শ্রীমন্ত শঙ্খচন্দন ও রাজ-ভেট লইয়া গিয়া বিক্রম-কেশরী রাজার সভায় হাজির হইলেন। পাত্র, মিত্র, উজীর, নাজীর, মন্ত্রী, কোটালে রাজসভা গন্ গন্ করিতেছে। রাজা তাহাদিগকে পরম সমাদরে অভ্যর্থনা করিয়া বসাইয়া জিজ্ঞাসা করিলেন “সিংহল হইতে ফিরিতে এত বিলম্ব হইল কেন সাধু?”

ধনপতির আদেশে শ্রীমন্ত সমস্ত কথা আগাগোড়া রাজসভায় বলিল। শ্রীমন্তের কথা শুনিয়া সভা সমেত সমস্ত লোক অবাক হইয়া গেল। বেশী অবাক হইল কমলে কামিনীর কথা শুনিয়া। রাজা বলিলেন, “তোমার প্রতি যখন ভগবতীর এতই দয়া, তবে তুমি ইচ্ছা করিলেই আমাকে এখানেও কমলে কামিনী দেখাইতে পার।”

পাত্র মিত্র সকলে শ্রীমন্তকে ঠাট্টা করিতে লাগিল। রাজা বলিলেন, “শোন শ্রীমন্ত, যদি তুমি আমাকে কমলে কামিনী দেখাইতে পার তবে আমি আমার মেয়ে জয়াবতীর স’থে তোমার বিবাহ দিব। আর যদি না দেখাইতে পার তবে মসানে তোমার প্রাণ যাইবে।”

রাজার আদেশে কোটালেরা সিপাহী বরকন্দাজ সহ শ্রীমন্তকে মসানে লইয়া গেল। শ্রীমন্ত মসানে বসিয়া একমনে ভগবতীকে ডাকিতে লাগিল। ভগবতী বৃদ্ধা ব্রাহ্মণী সাজিয়া সেখানে আসিয়া রাজার সিপাহী বরকন্দাজদিগকে গিলিয়া খাইয়া শ্রীমন্তকে কোলে করিয়া বসিলেন। কোটাল যাইয়া মহারাজকে এই কথা জানাইল। কোটালের কথা শুনিয়া মহারাজের বুঝিতে বাকি রহিল না যে, সত্য সত্যই ভগবতী শ্রীমন্তের সহায়।

মহারাজ তখনই ছুটিয়া মসানে গিয়া সেই বুড়ীর পায়ে তলায় গলবস্ত্র হইয়া পড়িয়া বলিতে লাগিলেন, “মা, আমি তোমার অজ্ঞান সন্তান! বুঝিতে না পারিয়া শ্রীমন্তের কথায় বিগ্নাস করিতে পারি নাই। এখন আমি সমস্তই ত বুঝিতে পারিয়াছি, আমার আর কোনও অবিশ্বাস নাই। আমার সিপাহী বরকন্দাজদিগকে বাঁচাইয়া দাও, আমি শ্রীমন্তের সাথে জয়াবতীর বিবাহ দিব।”

ভগবতী হাসিয়া রাজার সিপাহী সৈন্যদিগকে বাঁচাইয়া

দিলেন। ভ্রমরা নদীর ধারেই মসান। দেখিতে দেখিতে সেই নদীর জল পদ্মবনে ভরিয়া গেল, শত শত পদ্ম ফুল ফুটিয়া উঠিল। রাজা বিস্ময়ে অবাক হইয়া দেখিলেন, ভ্রমরার জলে কমলে কামিনী। রাজা ও পাত্র মিত্র সকলেই হাত তুলিয়া ভগবতীর উদ্দেশ্যে প্রণাম করিলেন।

তারপর শুভ দিন দেখিয়া মহাসমারোহে রাজা বিক্রম-কেশরী কন্যা জয়াবতীকে শ্রীমন্তের সহিত বিবাহ দিলেন।

রাজ্যে একটা আনন্দের রোল পড়িয়া গেল। নৃত্যগীত, আমোদ আশ্লাদ, বাজবাজন, আতসবাজী, আমন্ত্রণ নিমন্ত্রণ এক মাস ভরিয়া খুব মহাসমারোহে চলিতে লাগিল।

এদিকে ধনপতি মনের আনন্দে শিবপূজা করিতে বসিয়াছেন। মাটির শিব গড়িয়া ধূপদীপ জ্বালিয়া ফুল বেল-পাতা নৈবেদ্য সাজাইয়া ধ্যান করিতে লাগিলেন। কিন্তু একি ! আজ এমন হয় কেন ? তিনি যতই জটাজুটধারী মহাদেবকে ভাবেন, ততই যে তাঁহার মনে ভাসিয়া ওঠে অর্দ্ধনারায়ণর মহাদেবের মূর্তি। মহাদেবের মূর্তির ডানদিকের অর্দ্ধেক খানা ঠিক মহাদেবের মূর্তিই আছে, কিন্তু বামদিকের অর্দ্ধেক ভগবতীর মূর্তি। একই শরীরে শিব ও দুর্গা। ধনপতি চোখ মেলিয়া চাহিয়া দেখেন, তাঁহার মাটির গড়া শিবও সেই অর্দ্ধনারায়ণর হইয়া বসিয়া আছেন। তখন তিনি সেই খানে উপুড় হইয়া গড়া করিয়া বলিতে লাগিলেন, “মা,

এত দিন আমি তোমাকে চিনিতে পারি নাই, চিনিতে না পারিয়া তোমাকে নানা কথা বলিয়াছি। এখন বুঝিতে পারিয়াছি, শিব ও দুর্গা ভিন্ন নহে ; মা, আমার অপরাধ ক্ষমা কর মা !” এই বলিয়া তিনি দেবীর চরণামৃত পান করিয়া সারা গায়ে মাখিলেন। অমনি তাঁহার গায়ের দাদ ও পায়ের গোদ সারিয়া গেল। নারীস্বর মূর্তি অন্তর্হিত হইয়া গেলেন।

শ্রীমন্ত নূতন বোঁ লইয়া বাসিহাছে। জ্ঞাতি কুটুম্ব আত্মীয় স্বজন বন্ধুবান্ধব সকলেই বরবধূকে আশীর্বাদ করিয়া নানা যৌতুক দিতেছে। যখন তাহারা সকলে চলিয়া গেল তখন ভগবতী বৃদ্ধা ব্রাহ্মণীর রূপ ধরিয়া আশীর্বাদ করিয়া গেলেন। শ্রীমন্ত তাহাকে চিনিতে পারিয়া খুল্লনাকে বলিল, “মা, এই বেশে ভগবতী আমাকে মসানে প্রাণ বাঁচাইয়াছেন।” খুল্লনা ব্রাহ্মণীকে সোণার আসনে বসাইয়া ফুল জল দিয়া তাঁহার পূজা করিল। ধনপতি আসিয়া তাঁহার পায়ে প্রণাম করিলেন। ভগবতী তখন একটু রাগিয়া বলিলেন, “উঠ ধনপতি, এতদিন ত কেবল আমাকে তিরস্কারই করিলে, এখন আবার নমস্কার কেন ? আগের সব কথা কি ভুলিয়া গিয়াছ ? তুমি পুরুষ হইয়া কেন মেয়ে দেবতার পায়ে মাথা ঠেকাইবেছ ?”

ভগবতীর রাগ দেখিয়া শ্রীমন্ত ও খুল্লনা তাঁহার স্তব স্তুতি

## শ্রীমন্ত

করিয়া বলিল, “মা, আপনি ক্ষমা না করিলে সন্তানের দোষ আর কে ক্ষমা করিবে?”

ভগবতী সন্তুষ্ট হইয়া সদাগরের মাথায় হাত দিয়া আশীর্বাদ করিয়া বলিলেন, “আজ হইতে আর তোমার কোনও দুঃখ থাকিবে না ধনপতি, তুমি নিয়ম মত আমার পূজা করিও, আমার কৃপায় তুমি ধনে পুত্রে লক্ষ্মীবন্ত হইয়া বণিক সমাজে বথেষ্ট মান সম্মান লাভ করিবে। আমার পূজা প্রচার করিবার জন্তই তোমাদিগকে এত কষ্ট দিয়াছি। তোমার স্ত্রী খুল্লনা পূর্ব জন্মে ইন্দ্রের সভায় রত্নমালা নামে নর্তকী ছিল, কেবল পৃথিবীতে আমার পূজা প্রচার করিবার জন্তই তাংকে অভিসম্পাত দিয়া এখানে আনিয়াছি। এখন সে শাপমুক্ত হইয়া স্বর্গে চলিয়া যাইবে। তাহার জন্ত আর তোমরা দুঃখ করিও না।”

স্বর্গ হইতে তখনই ইন্দ্রের রথ আসিয়া উপস্থিত হইল। খুল্লনা ধনপতি ও লহনাকে প্রণাম করিয়া শ্রীমন্ত, স্ত্রীলা, ভগবতী ও দুর্বলাকে আশীর্বাদ করিয়া ভগবতীর সাথে গিয়া রথে উঠিল। রথ দেখিতে দেখিতে আকাশের গায়ে মিলাইয়া গেল।

সমাপ্ত





